

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pê Juãw na pre hipêx. Na pre Jejus ã mẽ kãm hkurê xwýnhjaja unê nê ma gô hipôk pê Patos wýr kumẽ nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipôkja wýr wrý nê kãm mẽmoj kukamã awjarẽ nhũm kuma nê hkôt mẽmoj pumu. Te hpimtir kãm mẽmoj pumunh pyræk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kêp hkwýjê to ho pa nhũm mẽ hkwýjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rẽnh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnẽn hã kagà. Hãmri nê mẽ pamã hã kagà o:

¹⁻² E kot paj mẽ amã awjarẽ nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarẽ nê hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harẽnh

kaxyw. Hāmri nhūm kuma nē kot amnhĩ xô ri inhmã ujarēnh kaxyw man ixwỳr kapēr o wrỳk xwỳnh mẽ nhūm man ixwỳr wrỳ nē ô ri inhmã mẽmoj to amnhĩrīt pa. Ām hāmri ã inhmã mẽmoj to amnhĩrīt anē. Tã kot paj amnhĩ xwar mẽ apê Jejus kôt ri mẽ apa xwỳnhjê mã harē nē hã kagà. Mẽ ate mar nē axkãm ajamak rom nē ri apa kaxyw. Nà ixte hã kagà mã xwỳnhja koja tanhmã amnhĩ to nē tokyx mẽ pahwỳr wrỳ. ³ Jakamã kwa kêr ka mẽ aprĩ hã kagàja kamã harē nē ama nē hkôt pix mã amnhĩ nhĩpêx nē mẽ piitã mẽ kãm kamã harēnh o ri mẽ hkôt apa. Kot kaj mẽ ã amnhĩ nhĩpêx anē nhūm Tĩrtũm ja hã mẽ ato mex ka mẽ akĩnh nē apa ho apa. Nē mẽ kot mẽ axujarēnh mar nē hkôt amnhĩ nhĩpêx xwỳnhjaja koja Tĩrtũm ja hã mẽ omu nē mẽ ho mex nē nhūm mẽ apyrà nē hkĩnh nē pa ho pa.

Juãw kot krĩ pê 7 kôt Jejus kwỳjê hwỳr kagà rēnh

⁴ E ixpê Juãw kot paj atar pika pê As kamã krĩ pê 7 piitã hkôt mẽ apê Jejus kwỳ hã axpēn wỳr mẽ apikuprõnh xwỳnhjê hwỳr kagà nē kurē ka mẽ kamã harē nē ama.

Na pa hte mẽ ato Tĩrtũm wỳr rãhã ho ri ixpa. Nē mẽ ato hwỳr o:

—Pa Tĩrtũm. Kwa kêr ka pika pê As kamã akrajê ho mex nē mẽmoj to mẽ kutã anojarêt rãhã ho apa. Kê mẽ hamakêtkati nē àmnhĩx ri pa ho pa. Ja na inhmã hprãm. Anē.

Tĩrtũmja rãhã ho rãhã. Amnepēm kormã mẽmoj kêt ri nhūm pre ra rãhã ho rãhã. Nē koja nhỹrmã mẽmoj akupỹm hapêx par tã nhūm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa

kamã kot mẽ pahto amnhĩptàr ã hkrĩ xà kamã mẽ papytàr rãhã ho hkrĩ.

Ně Tĩrtũm Karõ te kot Tĩrtũm kot mẽ pahto amnhĩptàr xà hã hkrĩ xà kapem kanê maati pixi kamã kwryt pê 7 xãm xwýnhta pyræk. Na hte Tĩrtũm nhĩhkô hã hkrĩ ho hkrĩ. Tã kê mẽ ato mex rãhã ho pa.

⁵ Ně Jejusja na pre hte Tĩrtũm kapër o mẽ ahkre mex o pa nê aa hkaga hkêt nê. Tã nhũm prem axtem nê kupĩ. Hãmri nhũm Tĩrtũm akupým ho htĩr. Jejus kumrêx ho htĩr nhũm htĩr o htĩr. Ně kêp pika piitã hkôt pahi piitã nhõ Pahihti. Kãm mẽ pajapê htýx jakamã na pre mẽ panê ty nê hkamrõja te mẽ panê hpikapĩr pyræk o amnhĩ nhĩpêx. Ně htyk o mẽ pahte amnhĩ tomnuj pãnhã amnhĩre. Jao te mẽ pahte amnhĩ tomnuj pê mẽ papytàr par pyræk o mẽ panhĩpêx. ⁶ Ně na pre mẽ pahpê patre nê mẽ piitã mẽ ho Hipêêxà Tĩrtũm wýr o papa kaxyw mẽ paxunhwý. Ně kêp mẽ panhõ Pahi Maati hã kãm hprãm xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwý. Jakamã kwa kêr pu mẽ kãm mex o mex nê hihtýx o hihtýx ã mãn harênh rãhã ho papa.

⁷ Ně koja tokyx akupýn mẽ pahwýr kakrã kamã wrý pu mẽ pahpiitã wrýk kãm omu. Nhũm mẽ kot hpĩr xwýnhjaja tee ri amnhĩ wýr omu. Ně pika piitã hkôt ri mẽ pa xwýnhjaja omu nê mẽ kot amnhĩ tomnuj jakamã tee ri amnhĩ kukamã hamaxpër o kãm ma htýx kumrêx. Hãmri nê kãm ma xaj mur nê htertet o kuhê. Koja nhýrmã Jejus akupýn wrý nhũm mẽ amnhĩ wýr omu nê ã amnhĩ nhĩpêx anê.

⁸ Ně Tĩrtũm na hihtýx o hihtýx nê àhpumunh o àhpumunh. Ně aa kot mēhõ ni rũm kator kêt. Na

hte amnhĩ jarēnh o:

—Ixrāhā ixpa xwýnh na pa. Amnepê mã kormã mēmoj piitã hkêt ri pa pre ra ixrāhā ri ixpa ho ixpa. Nē koja nhỹrmã mēmoj akupỹm hapêx tã pa arĩ ixrāhãã. Anē.

Juãw kot Jejus akupỹm htĩr ã omunh

⁹ Nē ixpê Jejus kôt mē atõ Juãw na pa hte mē apyrà nē Jejus kôt amnhĩ nhĩpêx nhũm hte mē kãm Jejus kurê xwýnhjaja mē apyrà nē hã inhĩpêx kati ho pa. Mē pahte hkôt ri amnhĩ nhĩpêx o papa jakamã na htem hã mē pahtomnuj tỳx rāhã ho pa. Tã pu htem ý hã mē kutã amnhĩ to htỳx nē arĩ hkôt amnhĩ nhĩpêx. Jakamã na pa pre Tĩrtũm kapêr o mē ajahkre rāhã ho ri mē akôt ixpa. Nē Jejus kêp mē panhõ Pahihti hã mē amã harē. Mýrapê na prem hã ixpynê nē man amnê ixto tē nē jar gô hipôk pê Patos kãm inhmē pa kamã ixpê prês nē ixpa ho ixpa.

¹⁰ Tã nhũm tômĩk pa Tĩrtũm mã amnhĩ jarēnh o nhỹ. Hãmri nhũm Karõ tanhmã ixkrã hto pa te ixpimtir kãm mēmoj pumunh pyrà nē amnhĩ katut kôt mēhõ kapêr ma. Te kot pifti kakôr tỳx pyræk pa kuma. ¹¹ Hãmri nhũm inhmã kapêr nē inhmã:

—Pa Juãw? E kot paj amã mēmoj to amnhĩrĩt ka omu nē akwýjê mã hã kagà. Nē hã kagà hpa hãmri nē ahpýnhã krĩ hkwý hkôt mē kêp ixkwý hã axpên wýr mē pikuprõnh xwýnhjê hwýr arē. Mē kot kamã harēnh nē mar nē axkãm hamak rom nē ri pa kaxyw. Epes wýr nē Emĩnã hwýr nē Pekamõ hwýr nē Xijaxir wýr nē Satre hwýr nē Pirate hwýr nē Raxisej wýr. Krĩ pê 7ja piitã hwýr

ixkapēr ã kagà nē mẽ hwỳr arē kē mẽ apyrà nē mẽmoj jarēnhja ma. Anē.

¹² Hāmri pa ixte mēhōja pumunh kaxyw ho ijakēx nē kanē hkwỳ pumu. Kanē kēp 7 nē piitā ôr o.

¹³ Nē kanē nhĩpôk ri mēhōja te panhĩ pyrà nē pahĩ hã ê mex kãm xa. êja hpar kôn kôt hitep nhũm xa. Nē pahĩ hã mẽ hinô hpre xà ho amnhĩ nhĩnô hpre nē xa. Hinô pre xàja ôr pix o. ¹⁴ Nē hkrã hkĩ te kaxàt nhĩ jaka pyrà nē hakaajre. Nē no te kuwy hpôk pyrà nē hkarỳr tỳx nē. ¹⁵ Nē hpar te mẽmo kàx karỳr tỳx pyræk. Nē kapēr te gô hprôt tỳx koko pyræk. ¹⁶ Na pre upôk rũm kanhêti ho 7 nē hamỳ nē o xa. Nē hakwa rũm wapo pôm kato nē akutã wa gixre nē ajêt. Nē hkuk kamã hirã htỳx kumrêx. Te myt kot mẽ pano hã harir nhũm gêk tỳx pyræk. Æ mēhōja kot anhỳr.

¹⁷ Pa tee ri tanhmã kute hã omu nē inhmã ma htỳx kumrêx nē umaj tēm nē hpar pê te ixtyk pyrà nē nō. Hāmri nhũm ixtã upôk rũm ãhkraja xi nē inhmã kapēr nē inhmã:

—Kwa amã ixpuma hkêt nē. Pa na pa. Amnepê mã kormã mẽmoj kator kêt ri pa pre raa. Nē ixrãhãã. Kojã nhỹrmã mẽmoj akupỹm hapêx pa arĩ ixrãhã ixpa ho ixpa.

¹⁸ —Na pa pre ty tã akupỹm ixtĩr. Nē ixtĩr o ixtĩr. Kam ixpumu. Kot paj axte ixtyk kêt nē. Ixpê mẽhtykjê hpãm jakamã papxipix na pa hte mẽ htyk ã arĩgro jarē nhũm mẽ hã ty nē ma mẽhtykjê papxà hwỳr ma pa.

¹⁹ —E kêr ka ate mẽmoj pumunh xwỳnhhta pumunh tỳx nē akwỳjê mã hã kagà. Nē mẽmoj kormã kot amnhĩ nhĩpêx kêt nhũm ate omunh mã

xwỳnhhta ka inhỹ hã mẽ kãm hã kagà. Mẽ kot kamã harẽnh nẽ mar tỳx kaxyw.

²⁰ —Nẽ kot paj axte ixprĩ hã ate mẽmoj pumunh xwỳnhhta jarẽ ka inhma. Nà kanê pê 7ta te mẽ kot krĩ hkwȳ pê 7 kamã mẽ kêp ixkwỳ̄ hã axpẽn wỳr mẽ pikuprõnh xwỳnhjê pyràk. Nẽ inhĩhkra kamã kanhêti pê 7ta te kêp inhmã mẽ kot mẽ hamãr xwỳnhjê pyràk. Anẽ.

2

Epes kamã Jejus kwỳjê hwỳr kagà

¹ Nhũm Jejus arĩ inhmã kapẽr nẽ inhmã:

—E kêr ka krĩ pê Epes kamã ixkwỳjê jamãr xwỳnh wỳr kagà nẽ amẽ. Nẽ kagàja kamã mẽ kãm ixkapẽr jarẽ nẽ mẽ kãm:

Pa Epes kamã ixkapẽr mar kaxyw axpẽn wỳr apikuprõnh xwỳnhjaja. Ot pa mẽ awỳr ixpẽr mẽ. Ixpê ixupôk o kanhêti ho 7 nẽ hamỳnh nẽ ho ixãm xwỳnhhta na pa. Nẽ ixpê ôr o kanê pê 7 nhĩpôk ri ixpa xwỳnhhta na pa ã mẽ awỳr ixpẽr mẽnh anẽ.

² Na pa hte tanhmã mẽ ate amnhĩ nhĩpêx to ho apa hã mẽ apumunh mex o ixpa. Na ka htem inhmã amnhĩ nhĩpêx mex nẽ pa ja hã mẽ apumu. Mẽ kot ixtã mẽ anhĩpêx kati htã ka mẽ kutã amnhĩ to htỳx nẽ ixkaga hkêt nẽ. Nẽ mẽ kot amnhĩ tomnuj xwỳnhjê hkôt amnhĩ nhĩpêx o ri apa hkêt nẽ. Nhũm ixte mẽ awỳr mẽ rẽnh ã amnhĩ to hêx xwỳnhjaja mẽ awỳr pan pôj ka mẽ aprĩ hã mẽ kot amnhĩ to hêx ã mẽ omu. Hãmri nẽ tee ri mẽ kot amnhĩ nhĩpêx ã mẽ omu nẽ amnhĩ nẽ mẽ hanor kurê kumrẽx. ãm hãmri na ka htem ã mẽ hipêx anẽ.

³ Nē mẽ kām ixkurê xwỳnhjaja kot tanhmã ixtã mẽ atomnuj tỳx to htã ka mẽ kutã amnhĩ to htỳx nē aa ixkaga hkêt nē. Nē ixkôt amnhĩ nhĩpêx mex rãhã ho ri apa. ãm hãmri na ka htem ã amnhĩ nhĩpêx anhỹr o ri apa.

⁴ ãm mẽmoj pixi na ixpê omnuj. Amnepê mã kormã mẽ ate ixkôt amnhĩ xunhwỳr nyw ri na ka prem amã axpên kĩnh nē axpên to mex o ri apa. Nē mẽ amã axpên tã ma ho te mẽ amã amnhĩ tã ma pyræk o axpên nhĩpêx. Tã tanhmã ajamaxpêr to nē axte ã axpên nhĩpêx anhỹr kêt nē. Jaõ te mẽ amã ixkĩnh kêt pyræk o amnhĩ nhĩpêx. Pa tee ri ja hã mẽ apumu nhũm ja inhmã mex kêt nē.

⁵ Kwa mẽ tokyx ja hã amnhĩ pumu nē akupỹm mẽ ate ixkôt amnhĩ xunhwỳr nyw ri mẽ ate axpên nhĩpêxta o akupỹm axpên nhĩpêx o apa. Kot kaj mẽ anhỹr kêt kot paj te mẽ apê mẽ anhõ kanê hpyr nē kapôt ã mẽnh pyræk o mẽ anhĩpêx ka mẽ ri apa nē gaa nē apikaprãr pa. Tã mẽhõ koja mẽ amỳr pê mẽ anhõ krĩ kamã mẽ kãm ijarẽnh o pa?

⁶ Nē mẽ kêp Nikoraw nhõ xwỳnhjaja na ka htem mẽ kot tanhmã amnhĩ tomnuj to hã mẽ omu nē ixpyrà nē apê ja hprãm nõkati nē mẽ hkôt ri amnhĩ nhĩpêx kêt nē. Pa ja hã mẽ apumu nē ixkĩnh nē.

⁷ Tã ixte mẽ amã ixkapêr jatur xà na ja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nē kãm ajamaxpêr tỳx rãhã ho ri apa.

Tĩrtũm nhõ krĩ kamã mẽmo pĩ hpàr kuhê

xwÿnh. Mě kot ô hkur nē axte htyk kêt nē pa ho pa mā xwÿnhhta. Kot kaj mẽ ate amnhĩ tomnuj nē amnhĩ to htÿx nē arĩ inhmā hprām xà hkôt amnhĩ nhĩpêx rāhā ty pa akupÿm mẽ ato mẽ atĩr nē ma pĩ hpārta wÿr mẽ arē. Ka mẽ ma hwÿr mra nē ô hō hta nē akrē nē axte atyk kêt kumrēx nē apa ho apa.

E ām ja pix na hapêx. Anē.

—E Juāw. Kēr ka Epes kamā ixkwÿjê jamār o pa xwÿnhhta wÿr ā ixkapēr ā kagà anē nē mẽ hwÿr amē. Anē.

Hāmri pa kuma nē ô ri mẽ kām hā kagà hpa.

Emĩnā kamā Jejus kwÿjê hwÿr kagà

⁸ Hāmri nhūm hpānhā Emĩnā nhō xwÿnhjê kaxyw inhmā kapēr nē inhmā:

—Nē hpānhā Emĩnā kamā ixkwÿjê jamār xwÿnh wÿr kagà nē mẽ hwÿr amē. Nē mẽ kām ixkapēr jarē nē nē mẽ kām:

Pa Emĩnā kamā ixkapēr mar kaxyw axpēn wÿr mẽ apikuprōnh xwÿnhjaja. Ot pa mẽ awÿr ixpēr mẽ. Ixrāhā ho ixrāhā ixpa xwÿnhhta na pa. Amnepēm kormā mẽmoj piitā hkêt ri na pa pre ixrāhā nē ri ixpa. Kojā nhÿrmā mẽmoj akupÿm hapêx pa arĩ ixrāhā ho ixrāhā nē ri ixpa. Na pa pre ty no ām akupÿm ixtĩr o ixtĩr. Tā pa ā mẽ awÿr ixpēr mẽnh anē.

⁹ Nà na pa hte mẽ ate tanhmā amnhĩ nhĩpêx to ho apa hā mẽ apumunh rāhā ho ixpa. Na hte mẽ kām ixkurē xwÿnhjaja ixtā mẽ atomnuj to ka mẽ apē amrakati nē ri apa. Nom mẽ ate tām amnhĩ nhĩpêx jakamā te mẽ apē mẽ hikukrēx rūnh kumrēx xwÿnhjê kot amnhĩ nhĩpêx pyrā nē

ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwýnhjaja mẽ ato kapêr punuj rũnh o pa. Mẽ kot Tĩrtũm kôt amnhĩ nhĩpêx ã amnhĩ jarênh tâ no ãm hkôt amnhĩ nhĩpêx kêt nê. ãm Satanasti kôt pix mã na htem amnhĩ nhĩpêx o pa.

¹⁰ Tã mẽ kãm ixkurê xwýnhjaja kot ixtã mẽ atomnuj tỳx o pa htã kêr ka mẽ amnhĩ tâ mẽ omu nê tee ri amnhĩ kukamã ajamaxpêr kêt nê. Nê arĩ mẽ kutã amnhĩ to htỳx nê. Kojã Satanasti mẽ akwỳjê pynê nê mẽ ajagjê. Hãmri nê mẽ ate ixkaga hprãm xàj tanhmã mẽ anhĩpêx kati hto ka mẽ hagjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nê ixkaga hkêt nê. Mẽ kot mẽ apar mã tâ ka mẽ kutã amnhĩ to htỳx nê. Kot kaj mẽ aa ixkaga hkêt nê ixkôt ri amnhĩ nhĩpêx rãhã ty pa akupỹm mẽ ato mẽ atĩr nê ma amnhĩ wỳr mẽ ato api. Hãmri ka mẽ Tĩrtũm mẽ wa ixri amex nê atĩr tũm nê apa ho apa nê axte atyk kêt nê apa.

¹¹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêrja anhỹr ma nê kãm ajamaxpêr tỳx rãhã ho ri apa. Kot kaj mẽ ate amnhĩ tomnuj nê amnhĩ to htỳx nê inhmã hprãm xà hkôt pix mã amnhĩ nhĩpêx rãhã ty. Hã kot paj akupỹm mẽ ato mẽ atĩr ka mẽ ma kuwyta wỳr apa hkêt nê.

E. ãm ja pix. Na hapêx. Anê.

—E Juãw. Kêr ka Emĩnã kamã ã ixkrajê mã ixkapêr ã kagã anê. Anê.

Hãmri pa kuma nê ô ri mẽ kãm hã kagã.

Pekamō kamā Jejus kwỳjê hwỳr kagà
Sikũn Korĩt 6.14–7.1

¹² Nhũm Jejus arĩ inhmã kapër nê hpãnhã inhmã:

—E hpãnhã Pekamō kamā ixkrajê jamār o pa xwỳnhja wỳr kagà nê mẽ hwỳr amẽ. Nẽ mẽ kãm ixkapër jarẽ nê mẽ kãm:

Pa Pekamō kamā ixkapër mar kaxyw axpẽn wỳr mẽ apikuprõnh xwỳnhjaja. Ot pa mẽ awỳr ixpër mẽ. Ixpê ijakwa rũm põm wapo akutã wa gix nê kator nê ãm xwỳnhta na pa mẽ awỳr ixpër mẽ.

¹³ Na pa hte mẽ anhõ krĩ nhõ xwỳnhjaja kot tanhmã amnhĩ tomnuj to ho pa hã mẽ omunh mex nê. Mẽ kot Satanasti kõt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyræk. Æxipas kot mẽ hkõt mẽ kãm ixkapër o mẽ ahkre ho pa nê aa hkaga hkêt tâ nhũm prem axtem nê ixtã kupĩ. Ka mẽ ja hã mẽ omunh tâ mẽ umaj ixkaga hkêt nê arĩ ixkõt amnhĩ nhĩpêx rãhã ho ri apa. Æm hãmri na ka htem ã amnhĩ nhĩpêx anẽ.

¹⁴ Mẽmoj pixi na ixpê omnuj. Na hte mẽ akwỳjaja axtem nê Paraãw kapër kõt amnhĩ nhĩpêx o pa. Na pre Paraãwja Parak mã tanhmã kapër to nhũm kuma nê amnhĩ xõ ri tanhmã mẽ anhĩgêt mã kapër to ho pa. Nom ixkapër kõt kêt ixkapër kuhpa hã tanhmã mẽ kãm kapër to nê mẽ kãm: “Mẽ mãmrĩ ma sãnti hã mẽ hkĩnh mã xwỳnhjê hkõt mra nê sãnti hã apku nê hã akĩnh. Nẽ mẽ uræk nê axpẽn pẽ axpẽn prõ ho amnhĩkati nê axpẽn pẽ ri axpẽn mjên o amnhĩkati nê mẽ ã ri amnhĩ nhĩpêx anhỹr o ri apa. Ja mex kênã.”

Anhÿr o mẽ anhÿgêť mã kapêr o pa nhÿm mẽ kuma nê mẽ hkôt amnhĩ nhĩpêx. Tã ka mẽ akwÿjaja mẽ uràk nê ã amnhĩ nhĩpêx anhÿr o apa. Kwa ja mex kêt.

¹⁵ Na hte mẽ akwÿjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mãânên mex kêt. ¹⁶ Tã ra mẽ akwÿjaja ã amnhĩ tomnuj anhÿr o pa ka mẽ ja hã mẽ omu nê ãm mẽ omu nê nê tanhmã mẽ kãm akapêr to hkêt nê. Kwa mẽ ate ã amnhĩ nhĩpêx anhÿr xwÿnhjaja. Kêr ka mẽ tokyx ja kaga nê akupÿm ixkôt ri amnhĩ nhĩpêx mex nê. Kot kaj mẽ anhÿr kêt kot paj tokyx mẽ awÿr wrÿ nê te ijakwa rÿm pôm wapo kator xwÿnhata o mẽ hkanhwÿr pyràk o mẽ anhĩpêx. Nom ixkapêr xihťÿx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtÿm mẽ wa Ixkarō nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Nê kot kaj mẽ ate amnhĩ tomnuj nê amnhĩ to htÿx nê inhmã hprãm xà hkôt amnhĩ nhĩpêx rãhã ty. Hã kot paj akupÿm mẽ ato mẽ atĩr hãmri nê ra pam mẽ amã mẽ anhō ka mẽ hkur o apa. Te amnepêm Ijaew kapôt ã pa nhÿm ixte mẽ hwÿr “manã” anhÿr xwÿnhata rēnh nhÿm mẽ kot hkur o pata pyràk. Nom ixte mẽ amã mẽ anhōja na hpimxur. ãm papxipix na pa hte mẽ kãm ōr o ixpa.

Nê kot paj mẽ atã mẽ anhĩxi nyw rē. Jao kēn jakare hkwy hã ahpÿnhã mẽ anhĩxi nyw jaxwÿ nê mẽ amã kugō. Ka mẽ hamÿ nê kapxipix

amnhĩ nhĩxi nyw pumunh o apa.

E ãm ja pix. Na hapêx. Anê.

—E Juãw. Kêr ka Pekamõ kamã ixkrajê hwỳr ã ixkapêr anhỳr ã kagà nê mẽ hwỳr amê. Anê.

Hãmri pa kuma nê ô ri mẽ kãm hã kagà.

Xijaxir kamã Jejus kwỳjê hwỳr kagà

Jutre 3-23

¹⁸ Nhũm Jejus arĩ inhmã kapêr nê inhmã:

—E hpãnhã Xijaxir kamã ixkwỳjê jamãr xwỳnh wỳr kagà nê amê nê mẽ kãm ixkapêr jarê nê mẽ kãm:

Pa Xijaxir kamã ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Ixpê Tĩrtũm Kra na pa. Ixpê inhno te kot kuwy hpõk karỳr tỳx pyrãk xwỳnhhta na pa. Nê ixpê ixpar te kot kàx karỳr tỳx pyrãk xwỳnhhta na pa mẽ awỳr ixpêr mẽ.

¹⁹ Na pa hte mẽ ate amnhĩ nhĩpêx kõt mẽ apumunh mex o ri ixpa. Na ka htem amnhĩ kaxyw inhmã ajamaxpêr pê inhmã amnhĩ to mex o ri apa. Mẽ akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nê. Nê arĩ amã ixkĩnh tỳx kãm tanhmã amnhĩ nhĩpêx to ho ri apa. Nê axpên to mex nê ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mẽ ate ixkõt amnhĩ nhĩpêxta jakre. Nà ja inhmã mex kumrêx.

²⁰ ãm mẽmoj pixi na ixpê omnuj. Mẽ akõt niti ri pa xwỳnh Jejapewtita. Kêp Tĩrtũm nhỹ hã kapêr jarênh o pa xwỳnh ã amnhĩ to hêx xwỳnhhta. Na hte ixkapêr kupa hã tanhmã mẽ ajahkre hto ka htem ama nê nê tanhmã kãm nê hkêt nê. Na

hte mẽ amã: “Xê mẽ mãmrĩ ri mẽ hkuprÿjê hwÿr mra nê mẽ ho amnhĩkati. Nê axpên pê mẽ aprõ nê mẽ amjên o amnhĩkati. Nê mẽ kot sãnti hã mẽ hkĩnh nê hã apkur xwÿnhjê hkôt mra nê mẽ hkôt amnhĩ nhĩpêx. Tĩrtũm kãm ja mex kênã.” Anhÿr o mẽ amã kapêr o pa. Nê inhmã ja mex ã ijarê nom inhmã ja mex kêt. Tã ra mẽ akwÿjaja kapêr ma nê hkôt amnhĩ nhĩpêx ka mẽ ja hã mẽ omunh tã amnhĩ nê nitita janor kêt nê nhũm arĩ ri mẽ amã hêx o ri mẽ akôt pa. ²¹ Ra kot ã amnhĩ nhĩpêx anhÿr o mẽ akôt pa ry rax kumrêx tã pa kormã ja hã tanhmã ho hkêt nê kormã amnhĩ tã hamã. Kot ã amnhĩ nhĩpêx anhÿr kaga kaxyw na pa kormã hamãr o ri ixpa. No nhũm aa hkaga hkêt nê.

²² Mÿrapê kot paj tokyx tanhmã ho nhũm amnhĩ xà htÿx kamã hamak o hikwÿ. Tã mẽ kot kapêr mar nê hkôt amnhĩ nhĩpêx xwÿnhjaja kot amnhĩ tomnuj ã amnhĩ pumu nê hkaga hkêt hã kot paj mã mẽ ho anê nê. Mããnên tanhmã mẽ homnuj to nhũm mẽ nitita pyrã nê amnhĩ xà htÿx kamã hamak o hikwÿ.

²³ Nê nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nê ixte mẽ apiitã ahpÿnhã tanhmã mẽ ajamaxpêr to hkôt mẽ apumunh ã ixpumu. Nê ixte ahpÿnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xà hkôt tanhmã mẽ anhĩpêx to hã ixpumu.

²⁴ Na hte mẽ akwÿjaja akwÿjê rom nita kapêr ma nê ãm kuma nê hkôt amnhĩ nhĩpêx kêt nê. Nê mẽ kapêrja mẽ kot kãm: “Satanasti kapêr pimxur” anhÿr xwÿnhhta kôt nhũm mẽ amnhĩ

nhĩpêx kêt nê. Na htem ixkôt pix mã amnhĩ nhĩpêx mex o ri pa. Tã ã mẽ ate ixkôt amnhĩ nhĩpêx anhÿr o apa xwÿnhjaja kot paj mẽ amã ja pix ã karõ ka mẽ inhma. ²⁵ Kêr ka mẽ arĩ ixkôt pix mã amnhĩ nhĩpêx o ri apa rãhã pa akupÿn mẽ awÿr wrÿ. ãm ja pix ã kot paj mẽ amã karõ.

²⁶ Nê kot kaj mẽ ate amnhĩ tomnuj nê amnhĩ to htÿx nê arĩ inhmã hprãm xà hkôt amnhĩ nhĩpêx rãhã ty. Hãmri pa ja hã mẽ apumu nê nhÿrmã mẽ ate krĩ hkwÿ hkôt mẽ pa xwÿnhjê ho amnhĩptàr o apa kaxyw mẽ axunhwÿ. Ka mẽ apê mẽ õ pahшти nê inhmã mẽ ho amnhĩptàr o ri apa.

²⁷ Na pre Inhĩpêxà ixte pika piitã hkôt ri mẽ pa xwÿnhjê ho amnhĩptàr kaxyw ixãm.

Tã kot paj nhÿrmã amnhĩ pyrà nê mẽ kaxyw mẽ axunhwÿ ka mẽ inhmã mẽ hamãr o apa.

Nhũm mẽhõ ixkapêr kwÿm ri tanhmã amnhĩ nhĩpêx to ka mẽ ja hã omu nê hã tanhmã ho. Te mẽ kot poti punuj mÿnh nê mẽnh nê hkrakrak pyræk.

²⁸ Kot paj ã mẽ ate mẽ hipêx anhÿr o apa kaxyw mẽ axunhwÿ. No ãm ja pix kêt. Kot paj te ixte mẽ amã kanhêti hõ nhõr pyræk o mẽ anhĩpêx. Arĩgro hkôt kanhêti no hpòk rax japôx xwÿnhhta kot paj te ixte mẽ amã õr pyræk ka mẽ ixri atĩr tũm nê apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa. Anê.

—E Juãw. Kêr ka ã Xijaxir kamã ixkrajê kaxyw ixkapêr ã kagà nê mẽ hwÿr mẽnh anê. Anê.

Hãmri pa kuma nê ô ri mẽ kãm hipêx nê mẽ hwÿr kumẽ.

3

Satre kamã Jejus kwÿjê hwÿr kagà

Rukre 12.35-40

¹ Nhũm Jejus arĩ inhmã kapêr nê inhmã:

—E hpãnhã Satre kamã ixkwÿjê jamãr xwÿnh wÿr kagà nê mẽ kãm ixkapêr jarẽ nê mẽ kãm:

Pa Satre kamã ixkrajaja. E ot pa mẽ awÿr ixpêr mẽ. Ixpê inhĩhkra ho kanhêti pê 7 jamÿnh nê xãm xwÿnhhta na pa. Nê ixpê inhĩhkra ho Tĩrtũm Karõ ãm pyxi htã te kamã kêp 7 jamÿnh nê ho ixãm xwÿnhhta na pa mẽ amã ixkapêr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpẽn mã mẽ ate ixkôt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhÿr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nê mẽ anhĩkwÿ pyræk.

² Na ka htem ãm akrành mã ixkôt ri amnhĩ nhĩpêx nom Tĩrtũm mẽ wa ixkôt amnhĩ nhĩpêx mex kêt nê. Ra Tĩrtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nê ate amnhĩ tomnuj mã anhũre nê wa ixkôt amnhĩ xunhwÿr tÿx nê.

³ Kêr ka mẽ annepê mã kormã mẽ ate ixkôt amnhĩ nhĩpêx nyw ri mẽ kot ixkapêr o tanhmã mẽ ajahkre htoja mã ajamaxpêr nê amnhĩ tomnuj mã anhũre. Nê ixkapêr kôt pix mã mãn amnhĩ nhĩpêx o ri apa. Kot kaj mẽ anhÿr kêt kot

paj nhÿrmã mẽ ajaêr pê akupÿn mẽ awÿr wrÿ nẽ ja hã tanhmã mẽ ato.

⁴ ãm mẽ agrêre nẽ amã ixkôt amnhĩ nhĩpêx prãm. Jao tãm ri amnhĩ nhĩpêx nẽ mẽ kot amnhĩ tomnuj xwÿnhjê hkôt amnhĩ nhĩpêx kêt nẽ. Te mẽ axê jakare kamã apa nẽ tanhmã amnhĩ pê htyk to hkêt pyræk. Tã kot kaj mẽ nhÿrmã ixri mẽ axê jakare kamã apa ho apa. Ra mẽ ate ja ho anhÿr mã tãm kênã. Ja na Tĩrtũm kãm hprãm.

⁵ Nẽ krĩ piitã hkôt mẽ ate amnhĩ tomnuj nẽ amnhĩ to htÿx nẽ inhmã hprãm xà hkôt amnhĩ nhĩpêx rãhã atyk xwÿnh piitã kot ka mẽ nhÿrmã Tĩrtũm mẽ wa ixri amex nẽ atĩr tũm nẽ apa ho apa. Ra mẽ hixija Mẽpahpãm Maati nhõ kagàja kamã na. Kamã mẽ atĩr o mẽ atĩr mã xwÿnhjê nhĩxi piitã hã kagà. Kot paj kagàta kamã aa mẽ anhĩxi grành kêt nẽ. Hãmri nẽ Inhĩpêêxà mẽ kapêr o mẽ wrÿk xwÿnhjê mã mẽ ajarênh o: “E mẽ jajê pumu. Ixkwÿ na mẽ.” Anhÿr o mẽ kãm mẽ ajarê.

⁶ E ixkwÿjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr anhÿrja ma nẽ kãm ajamaxpêr tÿx rãhã ho ri apa.

Tã ãm ja pix. Na hapêx. Anẽ.

—E Juãw. Kêr ka ã Satrejê mã ixkapêr ã kagà nẽ mẽ hwÿr mẽnh anẽ. Anẽ.

Hãmri pa kuma nẽ ô ri mẽ kãm hã kagà.

*Pirate kamã Jejus kwÿjê hwÿr kagà
Wam Tesarõn 2.13-16*

⁷ Nhũm Jejus arĩ inhmã kapêr nẽ inhmã:

—E hpānhã Pirate kamã ixkwỳjê jamār xwỳnh hwỳr kagà nhĩpêx nê amê nê mẽ kãm ixkapêr jarê nê mẽ kãm kãm:

Pa Pirate kamã mẽ ate ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Inhmex o inhmex xwỳnh na pa. Aa ixêx kêt nê ixpa xwỳnh. Amnepê mã na pre mēhõja pahi Tawi mã õrkwỹ mex ã saf jamār o pa. Tã pa hte urak nê Inhĩpêxà Tĩrtũm nhõ krĩ hwỳr mẽ gjêx xà hã saf jamỳ nê ho ixpa. ãm papxipix inhõ saf jakamã papxipix na pa hte mẽ ate ixkõt amnhĩ xunhwỳr xwỳnhjaja mẽ agjêx kaxyw mẽ amã kahê xà rê nê ixkra hkêt xwỳnhjê pê kahê. Kot paj mẽ apê ixkrajê mã kahê xà rê ka mẽ hwỳr agjê. Hãmri pa mẽ atã kahê nhũm ixkra hkêt xwỳnhjaja tee ri kãm mẽ akõt gjêx prãm kaprỳ.

⁸Na pa hte tanhmã mẽ ate amnhĩ nhĩpêx to ho apa hã mẽ apumunh mex o ri ixpa. Mẽ agrêre htã na ka htem ixkapêr kõt amnhĩ nhĩpêx mex nê aa ixkaga hkêt nê. Jakamã kot paj te ixte mẽ amã Tĩrtũm nhõ hakwakre kahê xà mēnh pyrak o mẽ anhĩpêx ka mẽ axãmnhĩx ajamakêtkati nê ma mẽ kãm Tĩrtũm kapêr o mẽ ahkre ho ri mẽ hkõt apa. Nhũm mẽ hkwỳjaja tee ri ã mẽ ate amnhĩ nhĩpêx anhỹrja nê mẽ amã kapêr kaprỳ ka mẽ arĩ ho mẽ ahkre ho ri mẽ hkõt apa.

⁹Nê mẽ anhõ krĩ kamã mẽ akwỳjaja na prem ra Satanasti hkõt amnhĩ xunhwỳ nê hêx rom mẽ amã amnhĩ to hêx nê mẽ amã: “E mẽ ixpê Ijaew mex jakamã kwa mẽ ixkapêr ma nê mẽ ixkõt amnhĩ nhĩpêx.” Anhỹr o mẽ amã karõ htã no ãm mẽ kot Satanasti hkõt amnhĩ nhĩpêx xwỳnh na mẽ. Tã kot paj nhỹrmã tanhmã mẽ homnuj

to nhũm mẽ tee ri amnhĩ pumu nẽ akupỹm mẽ awỳr mra nẽ mẽ akutã hkõnkrã ho rôrôk nẽ hkrĩ nẽ mẽ amã: “Nà mẽ kajaja na ka pẽr mẽ ixrom Jejus kôt amnhĩ nhĩpêx. Mãn kãm mẽ ajapêê.” Anẽ.

¹⁰ Mẽ kot ixtã mẽ atomnuj tỳx nhũm mẽ ate amnhĩ xà htỳx kamã ajamak tã aa mẽ umaj ixkaga hkêt nẽ. Nẽ arĩ ixte mẽ amã mẽmoj tã karõ xà hkôt mẽ kutã amnhĩ to htỳx rãhã arĩ ixkôt ri amnhĩ nhĩpêx o apa. Jakamã mẽ kot nhỹrmã mẽ kãm ixkurê xwỳnhjaja pika piitã hkôt tanhmã mẽ homnuj tỳx to nhũm mẽ amnhĩ xà htỳx kamã ama. Tã kot paj mẽ anê mẽ omunh mex nẽ nhũm mẽ tanhmã mẽ ato hkêt nẽ ka mẽ amex nẽ ri apa ho apa.

¹¹ E kot paj tokyx akupỹn mẽ awỳr wrỳ nẽ mẽ ate ixkôt pix mã amnhĩ nhĩpêx ã mẽ ato mex rax kumrêx. Jakamã kwa mẽ mãmri ã amnhĩ nhĩpêx anhỹr o inhmã hprãm xà hkôt pix mã amnhĩ nhĩpêx rãhã ty. Kot ka mẽ anhỹr kêt kot pa mẽ amã mẽmoj mex nhõr kêt nẽ.

¹² Nẽ kot kaj mẽ kot amnhĩ tomnuj xwỳnhjê kutã amnhĩ to htỳx nẽ inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ kôt mẽ ato mẽ axihtỳx nẽ ka mẽ aa ixkaga hkêt nẽ. Nẽ kot paj nhỹhỹnh mẽ atã mẽ inhĩxi ho axkrunêpxi nẽ haxwỳ. Inhĩpêêxà nhĩxi nẽ inhĩxi nyw nẽ Inhĩpêêxà nhõ krĩ nhĩxija kot paj nhỹhỹnh mẽ atã haxwỳ. Tĩrtũm nhõ krĩ mẽ kot kãm: “Jerujarẽ nyw” anhỹr xwỳnhhta koja nhỹrmã tanhmã amnhĩ to nẽ ra kaxkwa rũm pika wỳr wrỳ.

¹³ E ixkwỳjaja. Kot kaj mẽ amã ixkapẽr mar

prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapěr anhỹrja ma nẽ kãm ajamaxpěr tỳx rãhã ho ri apa.

Tã ãm ja pix. Na ra hapêx. Anẽ.

—E Juãw. Kêr ka ã Pirate kamã ixkrajê mã ixkapěr ã kagà anẽ. Anẽ.

Hãmri pa kuma nẽ ô ri mẽ kãm hã kagà.

Raxisej kamã Jejus kwỳjê hwỳr kagà

¹⁴ Nhũm pre Jejus arĩ inhmã kapěr nẽ inhmã:

—E hpãnhã krĩ pê Raxisej kamã ixkrajê jamãr xwỳnh wỳr kagà nhĩpêx nẽ amẽ. Nẽ mẽ kãm ixkapěr jarẽnh o:

Pa Raxisej kamã ixkrajaja. Ot pa mẽ awỳr ixpěr mẽ. ãm hãmri ixkapěr o ixpa nẽ aa ixêx kêt xwỳnhhta na pa. Jakamã ãm hãmri na pa hte Tĩrtũm kapěr o mẽ ajahkre o ixpa nẽ aa ja kaga hkêt nẽ. Pa na ixpê mẽmoj piitã hpàr krax.

¹⁵⁻¹⁶ Na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Kop apu mẽ ate ixkôt amnhĩ nhĩpêx mex ronhỹx pa ja hã mẽ apumu nẽ ixkĩnh nẽ. Nom mẽ ate ã amnhĩ nhĩpêx anhỹr kêt. No mããnẽn aa ixkaga hkêt nẽ. Na ka htem ri atỳx amnhĩ krã hkôt pix mã tanhmã amnhĩ nhĩpêx to ho apa nhũm ja ixpê omnuj nẽ. Kot kaj mẽ arĩ ã amnhĩ nhĩpêx anhỹr o apa pa hpãnhã amnhĩ nẽ mẽ akurê. Te mẽ kot gô xenh nõkati janhir nẽ tee hkakinh nẽ akupỳm hkapĩr pyràk.

¹⁷ Mẽ ate inhmã hprãm xà hkôt amnhĩ nhĩpêx ã amnhĩ jarẽnh tã ã amnhĩ nhĩpêx anhỹr kêt nẽ. Nẽ ixkapěr mar tỳx nẽ amnhĩ kaxyw inhmã ajamaxpěr mex kêt nẽ.

18 Kwa mẽ tokyx ja hã amnhĩ pumu nẽ akupỹm ixkõt amnhĩ xunhwỳr tỳx nẽ. Kêr pa ja hã mẽ apumu nẽ amnhĩ katut kõt mẽ ate amnhĩ tomnuj rẽ nẽ tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrĩt to ka mẽ aprĩ hã ixte amnhĩ nhĩpêx ã ixpumunh mex nẽ ixkõt amnhĩ nhĩpêx mex rãhã o ri apa.

19 Xà inhmã mẽ ajapê hkêt ã na pa ã mẽ amã ixkapêr anẽ? Nà inhmã mẽ apiitã mẽ ajapê htỳx kênã. Nom inhmã mẽ ajapê htã ka htem ixkõt amnhĩ nhĩpêx kêt nẽ. Na pa tee ri amnhĩ tã mẽ apumu nẽ ja hã tanhmã mẽ atomnuj tỳx to. Tokyx mẽ ate amnhĩ tomnuj mã anhũrer nẽ hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nẽ akupỹm amnhĩ kaxyw inhmã ajamaxpêr ho ri apa.

20 Na htem hkwyjê nhõrkwỹ hwỳr gjêx kaxyw hakwa krem kãm àkjêr o kuhê nhũm mẽ kuma nẽ mẽ kãm anẽ nhũm mẽ hwỳr agjê. Nẽ mẽ ixkre hkre kamã axpên mã kapêr o hkrĩ rỳ axpên mã kapêr pê mẽmoj to hkõm o hkrĩ. Ja pyrã nẽ ot pa mẽ ajamãr o ixpa. Mẽ ate inhmã anhỹr nhũm ixte mẽ akõt ixpa ho ixpa nhũm mẽ pahte axpên to mex o papa kaxyw.

21 Kormã mẽ kot ixpĩr kêt ri na pa pre mẽ kot amnhĩ tomnuj xwỳnhjê kutã amnhĩ to htỳx o ixpa. Amnhĩ to htỳx nẽ ri ixpa kamã ixtyk jakamã nhũm Inhĩpêexà akupỹm ixto ixtĩr nẽ akupỹm amnhĩ wỳr ixto api. Hãmri nẽ amnhĩ nhĩhkô hã mẽ ho amnhĩptàr ã hkrĩ xà kamã inhỹr pa ixkrĩ ho ixkrĩ nẽ ãhkô hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà

ně ate amnhĩ tomnuj nê amnhĩ to htỳx nẽ. Nẽ inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrà nẽ wa ixte mẽ ato amnhĩptàr ã ixkrĩ xàja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptàr o akrĩ.

²² E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Tã ãm ja pix. Na hapêx. Anẽ.

—E Juãw. Kêr ka Raxisej kamã ixkrajê mã ixkapêr ã kagà nẽ mẽ hwỳr amẽ. Nẽ kagàja piitã krĩ hkwy kamã ahpỹnhã ixkwỳjê hwỳr arẽ kê mẽ kamã harẽ nẽ ixkapêr ma. Anẽ.

Nhũm pre ã Jejus inhmã kapêr anẽ. Pa kuma nẽ ô ri mẽ piitã mẽ kãm hã kagà hpa.

4

Tĩrtũm kot mẽ ho amnhĩptàr ã hkrĩ xà jarẽnh

¹ Tã pa axte mẽmoj pumu nhũm kaxkwa hwỳr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mẽhõ kapêr tỳx xwỳnhta. Te kot pifti kakôr tỳx pyràk xwỳnhta axte inhmã kapêr nẽ inhmã:

—E amnẽ ixwỳr api pa mẽmoj nhỹrmã kot tanhmã amnhĩ nhĩpêx to hkukamã amã ho amnhĩrĩt ka omu. Anẽ.

² Hãmri nhũm Tĩrtũm Karõ tanhmã ixto nẽ ixto api pa kaxkwa kamã mẽmoj pumunh o xa. Tĩrtũm kot mẽ ho amnhĩptàr ã hkrĩ xà maatita pa pre omu. Nhũm kamã mẽhõja nhỹ. ³ Kuk kamã hirã htỳx kumrêx. Te mẽmo kên kamrêk karỳr jaxênh tỳx

pyràk. Nē kot mē ho amnhĩptàr ã hkrĩ xà puhã màxwỳxti grãgrãreja kãm hipòk nē harir pa omunh o xa.

⁴ Nhũm hkrĩ xà maati puhã mē ho amnhĩptàr o hkrĩ xà kēp 24. Kamã mē àptàr tũmjaja hkrĩ. Mē piitã ôr o mē ahkà htu nē ê jakare nē hkrĩ.

⁵ Nē Tĩrtũm hkrĩ xà maati rũm na katõtòk nē hkrakrak nē haxênh japà nē hikwỳ. Nē hkrĩ xà kapem kanê maati pixi kamã kwryt pē 7ja pòk rãhã ho kuhê. Kanēja te Tĩrtũm Karõ pyràk.

⁶ Nē hkrĩ xà kapem mẽmo te gò rax pyràkja hkarỳr jaxênh tỳx kumrēx nē nō. Te ho kàx karỳr jaxênh tỳx pyrà nē hkarỳỹre. Nē hkrĩ xà puhã mẽmoj tĩr nē kuhê pē kwat kuhê. Nē òkwa nē katut piitã hkòt no. ãm no xohtò rax kumrēx. Na pre ã mẽmoj kēp kwatja no xohtò anē pa omu.

⁷ Wamta te kot mry pē rêãwti pyràk. Nē hkòt ja te kot mòx myti pyràk. Nē hapu hã hkuk te panhĩ hkuk pyràk. No hapu hã ja te kot àanhàhti htor kaxyw hara koror pyràk.

⁸ Nē piitã hara kēp 6. Nē ì piitã kamã no. Nhũm prem Tĩrtũm mã mex o mex ã grer rãhã ho kuhê nē aa pinhkrênh kêt nē. Nē kãm grer o:

Amex o amex Tĩrtũm.

Nē axihtỳx o axihtỳx.

Nē aa ate amnhĩ tomnuj kêt kumrēx.

Amnepê mã kormã mẽmoj kêt ri ka ra arãhã ri apa. Tã arĩ arãhã ri apa xwỳnh na ka. Kot kaj aa ajapêx kêt nē.

ãm hãmri na ka hte mẽ ixto mex rãhã ho apa.

Nē amex o amex Tĩrtũm. Anē.

⁹⁻¹⁰ Nhũm prem xatã mẽ ho amnhĩptàr hkrĩ xà kamã hkrĩ xwỳnhja mẽ kot kãm “Rãhã pa xwỳnh”

anhÿr xwÿnhhta mã ã grer anhÿr o kuhê. Kãm mex o mex ã grer pê tanhmã kot mẽ ho mex to hã harê. Hãmri nhÿm mẽ àptàr tùm pê 24jaja mãânên kutã hkôn krã ho rôrôk nê hipô hpa nê hkrĩ. Nê amnhĩ krã rÿm ôr o mẽ ahkàja kwry nê hpar pê haxwÿ. Kêp mẽ õ Pahi Maati hã hã hpijaàm kaxyw wantajê pyrã nê mex o mex ã harênh o hkrĩ nê kãm:

¹¹ãm hãmri na pa htem amex o amex ã ajarê Tĩrtÿm Apê mẽ inhõ Pahi Maati na ka.

Nê apê mẽ inhõ Tĩrtÿm na ka.

Na ka pre mẽmoj piitã ho akato. Axãhpumunh tÿx nê ajamaxpêr tÿx o mẽmoj piitã amã hprãm xà hkôt ho akator pa.

Jakamã na pa htem ã amex o amex ã ajarênh anê. Mẽ ixrom axihtÿx mex kumrêx na ka hte apa Tĩrtÿm. Anê.

5

Mẽ pahte amnhĩ tomnuj pãnhã amnhĩrer xwÿnh jarênh

Juãw 1.29; Piripos 2.5-11

¹Tã pa pre arĩ te kaxkwa kamã mẽmoj pumu. Mẽ ho amnhĩptàr ã hkrĩ xà maatita kamã hkrĩ xwÿnh nhĩhkra kamã kagã pa omunh o xa. Upôk rÿm omu. No ãm axtem kagã kaxkep na pre. Nê akutã hã kagã nê menh ê ho ho htÿx xàja kêp 7.

²Hãmri nhÿm Tĩrtÿm kapêr o wryk xwÿnh xihtÿx xwÿnhja kapêr tÿx kãm kapêr o:

—E mẽ atõ na ate kagã mÿj pyr nê ho htÿx xà hpôt mã tãm? Anê.

³Hãmri nê tee ri mẽ piitã mẽ hkapi nom nhÿm ja kaxyw mẽhõ amrakati kumrêx. Kaxkwa kamã

amrakati nê pika kamã mããnên amrakati nê pika hkrak ri amrakati. Nhÿri mēhō kot kagà kaxkepta pyr nê hpôt nê omunh mã tãm xwÿnhja amrakati ho amrakati.

⁴Nhũm tee ri mēhō japêr nom mēhō pumunh kêt nê. Pa tee ri ja hã omu nê ixkaprĩ htÿx nê inhmÿr o xa.

⁵Hãmri nhũm pahi hōja ixpumu nê inhmã:

—Kwa amÿr kêt nê. E mēhō mũj pumu. Juta kanrêhã htãmnhwÿ xihtÿx xwÿnhhta. Pahi Tawi kanrêhã htãmnhwÿ te kêp mry pê rêaw xihtÿx pyræk o hihtÿx xwÿnh mũj pumu. Kot mē kãm hkurê xwÿnhjê kutã amnhĩ to htÿx nê mēmoj punuj piitã ho hapêx kaxyw mã xwÿnh jakamã tapxipix na kot kagàta hpyr nê ho htÿx xà hpôt par mã tãm. E ka omu. Anê.

⁶Hãmri pa kuma nê hwÿr rĩt nê Jejusja pumu. Kot mē pahte amnhĩ tomnuj pãnhã amnhĩrer xwÿnhhta mē ho amnhĩptàr o hkrĩ xà maati kapem xa. Mēmoj htĩr pê kwat mē àptàr tũm pê 24jê nhĩpòk ri xa. Mē kãm hkurê xwÿnhjaja kot hpĩr nhũm ra akupÿm htĩr nê xa. Nom ra axtem nê xa. àhpumunh tÿxja te kot pahi xàhpumunh pyræk. Nê hpàr kêp 7. Nê no mããnên kêp 7. Noja te Tĩrtũm Karō pyrà nê kêp pika piitã hkôt pa xwÿnh. ã Jejusja axtem nê ãm anê pa omu.

⁷Hãmri nhũm mē pahto amnhĩptàr o hkrĩ xwÿnhhta wÿr tē nê ìhkra kamã kêp kagà kaxkepta py.

⁸Hãmri nhũm mē htĩr pê kwat mē mē àptàr tũmjaja hpar pê hkôn krã ho rôròk nê hkrĩ hpa nê hipô nê hkrĩ. Piitã wiorãwti jamÿ nê ôr o xijere kamã mēhkuxwa xà jamÿ nê o hkrĩ. Nhũm Tĩrtũm

krajaja Tĩrtũm mã tanhmã amnhĩ jarẽnh to nhũm mẽ mar o hkrĩ. Te xijere kamã mẽhkuxwa xà hpãr o hkrĩ pyrà nẽ mẽ kuma.

9-10 Jakamã nhũm mẽ hkõn krã ho hkrĩ xwýnhjaja mẽ pahte amnhĩ tomnuj pãnhã amnhĩrer xwýnhhta kutã kãm grer o hkrĩ. Mẽ grer nyw o kãm gre nẽ kãm:

Na prem apĩ ka atyk o mẽ piitã mẽ kot amnhĩ tomnuj pãnhã amnhĩrer pa.

Ahpýnhã pika piitã hkõt mẽ urojê piitã hpãnhã amnhĩrer pa.

Nẽ ahpýnhã ri mẽ kapër xwýnh kwýjê piitã mẽ hpãnhã amnhĩrer pa. Atyk o mẽ kot amnhĩ tomnuj piitã hpãnhã amnhĩrer pa.

Jakamã nhũm mẽ kot akõt amnhĩ xunhwýr xwýnhjaja kęp Tĩrtũm kra nẽ ri pa.

Ka ra mẽ panhõ Tĩrtũm mã mẽ kęp patre kaxyw mẽ unhwý nhũm htem pika piitã hkõt mẽ ho amnhĩptàr o pa.

Tã atyk o ate pika piitã hkõt mẽ hpãnhã amnhĩrer jakamã kapxipix na ate kagàta pyr nẽ ho htýx xà hpõt mã tãm. Anẽ.

11 Hãmri nhũm Tĩrtũm kapër o mẽ wrýk xwýnhjaja nhýhýnh hapôj nẽ kuhê. Mẽ ohtô rax o ohtô rax. Ohtô rax o mẽ pajamaxpër jakrenh. Hãmri nẽ Tĩrtũm kot mẽ ho amnhĩptàr ã hkrĩ xà maatija wýr mra nẽ kãm hipôk pa. Nẽ mẽmoj tĩr nẽ kuhê xwýnhjê mẽ mẽ aptàr tũmjê mã hipôk pa nẽ mẽ pahte amnhĩ tomnuj pãnhã amnhĩrer xwýnhhta mã kapër.

12 Kàx pẽ kãm kapër nẽ kãm:

Ãm hãmri na pa htem amex o amex ã inhgrer o ixkuhê.

Mě ixrom axihtỳx o axihtỳx.

Ně mẽmoj piitã anhõõ.

Ně ate mẽmoj piitã hkukamã axàhpumunh par.

Ně amex o amex jakamã na pa htem amã amex pix
ã inhgrer o ri ixpa. Aně.

¹³Tã nhũm mẽmoj piitã Tĩrtũm mẽ Jejus wa kãm wa
mex o wa mex ã harẽ. Pika hkôt panhĩ nẽ mry nẽ
àk nẽ mẽmoj piitãã. Nẽ pika hkrak ri nẽ gô hkrak ri
mẽmoj piitãã. Nẽ mẽ htykjaja. Nhũm mẽ piitã wa
kãm wa mex o wa mex ã wa harẽ nẽ wa kãm:

E ate mẽ ixto amnhĩptàr ã akrĩ xà kamã akrĩ
xwỳnh mẽ kot mẽ ixte amnhĩ tomnuj pãnhã
amnhĩrer xwỳnh mẽ war amex o wa amex.

Ně war axihtỳx o war axihtỳx.

Ně war axàhpumunh o war axàhpumunh.

Na pa htem ã war ajarẽnh anhỹr rãhã ixpa ho ixpa.
Aně.

¹⁴Hãmri nhũm mẽmoj tĩr pê kwatjaja mẽ kuma nẽ
mẽ kãm:

—Nà ãm hãmri na ka mẽ ã wa harẽnh aně.

Wa mex o wa mex kumrẽx. Aně.

Hãmri nhũm mẽ àptàr tũmjaja Tĩrtũm mẽ Jejus wa
hpar pê hkõn krã ho rôrôk nẽ hkrĩ hpa nẽ haxwỳja
wa kãm wa mex o wa mex ã wa harẽ.

6

Kagà ho htỳx xà pê 7 jarẽnh

*Matẽwre 24.3-14; Sikũn Tesarõn 2.3; Wam Juãw
2.18*

¹Tã pa arĩ kaxkwa kamã mẽ pahte amnhĩ tom-
nuj pãnhã amnhĩrer xwỳnh kot tanhmã amnhĩ
nhĩpêx to hã omunh o xa. Nhũm kagà kaxkepta py
nẽ wam ho htỳx xà pôt. Hãmri nhũm mẽmo tĩr pê

kwatjê hõja kapër tỳx kumrẽx. Te na katõtõk tỳx pyràk o mēhõj mã kapër nẽ kãm:

—E amnẽ mẽ ixwỳr tẽ. Anẽ.

² Hãmri nhũm kawar jakajre nhỹhỹnh hwỳr hpõx o tẽ. Nhũm mēhõja õ kuxê mỳ nẽ hã nhỹ nẽ tẽ. Hãmri nhũm nhãm mēhõja hwỳr tẽ nẽ kãm pahi hã mẽ ahkà htu. Hãmri nẽ kãm tanhmã kapër to nhũm kuma nẽ mẽ kot kãm Tirtũm mẽ Jesus wa kurê xwỳnhjê nhĩmex par kaxyw hakẽx nẽ ma pika hwỳr tẽn wrỳ.

³ Hãmri nhũm mẽ pahte amnhĩ tomnuj pãnhã amnhĩrer xwỳnhja wam kagà ho htỳx xàta kõt axte ja põt. Hãmri nhũm mēmoj tĩr pẽ kwatjê hõja axtem mēhõj mã kapër nẽ kãm:

—E amnẽ mẽ ixwỳr tẽ. Anẽ.

⁴ Hãmri nhũm kawar kamrêk mẽ hwỳr hpõx o tẽ. Nhũm mēhõ hã nhỹ nẽ tẽ. Nhũm nhãm mēhõja kãm wapo gõ nẽ ma pika hwỳr htẽm nẽ wrỳk kaxyw hano. Kot hwỳr wrỳk nẽ pikap mẽ pa xwỳnhjê kurê huk kaxyw. Mẽ kot axpẽn par kaxyw ma mẽ hwỳr kumẽ. Hãmri nhũm kuma nẽ wapota py nẽ hakẽx nẽ ma mẽ hwỳr tẽn wrỳ.

⁵ Hãmri nhũm mẽ pahte amnhĩ tomnuj pãnhã amnhĩrer xwỳnhja kagà ho htỳx xà hõ põt. Na pre ra ho axkrut nẽ hpõt tã hpãnhã axte hkõt ja põt. Hãmri nhũm mēmoj tĩr pẽ 4jê hõta mēhõj mã kapër nẽ kãm:

—E amnẽ mẽ ixwỳr tẽ. Anẽ

Hãmri nhũm kawar tykre mẽ hwỳr hpõx o tẽ. Nhũm hã ỳr xwỳnhja mēmoj to peja xà hã parãs mỳ nẽ o tẽ.

⁶ Hãmri nhũm mẽ htĩr pẽ kwatjê rũm mēhõja kãm kapër nẽ kãm:

—E kêr ka ma pika hwÿr mẽ hwÿr tẽn wrÿ nẽ mẽ kãm myt pyxi kamã mẽ àpênh pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm òr o apa. Nom mẽ apkur xà hã orti nẽ wĩhti ka mẽ kêp tanhmã ho hkêt nẽ. Anẽ.

Hãmri nhũm kuma nẽ hakẽx nẽ ma tẽn mẽ hwÿr wrÿ.

⁷ Tã nhũm mẽ pahte amnhĩ tomnuj pãnhã amnhĩrer xwÿnhja axte kagà ho htÿx xà hõ hpôt. Na pre ra ho axkrunẽpxi nẽ hpôt tã hpãnhã axte hkôt ja pôt. Hãmri nhũm mẽmoj tĩr pê kwat kot hitep xwÿnhja mẽhõj mã kãm:

—E annẽ mẽ ixwÿr tẽ. Anẽ.

⁸ Hãmri nhũm kawar rãràãre mẽ hwÿr hpôx o tẽ. Nhũm mẽhõ hã nhÿ nẽ tẽ. Hã ÿr xwÿnh nhĩxi na pre kêp “Mẽhtyk” anẽ. Hãmri nhũm mẽhõja kãm kapër nẽ kãm:

—E ma pika hwÿr wrÿ nẽ tanhmã mẽ ho kê mẽ ohtô nẽ tanhmã amnhĩ to nẽ axkaprã. Kê mẽ hkwÿjaja pijapu kamã axpên pa nẽ mẽ hkwÿjaja prãm xàj ty nẽ mẽ hkwÿjaja tanhmã à htÿx kute kamã ty. Nẽ mẽmo mry xoprêja mẽ hkwÿjê pa. E ma mẽ hwÿr wrÿ nẽ tanhmã mẽ ho ho apa. Anẽ.

Hãmri nhũm kuma nẽ hakẽx nẽ ma pika hwÿr tẽn wrÿ. Hãmri nhũm mẽ htykjê papxàja tanhmã amnhĩ to nẽ te kot hã jêt nẽ ma hkôt mör nẽ pika hwÿr wrÿk pyræk pa pre arĩ omunh o xa.

⁹ Hãmri nhũm mẽ pahte amnhĩ tomnuj pãnhã amnhĩrer xwÿnhja axte kagà ho htÿx xà hõ hpôt. Na pre ra ho kwat nẽ hpôt tã hpãnhã axte ja pôt. Hãmri nẽ hpôtja kôt pa ra mẽ kot Tĩrtũm mã mẽmoj nhõr xà hã mēsti pumu. Nẽ hkrak ri mẽ hkarõjê pumu. Mẽ kot hkwÿjê hkôt ri mẽ kãm Tĩrtũm kapër

jarēnh nē Jejus kēp mē ò Pahihtī hā harēnh o pa nhūm mē kot hā mē hpar xwýnhjê karōja pa pre mē omu. Nhūm mē mēsti hkrak ri amnhī to Tīrtūm wýr o hkrī. ¹⁰ Kýx pê kām kapēr nē kām:

—Ām hāmri amex o amex Pahi Maati. Aa ate mēmoj tā tanhmā amnhī to axêx to hkêt kumrêx. Kwa xà kot kaj tokyx pika hkôt mē kot mē inhīmex xwýnhjaja tanhmā mē ixtā mē ho nà? Anē.

¹¹ Hāmri nhūm mēhōja mē hwýr tē nē mē kām mē ê jakajre gō nhūm mē hagjê. Hāmri nhūm mē kām:

—E mē mamrī atar akôkôt o akrī. Koja Tīrtūm kormā tanhmā mē kot mē atomnuj xwýnhjê ho hkêt nē. Kê mē axte mē apyrà nē mē akwýjê nhīmex măn. Koja mē Tīrtūm jamaxpēr xà hkôt axte mē akwýjê pa nhūm rī kormā mē ato hpim-ràatā tanhmā mē atā mē hipêx to. Jakamā e mē atar kutêp māmri akôkôt o akrī. Anē.

¹² Hāmri nhūm mē pahte amnhī tomnuj pānhā amnhīrer xwýnhhta axte kagà ho htýx xà hō hpôt pa omu. Na pre ra ho 5 nē hpôt tā hpānhā hkôt axte ja pôt. Hāmri nhūm pika htertēt týx kumrêx. Nē myyti ahtyk nē mytwrýre te kēp mē hkamrô kamrêk týx pyrà nē ajêt.

¹³ Nē kanhêti tanhmā amnhī to nē axrê nē pikap rôrôk pa. Te kôk xàpêr týx nē kot pàrerekre kormā ràx tā kot kām hikranh par pyrà nē piitā rēnh pa nhūm rôrôk.

¹⁴ Hāmri nhūm kaxkwaja te kagà kaxkep pyrà nē amnhī to kaxkep o tē. Nē pika piitā hkôt kēn prêk nē hixêt prêk maati piitā te hkrī xà rŭm hapôx nē mrrar nē nhām hkrī pyrāk. Nhūm gô hipôk piitā haxwýja te hikwý xà rŭm hapôx nē mrrar nē nhām hikwý pyrāk. Pika htertēt týx nhỹ hā ã mēmoj

amnhĩ nhĩpêx anê. ¹⁵ Hãmri nhũm pika hkôt mẽ piitã tee ri mẽmoj ã amnhĩ nhĩpêx anhÿr ã omu nê kãm ma nê htertet tÿx kumrêx. Mẽ ho amnhĩptâr xwÿnhjaja nê pôristi krãhtũmjaja nê mẽ kot amnhĩ to rũnh xwÿnhjaja nê mẽ hihtÿx xwÿnhjaja nê mẽ kãm mẽ àpênh xwÿnhjaja nê amnhĩ mã mẽ àpênh xwÿnhjaja. ãm piitã mẽmoj ã kot amnhĩ nhĩpêx anhÿr ã omu nê tee ri amnhĩ kukamã hamaxpêr nê kãm ma ho kãm ma. Hãmri nê hpimxur kaxyw ma kên prêk kre japêr o hprôt nê mra. ¹⁶⁻¹⁷ Hãmri nê amnhĩ to kên prêk wÿ nê kãm:

—Kwa na ra mẽ ixto amnhĩptâr ã hkrĩ xà maati kamã hkrĩ xwÿnh mẽ kot mẽ ixte amnhĩ tomnuj pãnhã amnhĩrer xwÿnhhta wa mẽ ixkamã gryk tÿx kumrêx. Ra wa kot tanhmã mẽ ixtomnuj to xà hã arĩgrota kato. Kojã wa mẽ ixtomnuj tÿx nê pa mẽ kutã hkêt nê. Kwa tokyx mẽ inhĩpy arôrôk nê wa kêp mẽ ixto amũxu. Anê.

7

Mẽ kot Tĩrtũm mã hkrajê kagà Apokarip 9.4

¹ Tã pa arĩ kaxkwa kamã mẽmoj pumu. Nhũm Tĩrtũm kapêr o mẽ wrÿk xwÿnh pê kwatja piitã ahpÿnhã pika nhĩtep xà hkôt kôk jatur xà hã hamÿ nê ho kuhê. Pika piitã hkôt kôk hpinhkrênh par nê àpêr kêt nê gô xujanãr kôt àpêr kêt kaxyw hatur xà hã hamÿ nê ho kuhê. Nê pã piitã hkôt àpêr nê tanhmã pĩ hkwÿ ho pymaj nhũm mẽ ã amnhĩ nhĩpêx anê nê nê hatur xà hã hamÿ nê ho kuhê.

² Na pre ra Tĩrtũm ja hã mẽ kãm karõ nê mẽ kãm:

—E kêr ka mẽ ma pika hwÿr wrÿ nẽ pika nẽ gô xujanãrja tanhmã wa homnu hto. Anẽ.

Hãmri nhũm mẽ kuma nẽ hwÿr wrÿ nẽ kormã nẽ kôk ho htÿx. Hãmri nhũm Tĩrtũm kapẽr o wrÿk xwÿnhjẽ hõja myt japôx xà rũm mẽ hwÿr hpôx o tẽ. Nẽ ãhkra kamã mẽ kot Tĩrtũm kra hã mẽ hixi jarẽnh xà hã kagàta py nẽ o tẽ. Hãmri nẽ kàx pẽ mẽ kot pika mẽ gô xujanãr homnu mã xwÿnhjẽ mã kapẽr nẽ mẽ kãm:

³—Kwa taxy pa Tĩrtũm krajẽ nhõkrã kagà hpa mãn. Kêr ka mẽ omu nẽ mẽ tapxipixjaja tanhmã mẽ ho hkêt nẽ. Anẽ.

⁴⁻⁸ Hãmri nẽ mẽ hkagà pa. Ahpÿnhã Ijaew pigrãnh xwÿnhjaja mẽ ho ohtô rax kumrẽx nẽ tanhmã mẽ hkagà hto. Pa tanhmã mẽ kute hã mẽ harẽnh ma nhũm xep mẽ ohtô rax kumrẽx.

Juta kamã mẽ kêp 12.000.

Nẽ Rupẽ kamã mẽ kêp 12.000.

Nẽ Gax kamã mẽ kêp 12.000.

Nẽ As kamã mẽ kêp 12.000.

Nẽ Natari kamã mẽ kêp 12.000.

Nẽ Manase kamã mẽ kêp 12.000.

Nẽ Simeãw kamã mẽ kêp 12.000.

Nẽ Rewi kamã mẽ kêp 12.000.

Nẽ Isaka kamã mẽ kêp 12.000.

Nẽ Jepurõ kamã mẽ kêp 12.000.

Nẽ Juje kamã mẽ kêp 12.000.

Nẽ Pẽjamĩ kamã mẽ kêp 12.000.

Ã mẽ ohtô rax kot anhÿr. Hãmri nẽ mẽ piitã mẽ pikamÿr par kãm mẽ kêp 144.000. Piitã kêp Apraãw kanrẽhã htãmnhwÿ na pre mẽ. Tã ã axpẽn kaxyw mẽ ohtô rax kumrẽx kot anhÿr tã nhũm mẽ hkagà pa.

Tĩrtũm kra hkwyjê jarẽnh
Apokarip 14.1-5

⁹ Tã pa axtem mẽmoj pumu. Nhũm mẽ ohtô rax nẽ Tĩrtũm nhõ krĩ kamã kuhê. Ahpỹnhã ri pika piitã hkôt mẽ urojaja. Nẽ ahpỹnhã ri mẽ kapêr xwýnhjaja nhũm prem pika piitã kurũm kot mẽ ho amnhĩptàr ã hkrĩ xà maatija kamã hkrĩ xwýnh pê Tĩrtũm mẽ mẽ pahte amnhĩ tomnuj pãnhã amnhĩrer xwýnhja wa kutã kuhê. Mẽ ohtô rax kumrêx jakamã pa tee ri mẽ piitã mẽ ho kôta hpar prãm kaprý. Nẽ piitã ê jakare kamã kuhê. Nẽ hkĩnh nẽ hkĩnh xàj pô hkwy jamý nẽ ho àpêr o kuhê. ¹⁰ Hãmri nẽ kýx pêê Tĩrtũm mẽ Jesus wa kãm kapêr nẽ wa kãm:

Hêxta waa nẽ. War amex o war amex Pahi Maati. Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nẽ.

War ajamẽ mẽ ixkamã axukapri rãhã ho apa xwýnh na ka wa.

Jakamã pa mẽ inhmex nẽ war awýr api nẽ war akuri inhmex nẽ ijamakêtkati nẽ ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anẽ.

¹¹ Hãmri nhũm Tĩrtũm kapêr o mẽ wrýk xwýnhjaja Tĩrtũm krĩ xà mã hipôk nẽ hkõn krã ho rôrôk nẽ hkrĩ hpa. Nẽ mẽ àptàr tũmjê mẽ mẽ htir nẽ kuhê xwýnhjaja mẽ ìhkô hã kãm hipôk nẽ wam tajê pyrak nẽ hkõn krã ho rôrôk nẽ hkrĩ. Hãmri nẽ mẽ ohtô kot Tĩrtũm mẽ Jesus wa kãm kapêr ã mẽ kuma hãmri nẽ Tĩrtũm ã hpijaàm kaxyw hpar pê htu mýr pê hikwý hpa nẽ kãm mex o mex ã harê nẽ kãm:

12 “Ăm hămri na mẽ ã ajarēnh anē Tĩrtũm. Amex o amex.

Na ka hte mẽ ixto mex o apa.

Mẽ ixrom axàhpumunh o axàhpumunh.

Ně mẽ ixrom axihtỳx o axihtỳx.

Jakamã na ka hte mẽ ixpiitã mẽ ixto mex kumrễx rãhã ho apa.

Ă ate anhỳr rãhã o rãhã jakamã na pa htem amã amex o amex ã ajarēnh rãhã ho ixpa.” Anế.

13 Hămri pa mẽ omunh o ixãm rôm nhũm mẽ àptàr tũmjê hõja ixwỳr tễ nễ mẽ ê jaka kamã mẽ hkĩnh xàj pô jamỳnh nễ ho kuhê xwỳnhjê hã ixkukja nễ inhmã:

—E măn ate mẽ ê jakare kamã mẽ kuhê xwỳnh mũjjê pumunh nà? Tanhmã na prem amnhĩ nhĩpêx to nễ amnế api? Xà ate mẽ omunh? Anế.

14 Hămri pa kuma nễ kãm:

—Nà ixte mẽ omunh kêt. Kêt ka na ixrom ate mẽ omunh. Anế.

Hămri nhũm inhmã mẽ harēnh o:

—Nà na pre mẽ hkwỳjaja Jejus ã mẽ homnuj tỳx kumrễx nễ mẽ kupa. Tã mẽ kêp Jejus kwỳ jakamã na pre mẽ nễ mẽ kot amnhĩ tomnuj o hapêx nễ te amnhĩ kamrô ho mẽ nễ mẽ kot amnhĩ tomnuj piitã kuhõnh par pyràk o mẽ hipêx. Jakamã nhũm mẽ ê jaka kamã mex nễ hkĩnh tỳx nễ pa.

15 Nễ Tĩrtũm kot mẽ pahto amnhĩptàr ã hkrĩ xà maati kutã kãm mex o mex ã harēnh rãhã ho kuhê.

Na hte mẽ ho mex rãhã ho pa. Mễ hkôt pa ho pa jakamã koja mẽmoj tanhmã kêp mẽ ho hkêt nễ.

16-17 Nễ mẽ pahte amnhĩ tomnuj pãnhã amnhĩrer xwỳnh kot Tĩrtũm krĩ xà maati kamã ãm

xwỳnh̄ta na hte mẽ ham̄r mex rãhã ho mẽ
hkôt pa.

Te mẽ kot mẽ hkrit jam̄r mex pyræk.

Nẽ te mẽ kot mẽ hkrit kôm o pa nhũm htĩr nẽ pa
pyræk.

Koja mẽ kuri htĩr tũm nẽ hkôt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htỳxja axte mẽ hkà ho hxêt kêt nẽ.

Koja Tĩrtũm te mẽ kot mẽ hkra no kagô nhĩnhĩnh
par pyræk o mẽ hipêx nhũm mẽ axte hkaprĩ
nẽ mỳr o pa hkêt nẽ.

Pãnhã hkĩnh nẽ mex rãhã kuri pa ho pa. Anẽ.

8

Kagà kaxkep o htỳx xà kot hitep jarẽnh

¹ Tã pa arĩ kaxkwa kamã mẽmoj pumu nhũm
mẽ pahte amnhĩ tomnuj pãnhã amnhĩrer xwỳnhja
kagà kaxkep o htỳx xà kot hitepta pôt. Hãmri nhũm
kaxkwa kamã mẽmoj piitã hpinhkrênh pa nhũm
mẽhõ kapêr kêt kumrêx. Nẽ hpinhkrênh par o ra
hã ahtũm ry mex nẽ.

² Hãmri nhũm Tĩrtũm kutã kapêr o wrỳk xwỳnh
pê 7 nẽ mẽ kuhê xwỳnhjaja. Nhũm kapêr o wrỳk
xwỳnhjê hõja mẽ hwỳr tẽ nẽ mẽ piitã mẽ kãm pifti
gõ.

³⁻⁴ Hãmri nhũm kapêr o wrỳk xwỳnhjê hõja ôr o
xijere py nẽ Tĩrtũm mã mẽhkuxwa xà ho xêt xà hã
mês kunĩhti hwỳr o tẽ. Mẽ ho amnhĩptar ã hkrĩ
xà maati kutã ôr o mêtija wỳr o tẽ nẽ kuri o xa.
Hãmri nhũm mẽ kãm kamã mẽhkuxwa xà hkwy
runh rax nẽ nhũm mêtĩ hã ho xêt o xa. Rôm nhũm
Tĩrtũm krajaja Tĩrtũm mã tanhmã amnhĩ jarẽnh to.

Jakamã nhũm mēhkuxwa xà xêť kũm mẽ mẽ kot Tĩrtũm mã amnhĩ jarēnh xàja mẽ nhũm ahkà nē Tĩrtũm kapēr o wrỳk xwỳnh nhĩhkra kamã xijere rũm Tĩrtũm kutã kàx mã àpir o pa.

⁵ Hãmri nhũm kapēr o wrỳk xwỳnhja xijere kamã kuwy hpôk kwỳ ho nỳt nē ahpar mã pika hwỳr kumē nhũm ma tē nē pikap tēm nhũm pika htertet tỳx nē kamã na katôtôk nē haxēnh nē hkrakrak.

Mẽ kot pifti kakôr ã mẽ harēnh

⁶ Hãmri nhũm Tĩrtũm kapēr o wrỳk xwỳnh pē 7 kot pifti jamỳnh xwỳnhjaja ra kot pafti kakôr mã.

⁷ Jakamã nhũm wamta ô pifti kakô nhũm na mẽ te kot jêť krã jakot pyràk xwỳnh mẽ kuwy te kot mẽmo kamrô kamrêk pyràk xwỳnhhta pikap rôrôk pa. Nē nhỹhỹnh pika hkwỳ ho rax nē ho kaxàr pa. Nē pôti nē akunĩ hkwỳ ho rax kumrêx nē ho kaxàr pa. ⁸ Hãmri nhũm wam ãm xwỳnh nhĩjuk ri ãm xwỳnhja ô pifti kakô nhũm mẽmoj te kēn krã hprêk pôk pyrà nē kaxkwa rũm ahpar mã tē nē gô xujanâr nhĩkjê kamã hpôk rãhã tēn mrô. Hãmri nhũm gô nhĩkjê kamã gôja mẽmo hkamrô hã amnhĩ jahkre hpa. ⁹ Jakamã nhũm gôx kãm mẽmoj htĩr nē ri mrar xwỳnhjaja pikaprâr pa. Nē gôx kãm pàr gô krãhkà hã pa xwỳnhja haxwỳja gjêx pa. Nē pàr kãm mẽ pa xwỳnhjaja haxwỳja hagjê nē pikaprâr pa. No nhũm gô mex kãm pàr kãm mẽ pa xwỳnhjaja mẽ kurom arĩ htĩr nē.

¹⁰ Tã nhũm wam ãm xwỳnhhta wa hijuk ri ãm xwỳnhja ô pifti kakô. Hãmri nhũm kanhêti rax kumrêxja axta nē hpôk o ma ahpar mã tēn pikap tēm nē pyhti nē hino hkwỳ ho ohtô nē homnu hpa.

¹¹ Kanhêti nhĩxi pē na pre “mẽmoj xỳ xà” anhỹr

jakamã nhũm tēm nē pyhti nē hino hkwỳ ho ohtô nē homnu pa. Nhũm prem hwỳr mra nē hkwỳ janhi nē ho ixkô nhũm ò nē nhũm mẽ ohtô nē ho ixkô nē axkaprã.

¹² Hãmri nhũm hpãnhã Tĩrtũm kapēr o wrỳk xwỳnhjê hõja õ pifti kakô. Na pre ra ho axkrunēpxi nē hkakôr tâ hpãnhã ra axte hõ ja kakô. Hãmri nhũm mẽhõja tẽ nē myyti kura nhũm hkwỳ ahtyk nē hirã hkêt nē. Nhũm mytwrỳre nē kanhêti mã ho anē nē myyti pyrã nē hkwỳ ahtyk nē hirã hkêt nē harir. Jakamã nhũm kamãt kãm hirã mex kêt nē. Nē arĩgro hã myytija haxwỳja hirã mex kêt nē.

¹³ Hãmri pa kaxkwa kamã àànhàhti pumu nhũm kỳx pē ri htor o pa pē tanhmã kapēr to nē kapēr o:

—Hêxta waa nē. Kormã kot pifti kakôr xwỳnhjaja axkrunēpxi nē kormã hkakôr kêt nē. Koja mẽ tokyx hkakô nhũm pika hkôt ri mẽ pa xwỳnhjaja amnhĩ xà htỳx kamã hamak tỳx o pa. Na pa tee ri mẽ hkukamã ijamaxpēr nē inhmã mẽ hkaprĩ htỳx nē. Hêxta waa nē. Koja mẽ omnuj tỳx kumrêx. Anē.

9

¹ Tã pa axte mẽmoj pumu. Nhũm Tĩrtũm kapēr o wrỳk xwỳnhjê hõ õ pifti kakô. Na prem ra ho kwat nē hkakôr tâ hpãnhã axte hõja ja kakô. Hãmri nhũm kanhêti hõ axta nē pikap tēm kurê kumrêx nhũm mẽhõja omu nē hwỳr tẽ nē kãm mẽmoj tâ saf gõ. Satanasti jagjênh xà hã ahkre xupỳm o htỳx xà hã safja nhũm kanhêti mã kugõ.

² Hãmri nhũm kupy nē ahkrehtita wỳr o tẽ nē kahê xà mẽ nhũm kurũm kuwy hkũm hapôx rax

ně. Ně ma kàx mã àpir o pa ně myyti hpro hpa nhũm kamàt kô rax kumrêx.

3-11 Ně kuwy hkũmja rũm mẽmoj te krit pyràk xwỳnh kwỳjaja pikap rôrôk ně kuhê. Te kot krit pyràk tâ mẽ hkuk te panhĩ hkuk pyràk. Ně mẽ hkrã hkĩ te mẽnijê hkrã hkĩ japjê pyràk. Ně ôr o mẽ ahkà jagjê. Ně mẽ wa japjê htỳx kumrêx. Te rêãwti xwa japjê pyràk. Ně kàx o mẽ hinô hkà. Nhũm mẽ htor o hara hkoko htỳx o mra. Te ho kawar xohtô pijapu kaxyw kot mẽ hkjênh xà kamã mẽ htur ně mẽ hkjênh o hprôt nhũm hkoko htỳx pyràk. Ně mẽ hkamnhwỳr o pa kaxyw mẽ hanhyja te kot makre janhy pyràk. Ǻ kriitija kot anhỳr. Ně te nhỹhỹm oprê kaxyw nojarêt ně mẽ hkrit kawar hã hikukrêx mex rênh pyràk. Mẽõ pahija ahkre xupỳmta kamã kêp mẽ hkrãhtũm. Ijaew kapêr kãm hixi pê “Apatô.” No Gres kapêr kãm kêp “Aporiãw.” No mẽ pakapêr kãm kêp “mẽ hpar o pa xwỳnh.” Hãmri nhũm Tĩrtũm kriiti mã kapêr ně mẽ kãm:

—E kêr ka mẽ ma pika piitã hkôt te makre kot amnhĩ nhĩpêx pyrã ně ri mẽ hkôt mẽ hkamnhwỳr o apa. Ǻ amnhĩ nhĩpêx anhỳr o mẽ atã mytwrỳ pê sĩk. No ãm kêr ka mẽ hpar kumrêx kêt ně. Ǻm mẽ kot amnhĩ xà htỳx kãm hamak pix kaxyw tanhmã mẽ ho ho apa. Te makre kot mẽ hkamnhwỳr nhũm à htỳx kumrêxta pyràk. No mẽ ate mẽ hkamnhwỳr nhũm mẽ hkamnhwỳr xàja koja à htỳx o makre kot mẽ hkamnhwỳr jakre. Nom ra mẽ kot Tĩrtũm kra hã mẽ hkagà xwỳnhjaja kêr ka mẽ omu ně ãm mẽ omu ně tanhmã mẽ ho hkêt ně. Mẽ kêp ixkwỳ na mẽ. Ně pô ně prãt ka mẽ ãm omu ně tanhmã ho hkêt ně. Ǻm mẽ kot panhĩ nhõkrã kagà hkêt xwỳnh

pixjaja ka ã mẽ hipêx anhÿr o ri mẽ hkôt apa. Nom kêr ka mẽ hpar kêt nê. Kê mẽ tee ri amnhĩ xà hã maj kãm tokyx htyk nê hapêx prãm hkaprÿ ho pa. E ma mẽ hwÿr mra nê ã mẽ hipêx anhÿr o ri apa. Anê.

Hãmri nhũm mẽ kuma nê ma mẽ hwÿr mra.

¹² Na ra pika hkôt wam mẽ homnu xà pyxi nê hapêx. No ãm arĩ hamẽxkrut.

¹³ Jakamã nhũm Tĩrtũm kapêr o wrÿk xwÿnhjê hõja axte õ pifti kakô. Na prem ra ho sĩk nê hkakôr tã axte hkôt hõja hkakô. Nhũm Tĩrtũm kutã ôr o mêsti rũm mēhõja tanhmã kapêr to. Mēsti janhá rũm kapêr. ¹⁴Pifti kakôr xwÿnhnta mã kapêr nê kãm:

—E na ra mẽ kot mẽ hkwÿjê nhĩmex ã arĩgrota kato. Jakamã kêr ka ma pyhti pê Erax wÿr wrÿ nê gô mÿ ri Satanasti mã mẽ àpênh xwÿnh pê kwatja pumu. Na prem ra mẽ hpa hpre nhũm mẽ gô mÿr ri arĩ hkrĩ ho hkrĩ. Ka mẽ omu nê mẽ kãm mẽ hpa hpre xà hpôt pa kê mẽ ma mẽ hkôt ri mẽ hpar o pa. Anê.

¹⁵ Na pre ra Tĩrtũm mẽ kot mẽ hkwÿjê nhĩmex o pa kaxyw mẽ kurê nê gô mÿ ri mẽ unhwÿ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwÿnhnta mã mẽ harēnh anê nhũm kuma nê ma tē nē mẽ hwÿr wrÿ nē mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nê mẽ ho ohtô rax kumrēx nē mẽ himex. ¹⁶ Nē ma amnhĩ kôt pôristi ho ohtô rax nē o pa. Piitã kawar ã hkrĩ nē mẽ hkôt hprôt nē hkoko ho mra. Mē kēp 200.000.000 hã mẽ harē pa mẽ harēnh ma. Mē ohtô rax o mẽ ohtô rax.

17 Na pa pre arĩ te ixpimtir kãm mẽ omunh pyræk. Nhũm kawar ã mẽ hkrĩ xwỳnhjaja. Mẽ hinô kàja axtem kàx o. Nẽ hkamrêkja te kuwy hpòk kamrêk pyræk. Nẽ ràràrja te mẽ hkurôt kane xà pẽ ãsòf ràràr pyræk. Nẽ kakrã htyk. ã kàx o mẽ hinô hkà kot anhỳr. Nẽ mẽ hkrit kawarti hkrãja te rêãwti krã pyræk. Nẽ mẽ hakwa rũm kuwy hpòk mẽ ãsòfti mẽ kuwy hkũm axpẽn kôt hapôx o pa. 18-19 Nẽ kawarti jamy axtem te kệp kagã xoprê hkrã pyræk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpòk mẽ ãsòfti hapôx xwỳnhhta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrêx nẽ mẽ himex.

20-21 Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwỳjê hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprõ nẽ mjên o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xy hto ho pa. ã htỳx ri amnhĩ nhĩpêx anhỳr o pa nẽ kãm urer kêt nẽ. ãm Satanasti hkôt pix mã ri amnhĩ nhĩpêx o pa. Nẽ amnhĩm sãnti hkwỳ nhĩpêx. Pĩ ho hipêx nẽ kàx o hipêx nẽ kên o hipêx. Nẽ hipêx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrar nẽ mẽ ho utàr kaxyw mo hte? Na htem arĩ ã amnhĩ to hwỳr kaprỳ anhỳr o pa.

10

Kagà kaxkep grire jarěnh

¹ Tã pa arĩ mẽmoj pumu. Nhũm axte Tĩrtũm kapẽr o wrỳk xwỳnh xihtỳxjê hõja pika hwỳr wrỳk o tẽ. Nẽ êja kakrã ho na pre. Nẽ hkrã mỳ ri màxwỳxti ajêt. Nẽ hkuk te myt no kamã hirã htỳx pyrãk. Nẽ akutã hte kamã te kuwy hpõk pyrãk. ² Nẽ ãhkra kamã kagà kaxkep grire ra pipõt nhũm ma o tẽ nẽ o wrỳ nẽ o xa. Nẽ gô xujanãr kãm upõk rũm hte xãm nẽ kỳx pẽ amgrã kamã apke rũm hte xãm nẽ o xa pa ixprĩ hã omu.

³ Hãmri nhũm kàx pẽê amỹra. Te rãaw hkàr tỳx pyrãk. Nhũm hpãnhã kaxkwa kamã mẽhõja kãm kapẽr. Te na katõtõk o 7 wês pyrãk pa ixprĩ hã tanhmã kapẽr to hã kuma. ⁴ Hãmri nẽ ra mẽ amã ã kagà kaxyw nhũm mẽ ja nẽ inhmã kapẽr nẽ inhmã:

—Kwa nà kwarĩ ja kot kaj hã kagà hkêt nẽ. ãm ja pix kot kaj akwỳjê mã hã kagà hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagà hkêt nẽ. ãm papxipix kuma nẽ ri hã ixpa.

⁵ Tã nhũm Tĩrtũm kapẽr o wrỳk xwỳnh kot gô xujanãr kãm upõk rũm hte xãm nẽ apke amgrã kamã ãm xwỳnhta hãmri Tĩrtũm nhỹ hã kapẽr kaxyw nẽ kànhmã ãhkra pẽ. ⁶⁻⁷ Tĩrtũm pẽ kaxkwa nẽ pika nẽ gô xujanãr o kator nẽ kamã kot mẽmoj piitã ho kator xwỳnhja. Nẽ htĩr rãhã nẽ pa ho pa xwỳnhja. Nhũm ã hã kapẽr nẽ kapẽr o:

—E hãmri. Amnepẽ mã na pre Tĩrtũm ã hã mẽ kãm kapẽr o ri mẽ pa xwỳnhjê mã tanhmã amnhĩ kukamã amnhĩ jarẽnh to. Tanhmã kot pika piitã hkõt mẽ pa xwỳnhjê nhĩpêx to hã amnhĩ jarẽ. Nẽ mẽmo arĩgro hã mẽ kot amnhĩ tomnuj mỳrapê

tanhmã kot mẽ hipêx to hã mẽ hkukamã mẽ hã amnhĩ jarê. Tã ra ã mẽ hipêx anhÿr xà hã arĩgro kato. Jakamã koja kapêr o wrÿk xwÿnh kot hitepta õ pifti kakõ hãmri nhũm mẽmojja ã amnhĩ nhĩpêx anhÿr kurê kumrêx. ãm hãmri na pa mẽ amã ja jarê. Anê.

⁸ Pa mar o ixãm rôm nhũm wam inhmã kapêr xwÿnhhta axte inhmã kapêr nê inhmã:

—E ma pika hwÿr wrÿ nê gô xujanãr kãm upôk rũm hte xãm nê amgrà kamã apke rũm hte xãm xwÿnhhta wÿr tẽ nê kêp kagà kaxkep grire pipôt xwÿnhhta py. Anê.

⁹ Hãmri pa kuma nê ma hwÿr wrÿ nê hã kuwÿ nhũm inhmã kugõ nê inhmã:

—E mĩ. Apy nê akrê. ànhre. Te kot menh xành pyràk. Nom kot kaj akrê nê anhõhy xà. Nom mãmri apy nê akrê. E mĩ. Anê.

¹⁰ Hãmri pa kêp kupy nê hkaki nhũm ànhre. Pa hkrêr pa hãmri nê inhõhy xà kurê kumrêx.

¹¹ Hãmri nhũm kot inhmã õr xwÿnhhta inhmã:

—Nà ãm hãmri na ka apy nê akrê. Jakamã kêr ka ano ho ate mẽmoj piitã omunh xwÿnhja nê ajamak o ate mẽmoj mar xwÿnhja nê ate tanhmã Tĩrtũm kapêr mar toja ka piitã hã kagà hpa. Hãmri nê ate omunh xà hkôt akwÿjê mã piitã harênh o apa. Mẽ kot nhÿrmã Tĩrtũm kot tanhmã mẽ piitã mẽ hipêx to hã harênh mar kaxyw. Ahpÿnhã ri pika piitã hkôt mẽ urojê piitã koja nhÿrmã ã mẽ hipêx anê. Ahpÿnhã ri mẽ kapêr xwÿnh piitã. Nê mẽ õ pahijaja. ãm mẽ piitã koja nhÿrmã ã mẽ hipêx anê. Anê.

11

Tirtûm nhỹ hã kapêr xwỳnh pijakrut wa harênh

¹ Tã nhũm mēhōj inhmã mēmoj to mīdi xà hã pī ryre gō nē inhmã:

—E ja py nē Jerujarē hwỳr wrỳ nē kamã Tirtûm mã amnhĩ jarēnh xà hã ixkreja o mīdi. Nē ixkre kamã amnepēm mē kot amnhĩ tomnuj pãnhã Tirtûm mã ôwēhti nhōr xà hã mēstita mã ho anē nē ho mīdi. Nē ixkre kamã mē kot Tirtûm mã amnhĩ jarēnh o mē hkrĩ xwỳnhjaja ka aprĩ hã mē ho kōta.

² —No ixkre kapem pikaja ka ho mīdi hkêt nē. Ra Tirtûm kot mē kot amnhĩ tomnuj xwỳnhjê mã hkaga jakamã koja mē htỳx ri kãm hprãm xà hkôt tanhmã homnu hto ho pa. Nē Jerujarē piitã hkôt ri homnu ho paja ã hã amgrà axkrunēpxi nē hkôt mytwrỳ kêp 6.

³ —Koja Tirtûm ma ÿ hã kapêr xwỳnh ho hamēxkrut nē mē hwỳr wa kumē nhũm wa ma mē hwỳr wrỳ nē mē kãm Tirtûm kapêr jarēnh o ri mē hkôt pa. Hãmri nē tee ri mē kot tanhmã amnhĩ tomnuj to hã mē omu nē hkaprĩ nē. Hãmri nē wa hkaprĩ xàj xak punure kaxô nē haxà nē mē kãm Tirtûm kapêr jarēnh o ri wa pa hã amgrà axkrunēpxi nē hkôt mytwrỳ kêp 6. Jakamã e. Pija py nē ma mē hwỳr wrỳ nē ixkreta o mīdi. Anē.

⁴ Wa pijakrut wa kot Tirtûm nhỹ hã kapêr jarēnh o wa pa xwỳnhhta wa. Na htem wa kot amnhĩ nhĩpêx ã wa harēnh ma nē mēmo pī hpàr pē oriwēhti kot tanhmã amnhĩ nhĩpêx toja mã hamaxpêr kurê kumrêx. Nē amnepēm Tirtûm nhỹ hã kapêr o pa xwỳnh pē Jakaris kot kanê hpôk xãmta mã mãănēn hamaxpêr. Oriwēhti xôja htwỳm

rax kumrêx nhũm htem htwým opôj nê ho kanê ho nýt nê hpôk nê kýt pê unhwý nhũm mẽ piitã hirã kamã rít mex o ri mra. Nê kanê hpôk mexja te kot Tirtũm kapêr pyrãk. Nê kanê xãm xàja te kot Tirtũm nhỹ hã kapêr jarênh o wa pa xwýnhta wa urãk. Nê oriwêhtija haxwýja te kot wa urãk. Ra Tirtũm Karõ kot wa hkarõ mã àr jakamã na hte wa hprĩ hã mẽ kãm Tirtũm kapêr jarênh o pa nhũm mẽ kot mar xwýnhjaja te kanê nhĩrã kamã ri rít mex nê ri pa pyrã nê hprĩ hã mar týt nê.

⁵ Tã koja mêhõ tanhmã wa hipêx to kaxyw wa hwýr tẽ nhũm wa hakwa rũm kuwy hpôk kato nê kot tanhmã wa ho mã xwýnhta o hxêt o kupĩ.

⁶ Nê koja wa Tirtũm xàhpumunh týt xà ho tanhmã ri mẽ hã mẽmoj nhĩpêx to pê mẽ kãm kapêr jarênh o ri mẽ hkôt pa. Jao tanhmã na hto nhũm mẽ hã wryk kêt ry nê. Rý tanhmã mẽ kêp gô hto nhũm mẽ hkamrô hã mẽ kêp amnhĩ jahkre. Koja wa ã Tirtũm nhỹ hã mẽ kêp mẽmoj nhĩpêx anhýr ho wa pa. Nê xatã wa kãm hprãm xà hkôt tanhmã mẽmoj tomnu hto. ⁷ Nê mẽ kãm kapêr o pa pê ã mẽ hipêx anhýr o wa hã amgrã axkrunêpxi nê hkôt mytwrý kêp 6 nê rĩ kormã ho hapêx. Hãmri nhũm ahkre xupým rũm Satanasti nhõ kôwenatôja kato nê ma wa hwýr tẽ nê nhỹri pry kahti ri wa unê nê wa kupĩ nhũm wa pry kamã ty nê nõ. ⁸ Hãmri nhũm mẽ wa haxàr kêt nê nhũm wa arĩ pry kamã nõ. Krĩ kapem na prem pĩ kahpa hã Jejus nhõ nê kupĩ. Krĩ nhõ xwýnhjaja mẽ kot amnhĩ tomnuj týt xwýnh na mẽ. Te ho amnepêm krĩ pê Sotõ mẽ pika pê Ejit kamã mẽ kot amnhĩ tomnuj xwýnhjê kot amnhĩ nhĩpêx pyrãk. ⁹ Jakamã nhũm mẽ kot wa haxàr nê axpên

kurê nhũm wa pry kamã arĩ ty nẽ nõ nhũm mẽ piitã wa hwỳr mra nẽ wa omu. Nẽ ahpỹnhã krĩ piitã hkôt mẽ pa xwỳnhjaja tanhmã amnhĩ to nẽ ja hã wa omu. Ahpỹnhã ri pika piitã hkôt mẽ urojaja. Nẽ ahpỹnhã ri mẽ kapêr xwỳnh piitã. Hãmri arĩ ahpỹnhã mẽ õ krĩ kamã pa htã tanhmã amnhĩ to nẽ wa htyk ã wa omunh ã hã apkati axkrunẽpxi nẽ hkôt hã myt apha. ¹⁰ Koja mẽ wa htyk ã wa omu hãmri nẽ hkĩnh nẽ. Nẽ hkĩnh xàj axpẽn mã hkĩnh xà nhõr o pa. Wa kot kormã htĩr ri tanhmã mẽ homnuj to ho ri mẽ hkôt paja mã hamaxpêr nẽ wa htyk ã wa omu nẽ hkĩnh tỳx nẽ.

¹¹ Tã koja wa htyk ã apkati axkrunẽpxi nẽ hkôt hã myt apha hãmri nhũm Tĩrtũm wa kamã htyyxà rẽ nẽ akupỹm wa ho wa htĩr nhũm wa kànhmã xa nẽ ri mra. Hãmri nhũm mẽ kot wa omunh xwỳnhjaja tee ri hã wa omu nẽ kãm wa uma htỳx kumrẽx. ãm kãm wa uma ho kãm wa uma.

¹² Hãmri nhũm kaxkwa kamã mẽhõja wa kãm kapêr nẽ wa kãm:

—E war amnẽ mẽ ixwỳr war api. Anẽ.

Hãmri nhũm wa kuma nẽ ma kakrã kamã àpir o mõ. Nhũm mẽ kãm wa hkurê xwỳnhjaja tee ri wa àpir ã wa omu.

¹³ Hãmri nhũm pika htertet tỳx nẽ. Nẽ krĩ kamã ixkre ohtô nẽ grành pa nẽ mẽ hkwy nhĩmex rax nẽ nhũm mẽ ohtô rax kumrẽx nẽ axkaprã. Mẽ kệp 7.000 nẽ pikaprãr pa. Hãmri nhũm arĩ mẽ htĩr nẽ ri mẽ pa xwỳnhjaja tee ri mẽ omu nẽ kãm ma xàj htertet tỳx nẽ axpẽn mã:

—Kwa Tĩrtũm mãn ã mẽ panhĩpêx anẽ. Hihtỳx o hihtỳx jakamã kaxkwa rũm ã mẽ panhĩpêx anẽ pu mẽ pahpiitã pano ho ixkre pigrành ã omu. Anẽ.

14 E na ra amnhĩ xà htỳx kamã hamak xàja hamẽxkrut nẽ hapêx. Tã no ãm arĩ mẽ kaxyw pyxi nẽ arĩk.

Mẽ kot pifti kot hitep kakôr ã harẽnh

Apokarip 4.8, 5.9-14, 7.9-12, 14.2-5, 15.3-4, 19.1-

2

15 Tã nhũm Tĩrtũm kapêr o wrỳk xwỳnh kot hitepja õ pifti kakô nhũm kaxkwa kamã mẽ pa xwỳnhjaja kàx pê kapêr o:

E ãm hãmri. Na ra Mẽpahpãm Maati mẽ Jejus Krisja wa kêp krĩ piitã hkôt mẽ piitã mẽ õ Pahihti na wa.

Koja Mẽpahpãm Maatija kêp Pahi Maati rãhã nẽ pa ho pa xwỳnh. Anẽ.

16 Hãmri nhũm mẽ àptàr tũm pê 24jaja. Tĩrtũm kot mẽ pahto amnhĩptàr o hkrĩ xà mã hipôk nẽ mẽ hkrĩ xwỳnhjaja. Hãmri ã mẽ kapêr anhỳrja ma nẽ Tĩrtũm ã hpijaàm kaxyw hpar pê rôrôk pa nẽ htu mỳr pê hikwỳ. Hãmri nẽ kãm mex o mex ã harẽ nẽ kãm:

17 Pa Pahi Maati Tĩrtũm. Nà ãm hãmri mẽ ixrom axàhpumunh o axàhpumunh nẽ axihtỳx o axihtỳx.

Amnepê mã kormã mẽmoj kêt ri na ka pre arãhã apa ho apa.

Tã arĩ arãhã apa ho apa.

Ãm hãmri apê mẽ ixpiitã mẽ ixto amnhĩptàr xwỳnh.

Nà ãm hãmri amex o amex.

18 Kot kaj tokyx mẽ piitã tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harẽnh to.

Nẽ ra mẽ htyk xwỳnhjaja kot kaj mẽ piitã akupỳm mẽ ho mẽ hĩr pa nhũm mẽ pika rũm hapôx

pa nẽ ma mra nẽ arĩ mẽ htĩr xwỳnhjê nhĩhkô
hã akutã hkrĩ pa.

Ka mẽ piitã mẽ omu nẽ tanhmã mẽ kot amnhĩ
nhĩpêx to ho pa hã mẽ omunh hkôt tanhmã
mẽ harênh to.

Mẽ kot amnhĩ tomnuj xwỳnhjaja kot kaj ma mẽ
kot amnhĩ xà htỳx kamã hamak o pa htũm
xà hwỳr amnhĩ nê mẽ arẽ nhũm mẽ ma
hwỳr hapêx. Hãmri nẽ tee ri amnhĩ kukamã
hamaxpêr nẽ gryk tỳx kumrêx.

Ka hpãnhã mẽ kot akôt amnhĩ xunhwỳr nẽ akapêr
kôt amnhĩ nhĩpêx o mẽ pa xwỳnh piitã mẽ
omu nẽ tanhmã mẽ ho mex to.

Mẽ kot amnhĩ to rũnh xwỳnhjaja nẽ mẽ kot amnhĩ
to hkryre xwỳnhjaja.

Nẽ amnepêm mẽ kot anhy hã mẽ kapêr o mẽ pa
xwỳnhjaja.

Akrajê piitã kot atã hpijaàm xwỳnhjaja kot kaj ko-
rmã mẽ htĩr ri tanhmã amnhĩ to mex hã mẽ
omunh xà hkôt tanhmã mẽ ho mex to.

Ã kot kaj tokyx mẽ piitã ahpỳnhã mẽ omunh xà
hkôt mẽ hipêx anẽ. Anẽ.

¹⁹ Hãmri nhũm kaxkwa kamã Tĩrtũm nhõrkwỹ hã
hakwakre kahê xà amnhĩ mẽ pa kamã ôr o mês
kunĩhtita pumu. Pu nhũm na hkatõtök nẽ haxênh
nẽ hkrakrak nẽ na mê te kot jêr krã hakotre pyræk
xwỳnhja pikap rôrôk rax nẽ. Nẽ pika htertet tỳx o
htertet tỳx pa arĩ omunh o xa.

12

Mêhõ ni mẽ kagãmnuti wa harênh

¹ Tã pa axte mẽmoj pumu. Kaxkwa kamã aa mẽ
pahte mẽmoj pumunh kêt xwỳnhja pa omu. Nhũm

mêhõ nija xê te myt no mã hirã htÿx pyrãk. Nê hpar nhõkwa kamã mytwrÿre ajêt. Nê kanhêti ho 12 o mẽ ahkà tu nê o xa. ² Na ra htujarô nê hpijagri kaxyw õhy xà nê amnhĩ kamnhêr o xa.

³ Tã pa axte mẽmoj pumu. Aa mẽ pahte mẽmoj ã kot anhÿr pumunh kêt xwÿnh õja pa omu. Kagãmnuti nom ãm axtem hkà kamrêk tÿx kumrêx. Nê rax kumrêx. Nê hkrã kêp 7. Nê hkrã piitã kamã ôr o pahi hã mẽ ahkà htu nê o nõ. Nê hkrã kamã pàr kêp 10.

⁴ Tã nhũm hamy ho apêr o kaxkwa kamã kanhêti ho ohtô nê pikap kurê. Hãmri nê õhy xà nê amnhĩ kamnhêr o ãm xwÿnhhta wÿr tẽ nê hkra kator nhũm kot kêp krêr kaxyw kutã hamãr o nõ.

⁵ Hãmri nhũm hkra kato nê myre. Hihtÿx o hihtÿx ã kot pika piitã hkôt mẽ piitã mẽ ho amnhĩptàr mã xwÿnh na pre. Nhũm kagãmnutija kot kêp utàr nê hkrêr mã tã nhũm Tirtũm kapêr o wrÿk xwÿnhjê hõja hwÿr wrÿ nê kêp kumÿ nê ma Tirtũm wÿr kaxkwa kamã kot mẽ pahto amnhĩptàr ã hkrĩ xà maatija wÿr ho api.

⁶ Hãmri nhũm kagãmnuti tee ri ma kot kêp o mõi ã omu nê hpãnhã nita o apkjê nê kot tanhmã ho kaxyw nhũm amnhĩ tã omu nê umaj hprôt nê ma tẽ nê nhÿri kapôt ã amũxu. Ra Tirtũm kot hkukamã kãm hpimxur xà nhĩpêx xà hwÿr hprôt nê ma tẽ nê kamã kêp amũxu. Nhũm Tirtũmja nê kagã pumunh mex nhũm kêp hpimxur mex ã amgrà axkrunêpxi nê hkôt hã mytwrÿr kêp 6.

Mê kot kaxkwa kamã mẽkarõmnuti kurê kaxàr ã mẽ harênh

⁷ Tã nhũm mẽ ra kaxkwa kamã kurê kaxàr kaxyw. Kagãmnuti mẽ hkwyjaja nhũm mẽ ra

Tĩrtũm kurê kaxàr kaxyw kutã amnhĩ xunhwỳ.
Jakamã nhũm Tĩrtũm kapêr o mẽ wryk xwỳnhjê
hkrãhtũm Mikewja ma mẽ hwỳr amnhĩ kôt hkwỳjê
o mra nê mẽ pijapu ho kuhê.

⁸ Hãmri nhũm kagãmnuti tee mẽ kutã amnhĩ
to htỳx kaprỳ nhũm Tĩrtũm kapêr o mẽ wryk
xwỳnhjaja amnhĩ nê mẽ ho axtem nê kaxkwa rũm
mẽ kator o mẽ kator.

⁹ Satanasti pê kagãmnutita kagã kot ni kator ewa
mã hêx xwỳnh na pre. Nê hêx rom tanhmã hêx to
ho pa xwỳnh. Jakamã nhũm Mikew mẽ hkwỳjaja
hkwỳjê mẽ mẽ ho hpimràatã amnhĩ nê pikap mẽ
rênh pa.

¹⁰ Hãmri nhũm kaxkwa kamã mēhōja axte kàxpê
kapêr nê kapêr o:

E ãm hãmri. Na ra Tĩrtũm hihtỳx o hihtỳx o mẽ panê
mẽmoj punuj piitã ho hapêx par kumrêx.

Na pre hte Satanasti pê mẽkarõmnutija xatã hwỳr
mra nê kãm tanhmã Jejus kwỳjê ho kapêr
punuj to ho pa.

Tã koja axte mẽ ho kapêr kêt kumrêx. Ra Tĩrtũm
kot amnhĩ nê kator o kator nhũm ra ma mōr
o mōr kênã.

Koja Tĩrtũm pika piitã hkôt mẽ ho amnhĩptàr
xwỳnhjê japôx pa nê hpãnhã mẽ kaxyw Kra
Krisja xãm nhũm pika piitã hkôt mẽ ho
amnhĩptàr rãhã ho pa.

Nà ãm hãmri. Ja mex o mex.

¹¹ Na pre Jejus kôt mẽ pahtõ nê mẽ pahtõxjaja
mẽkarõmnuti kutã amnhĩ to htỳx nê pa. No
ãm amnhĩ nhỹ hã ã kutã amnhĩ nhĩpêx
anhỹr kêt.

Mě pahte amnhĩ tomnuj pãnhã amnhĩrer xwỳnhta
na pre ty nẽ hkamrô ho mẽ kuhõ nẽ mẽ nê
mẽ kot amnhĩ tomnuj o hapêx.

Jakamã nhũm prem kukwak ri Satanasti kutã
amnhĩ to htỳx rãhã pa.

Nhũm mẽ kot Jejus ã mẽ himex par kaxyw tã nhũm
mẽ kãm htyk pyma hkêt nẽ. ãm Jejus kôt arĩ
amnhĩ to htỳx nẽ mẽ hkôt pa rãhã nẽ.

Jao arĩ mẽ kãm Jejus kot mẽ panê tanhmã amnhĩ
nhĩpêx to hã harẽnh o ri mẽ hkôt pa.

¹² Tã Tĩrtũm ra kot mẽ panê mẽmoj punuj o hapêx
par jakamã kwa kaxkwa kamã mẽ apa
xwỳnhjaja kër ka mẽ akĩnh nẽ apa.

Nom gô xujanãr kãm nẽ pika kamã mẽ pa
xwỳnhjaja hêxta waa nẽ. Koja mẽ mex
kêt nẽ.

Nẽ ra Mikew mẽ hkwỳjaja kot amnhĩ nê kaxkwa
rũm mẽkarõmnuti mẽ hkwỳjê kator nẽ pikap
mẽ rẽnh par jakamã nhũm Satanastija gryk
tỳx kumrêx.

Tĩrtũm kot ma mẽ kot amnhĩ xà htỳx kamã hamak
o pa tũm xàta wỳr mẽnh xà hã arĩgro hwỳr
amgrà grêre nhũm tee ri amnhĩ kukamã
hamaxpêr nẽ gryk tỳx o gryk tỳx. Anẽ.

¹³ Hãmri nhũm kagãmnutija mẽ kot amnhĩ nê
kaxkwa rũm kator ã amnhĩ pumu nẽ gryk tỳx
nẽ. Nẽ gryk xàj ma akupỹm ni kot hkra myre ho
pijagri xwỳnhta wỳr tẽ nẽ tanhmã ho kaxyw hkôt
ho krihkrit.

¹⁴⁻¹⁶ Hãmri nhũm Tĩrtũm kapêr o mẽ wrỳk
xwỳnhjê hõja omu nẽ nija mã àànhahti jara gõ.
Kot kagãmnuti pê ho htor nẽ ma nhỹri hpimxur
xà wỳr htẽm kaxyw. Nẽ kormã htor kaxyw nhũm

kagãmnuti omu nê kot gô ho hanhir kaxyw hkôt hakwa rûm gô kapĩ nhũm hpikapĩr rax kumrêx. Te pyhti hprôt tỳx pyràk. Hãmri nhũm Tĩrtũm omu nê nija nê tanhmã pika hto nhũm kãm axkjê nhũm gô hprôt nê kamã pikapĩr pa. Jakamã nhũm mex pê àanhàhti jara ho to nê ma kapôt ã pimxur xà hwỳr ma tẽ. Nê kamã pa hã amgrà axkrunẽpxi nê hkôt mytwrỳ kêp 6 nhũm prem hamãr mex rãhã ho pa.

¹⁷ Hãmri nhũm kagãmnuti tee ri kãm hpĩr prãm kaprỳ nê gryk tỳx kumrêx. Hãmri nê ma ni hkwỳjê hwỳr mỗ. Mẽ kot Tĩrtũm mẽ Jejus wa hkôt amnhĩ nhĩpêx o mẽ pa xwỳnhjê hwỳr tanhmã mẽ homnuj to kaxyw ma mẽ hwỳr mỗ. Hãmri nê tanhmã kot mẽ ho kaxyw gô xujanãr mỳ ri nỗ.

13

Satanasti nhõ kôwenatô wa kot gô xujanãr rûm kator ã wa harênh

Sikũn Tesarôn 2.3-5

¹ Tã pa axte mẽmoj pumu. Nhũm gô xujanãr rûm Satanasti nhõ kôwenatôjê hõja te mrymnuti pyrà nê àpir o mỗ. Kagãmnuti pyrà nê hkrã kêp 7. Nê uràk nê hpàr kêp 10. Nê hpàr piitã kamã pahi hã mẽ ahkà. Nê ahkà piitã hã axtem tanhmã Tĩrtũm o kapêr punuj to nê tanhmã haprỳ hto hã kagãja hikwỹ.

² Nê hkà te kêp ropkrorti kà pyràk. Nê hakwa te kot rêãwti jakwa pyràk. Nê ìhkra te kot pàati nhìhkra pyràk. Jakamã na pre kagãmnuti nhỹ hã hìhtỳx o kêp pahi hã pika nhõ xwỳnhjê ho amnhĩptàr o pa.

³ Nê hkrã hõ te mẽ kot hayr o hpĩr nhũm ra akupỹm htĩr nê arĩ hayr xà wakre rã nyw pyràk.

Jakamã nhũm pika kamã mẽ pa xwỳnhjaja amnhĩ jaêr pê omu nẽ kamã no pyma nẽ. Hãmri nẽ hkôt amnhĩ nhĩpêx o pa.

⁴ Hãmri nẽ kagãmnuti kot tanhmã mrymnuti ho nhũm ỹ hã mẽ ho amnhĩptàr jakamã nhũm mẽ piitã hamẽ wa hã hpijaàm kaxyw wa kãm wa mex o wa mex ã wa harênh o pa. Nẽ mrymnuti hã axpẽn mã:

—Hêxta waa nẽ. Mẽ pahtõ na mẽ pahte mrymnutita pyrã nẽ ã mẽ pahte amnhĩ nhĩpêx kot anhỹr? Mẽ pahtõ kot pu kutã xa nẽ paxihtỳx o hkurê kapa? Nà amrakati kumrêx. Anẽ.

⁵⁻⁶ Hãmri nhũm Satanasti tanhmã mrymnuti ho nhũm kapêr o ri mẽ hkôt pa nẽ mẽ ho amnhĩptàr o hã amgrã axkrunêpxi nẽ hkôt mytwrỳ kêp 6. No ãm axtem nẽ Tĩrtũm o kapêr punuj o ri mẽ hkôt pa. Nẽ ri tanhmã haprỳ hto nẽ õ krĩja mex kêt ã harênh o ri mẽ hkôt pa.

⁷ Hãmri nhũm Satanasti ra kot mẽ hkurê kaxàr kaxyw kãm anẽ nhũm axtem nẽ Tĩrtũm pê hkrajê kutã amnhĩ xãm nẽ mẽ hwỳr hprõt nẽ tanhmã hpijapu hto ho pa nẽ mẽ ho axtem nẽ mẽ ho krihkrit pa nẽ ahpỹnhã ri pika piitã hkôt mẽ uro hkwyjê ho amnhĩptàr o pa. Nẽ ahpỹnhã mẽ kapêr xwỳnh piitã mẽ ho amnhĩptã.

⁸ Jakamã nhũm mẽ ohtõ rax kumrêx nẽ mrymnuti hkôt amnhĩ nhĩpêx. Nẽ kutã hkõn krã ho rôrõk nẽ hkrĩ nẽ kãm mex o mex ã harẽ. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwỳnh kôt ra mẽ kot amnhĩ xunhwỳr xwỳnhjaja tapxipixjaja na prem hkôt amnhĩ xunhwỳr kêt nẽ. Amnepê mã kormã amrakati ri Tĩrtũm mẽ Jejus wa õ kagã kamã mẽ htĩr tũm nẽ mẽ pa mã xwỳnh

nhĩxi xwỳnh pixjaja na prem mrymnuti pumu nẽ hkwỳjê rom hprĩ hã kot amnhĩ nhĩpêx ã omunh kurê kumrêx nẽ hkôt amnhĩ nhĩpêx kêt nẽ.

⁹ E ka mẽ atõ axumar kaxyw ajamak kre hã kot kaj ixujarênh piitã ama nẽ kãm ajamaxpêr tỳx rãhã ho apa.

¹⁰ Jakamã kwa Tĩrtũm kôt ixkwỳjaja. Kwãr mẽ mãmri mẽ apynê nẽ mẽ ajagjê.

Nẽ kwãr mẽ mãmri wapo ho mẽ ajayr o mẽ apa.

Nom kêr ka mẽ umaj ixkaga hkêt nẽ. Ixkaga hkêt o ixkaga hkêt.

Mẽ ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹ Tã pa mrymnuti hõ pumu. Nom wamta pyrã nẽ gô xujanãr rũm kator kêt axtem pika rũm kato. Nẽ ôwêhti hkrare pyrã nẽ hpàr pijakrutre. Nẽ te ho kagãmnuti kapêr tỳx pyrã nẽ kapêr tỳx kumrêx o pa.

¹² Gô xujanãr rũm mrymnuti xàpir xwỳnhhta nhỹ hã pika nhõ xwỳnhjê mã kapêr tỳx nẽ mẽ kãm:

—E pika piitã hkôt mẽ apa xwỳnhjaja mẽ inhma. Kêr ka mẽ kot hkrã hõ jayr o hpĩr nhũm akupỹm htĩr xwỳnhhta kôt pix mã amnhĩ nhĩpêx rãhã ho ri apa. Nẽ kãm mex o mex ã harênh rãhã nẽ.

Anhỹr o mẽ kãm kapêr. ¹³ Hãmri nẽ Satanasti nhỹ hã mẽ kãm aa mẽ kot mẽmoj pumunh kêt kwỳ ho anhỹr o pa. Jao kaxkwa rũm tanhmã mẽ kãm kuwy ho wrỳk to nhũm pikap rôrôk nhũm mẽ amnhĩ jaêr pê omu nẽ kamã no pyma nẽ. ¹⁴ ã ri mẽ noo mã mẽ kãm amnhĩ nhĩpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhĩ

nhĩpêx anhÿr o mẽ no kupyř o pa nhũm mẽ omu nẽ hkôt amnhĩ nhĩpêx. Hãmri nhũm mẽ kãm mẽmoj tã karõ nẽ mẽ kãm:

—E wam mrymnutita. Mẽ kot hkrã hõ jayr o hpĩr nhũm akupÿm htĩr xwÿnhhta kêr ka mẽ kãm hkarõ nhĩpêx nẽ ho mẽ anhõ sãnti. Kê mẽ piitã hwÿr mra nẽ kutã hkõn krã ho rôrõk nẽ hkrĩ nẽ amnhĩ to kuwÿ nẽ kãm mex o mex ã harẽ.

Anhÿr o mẽ kãm hã karõ. ¹⁵ Hãmri nhũm mẽ kuma nẽ mar xà hkôt hipêx nẽ ãm nhũm xa. Hãmri nhũm mrymnuti kot hitepta omu nẽ hwÿr tẽ nẽ tanhmã ho nhũm ra kapêr nẽ mẽ kãm:

—E kêr ka mẽ kot inhmex ã ijarênh kêt xwÿnhjê pynê nẽ mẽ himex pa. Anẽ.

¹⁶ Hãmri nhũm pika rũm mrymnuti kator xwÿnhhta haxwÿja mẽ kãm kapêr nẽ mẽ kãm:

—E koja ixkwÿjaja inhÿ hã mẽ apiitã mẽ apê ixkwÿ hã mẽ akagã. Mẽ ate amnhĩ to rũnh xwÿnhjaja nẽ mẽ ate amnhĩ to hkryre xwÿnhjaja. Nẽ amarĩ mẽ kãm mẽ axàpênh xwÿnhjaja nẽ amnhĩ mã mẽ axàpênh xwÿnhjaja. Nẽ mẽ akàxpore rũnh xwÿnhjaja nẽ mẽ apê amrakati xwÿnhjaja. Kojã mẽ apiitã mẽ akagã hpa. Mẽ akwÿ nhõkrã kagã nẽ mẽ akwÿ xupõk rũm mẽ anhĩhkra katut kagã.

¹⁷ —Gõ xujanãr rũm mrymnutita nhĩxi kot paj mẽ atã hipêx. Rÿ hixi hã nũm nhĩpêx. Hãmri ka mẽ axàpkur xà japrõr kaxyw nhÿhÿm mra nhũm mẽ atã hixita pumu nẽ rĩ kormã mẽ amã mẽmoj kwÿ ho wẽnê ka mẽ amnhĩm haprõ nẽ ho axàpkur o ri apa. Nẽ mẽ ate mẽmoj to wẽnê xwÿnhjaja koja mẽ apê mẽmoj japrõr kaxyw mẽ awÿr mra ka mẽ tee ri nhÿhÿnh mẽ hã hixi japêr hãmri nẽ mẽ kãm mẽmoj to wẽnê hkêt nẽ. ãm nhÿhÿnh mẽ atã hixi hã

kagàta pumunh pix kukwak ri kot kaj mẽ awjaprô rỳ mẽmoj to wẽnê. Anê.

¹⁸ E kwa kêr ka mẽ ixte mẽmoj pumunh nê mẽ amã hã kagàta pumu nê ama nê kãm ajamaxpêr tỳx o apa. Mrymnutita nhĩxi na kêp nũm. Nũmja kêp 666. E kaj mẽ akrã hi mex xwỳnhjaja kot kaj mẽ aprĩ hã ja mar tỳx kurê kumrêx.

14

Tĩrtũm mex ã mẽ grer Apokarip 7.1-8

¹ Tã pa axte mẽmoj pumu. Nhũm mẽ pahte amnhĩ tomnuj pãnhã amnhĩrer xwỳnhja hixêr pê Siãwja nhĩmõk ã xa. Nê puhã mẽ ohtô rax kumrêx nê kuhê. Mẽ ohtô ho mẽ ohtô. Piitã kamã mẽ kêp 144.000. Nê piitã ôkrã hã mẽ pahte amnhĩ tomnuj pãnhã amnhĩrer xwỳnh mẽ Hipêêxà wa hixi jaxwỳr pa mẽ omu.

² Nhũm mẽ kaxkwa kamã grer o kuhê. Mẽ grerja mex o mex. Te kot gô hprôt tỳx hkoko htỳx pyràk. Nê te na katõtõk tỳx pyràk. Nê te wiorãw môr xwỳnhjaja kot hkakrênh mex pyràk pa mẽ mar o xa.

³ Nê mẽ grer xwỳnhjaja. Jejus puhã mẽ ohtô rax kumrêx nê mẽ kuhê xwỳnhjaja na prem Tĩrtũm kot mẽ ho amnhĩptàr ã hkrĩ xàta kuri grer o kuhê. Nê mẽmoj tĩr pê kwat xwỳnhjê mẽ mẽ àptàr tũm pê 24jê kuri grer o kuhê. Mẽ grer nyw o gre. ãm mẽ tapxipixjaja mẽ kot mẽ grer nywja mar. Ra mẽ kêp Tĩrtũm kra hã mẽ kot mẽ ôkrã hã Tĩrtũm mẽ Kra Jejus wa hixi ã kagà nhũm Tĩrtũm kot ra mrymnuti mẽ hõta wa kêp mẽ utàr nê amnhĩ wỳr mẽ ho àpir

xwỳnh na pre mẽ. Ấm mẽ tapxipixjaja mẽ grer nywja ma nẽ wa kãm ho grer o kuhê.

⁴⁻⁵ Na prem tãm amnhĩ nhĩpêx nẽ Tĩrtũm kôt amnhĩ nhĩpêx rãhã ho pa. Te mẽ kot amnhĩ prõ pix tãnopxar rãhã ho pata pyræk. Nẽ ri tanhmã hêx to rỳ tanhmã ri amnhĩ tomnuj to ho pa hkêt nẽ. Ấm tãm ri amnhĩ nhĩpêx mex o pa. Mẽ kêp Tĩrtũm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kôt pix mã amnhĩ nhĩpêx o pa. Jakamã na prem mrymnuti kutã rôrôk nẽ kãm mex o mex ã harênh kêt nẽ. Tã mẽ kumrêxjaja Tĩrtũm mẽ Kra wa kuri wa kãm grer o kuhê.

Tĩrtũm kapêr o wrỳk xwỳnh pijakrunêpxi jarênh

⁶ Tã pa axte Tĩrtũm kapêr o wrỳk xwỳnhjê hõ pumu nhũm kỳx pê ri htor o pa. Ahpỳnhã ri pika piitã hkôt mẽ uro hkwyjê hkôt. Na ahpỳnhã ri mẽ kapêr xwỳnhjê piitã mẽ hkôt mẽ kãm Tĩrtũm kot tanhmã mẽ hipêx to hã harênh kaxyw. Ahpỳnhã mẽ kapêr xwỳnh piitã mẽ kãm harênh o pa. Nẽ htor o pa pê kỳx pê mẽ kãm kapêr nẽ mẽ kãm:

⁷ “E na ra Tĩrtũm mẽ ate amnhĩ tomnuj mỳrapê tanhmã mẽ ato kaxyw. Jakamã kwa mẽ tokyx hã apijaàm kaxyw akôn krã ho arôrôk nẽ akrĩ nẽ kãm mex o mex ã harê. Kêp mẽmoj piitã ho kator xwỳnh na. Na pre kaxkwa ho kato nẽ pika ho kato nẽ gô xujanãr o kato nẽ hino ho kato nẽ mẽmoj piitã ho kator pa. Jakamã kwa kêr ka mẽ tapxipix ã mãn apijaàm nẽ kãm mex o mex hã harênh rãhã ho apa.”

Anhỹr o mẽ kãm kapêr. ⁸ Hãmri nhũm hõja wanta kôt tẽ nẽ uræk nẽ kỳx pê mẽ kãm kapêr o:

—Koja Tirtũm tokyx Papirõn grành pa. Na hte krĩ nõ xwỳnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagôxỳhti ho hkõm nẽ amnhĩ mẽ mẽ piitã mẽ kãm õr nẽ ho mẽ ho pipãnh pyràk. Na htem mēnijê piitã ho amnhĩkati o pa. Nẽ amnhĩ kwỳjê pê mẽ hprõ ho amnhĩkati. Nẽ amnhĩ mẽ pika piitã hkõt mẽ pa xwỳnhjê mã anhỹr o pa. Mẽ kot mẽ uràk nẽ ã amnhĩ nhĩpêx anhỹr o pa kaxyw mẽ kãm anhỹr o pa. Ja mỳrapê na ra Tirtũm kot tanhmã mẽ ho kaxyw mẽ hã amnhĩ jarẽ. Anẽ.

⁹ Tã nhũm wa hkõt hõja tẽ nẽ wa uràk nẽ kàx pê pika nõ xwỳnhjê mã kapêr nẽ mẽ kãm:

—E mẽ ate mrymnuti kutã akõn krã ho arôrõk nẽ akrĩ nẽ kãm mex ã harẽnh xwỳnhjaja. Nẽ mẽ ate karõ nhĩpêx nẽ kutã akõn krã ho akrĩ nẽ kãm mex ã harẽnh xwỳnhjaja. Nẽ mẽ anhõkrã nẽ mẽ anhĩhkra hã hixi hã kagã xwỳnhjaja.

¹⁰⁻¹¹ —Tirtũm na tee ja hã mẽ apumu nẽ mẽ akamã gryk tỳx kumrêx. Mẽ ate kapêr kuhpa hã mrymnuti hkõt amnhĩ xunhwỳr jakamã nhũm mẽ akamã gryk tỳx o mẽ akamã gryk tỳx. Jakamã koja kuwy hpòk rãhã ho rãhã xwỳnhhta kamã mẽ arẽnh pa ka mẽ amnhĩ xà htỳx kamã ajamak rãhã apa ho apa. Koja kuwy hpòkja aa hapêx kêt nẽ kurũm kàx mã hkũm àpir o pa rãhã nẽ. Koja ã mẽ ate amnhĩ tomnuj o mẽ apa xwỳnhjê nhĩpêx anẽ ka mẽ kamã apa ho apa nẽ aa kurũm ajapôx kêt nẽ kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỹr rãhã apa ho apa. Mẽ ate gôj rũm mrymnuti mẽ hkarõ ho sãnti wa kutã akõn krã ho arôrõk nẽ akrĩ nẽ wa kãm wa mex ã wa harẽnhja mỳrapê kot kaj mẽ ã amnhĩ nhĩpêx anẽ. Kot mẽ pahte amnhĩ tomnuj

pānhã amnhĩrer xwỳnh mẽ Tĩrtũm kapẽr o mẽ wryk xwỳnhjê noo mã kot kaj mẽ ã amnhĩ nhĩpêx anhỹr o apa.

¹² Anhỹr o mẽ kãm kapẽr jakamã kwa kêr pu mẽ pahte Tĩrtũm kôt amnhĩ xunhwỳr xwỳnhjaja mẽ hkukamã mẽ harẽnhja ma nẽ Tĩrtũm kapẽr kôt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nẽ amnhĩ kaxyw Jejus kôt pajamaxpẽr tỳx rãhã nẽ. Hãmri nẽ nhỹrmã mẽ kurom ma õ krĩ hwỳr api nẽ kamã pamex kumrẽx nẽ papa ho papa.

*Mẽ kêp Jejus kwỳ hã mẽ htyk xwỳnhjê jarẽnh
Wam Tesarõn 4.16*

¹³ Tã nhũm kaxkwa kamã mẽhõja axte inhmã kapẽr nẽ inhmã:

E Juãw. Kêr ka ã akwỳjê mã mẽmoj tã kagà anẽ nẽ mẽ kãm hã kagà ho: “E mẽ ate Tĩrtũm kôt ri amnhĩ nhĩpêx xwỳnhjaja. Mẽ kot Tĩrtũm ã mẽ apar nhũm mẽ atyk tã koja amnhĩ tã mẽ ato mex rax kumrẽx.” Anhỹr o mẽ kãm hã kagà.

Anhỹr o inhmã kapẽr. Hãmri nhũm Tĩrtũm Karõja kuma nẽ kãm:

—Nà ãm hãmri na ka ã mẽ harẽnh anẽ. Ra Tĩrtũm kot amnhĩ tã mẽ omunh rãhã ho pa. Mẽ kot kôt pix mã amnhĩ nhĩpêx o pa pẽ mẽ kãm mẽ hkurê xwỳnhjê kutã amnhĩ to htỳx rãhã htykja nhũm Tĩrtũm kot amnhĩ tã mẽ omunh mex. Koja mẽ ho mex kumrẽx. Mẽ kot Jejus ã mẽ hpar tã koja mẽ ho mex rax nẽ nhũm mẽ kuri mex rãhã nẽ pa ho pa nhũm mẽhõ axte tanhmã mẽ ho hkêt nẽ. Anẽ.

Tĩrtũm kot tanhmã mẽ kãm hkĩnh xwỳnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nẽ kamã mẽhõj te panhĩ pyrã nẽ nhỹ. Nhũm ôr o pahi hã mẽ ahkà htu nẽ kuteere xwagixre py nẽ o nhỹ.

¹⁵ Hãmri nhũm kaxkwa kamã Tĩrtũm kapêr o mẽ wrỳk xwỳnhjê hõja Tĩrtũm mã amnhĩ jarênh xà hã ixkre rũm kato nẽ kakrã jaka kamã ỹr xwỳnhta mã kapêr. Kàx pê kãm kapêr nẽ kãm:

—E pika nhõ xwỳnhjaja te mẽ hpur kãm mẽmo hy ra hkamrêk nẽ hikênh mã mex pyrãk. Jakamã anhõ kuteere ata py nẽ ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkênh o ri pa pyrãk o mẽ hipêx nẽ ma ho mẽ himex o ri apa. Anẽ.

¹⁶ Hãmri nhũm kuma nẽ pika piitã mỳri õ kuteere ho apê nẽ te mẽmo hy jakàr pyrãk o mẽ hipêx.

¹⁷ Hãmri nhũm axte Tĩrtũm mã amnhĩ jarênh xà hã ixkre rũm kapêr o mẽ wrỳkjê hõja kato. ìhkra kamã kuteere xwa gixre py nẽ o xa. ¹⁸ Hãmri nhũm axte hõja ixkre rũm kê hkôt kato nẽ hkukamã kator xwỳnhta mã kapêr. Kàx pê kãm kapêr nẽ kãm:

—E na ra Tĩrtũm tanhmã mẽ kot amnhĩ tomnuj to hã tanhmã mẽ hipêx to kaxyw. Te mẽ kêp mẽ hpur kãm mẽmo xô pê uwa ra hkamrêk nẽ rênh mã tãm pyrãk. Jakamã ma pika hwỳr mẽ hwỳr wrỳ nẽ mẽ hkôt ri anhõ kuteere ho mẽ himex o ri apa. Anẽ.

¹⁹ Hãmri nhũm kuma nẽ ma pika hwỳr wrỳ nẽ mẽ hipêx o te mẽ kot uwa xô rênh nẽ prês kãm hkapĩr nẽ kagô janênh pyrã nẽ mẽ hkôt ri kuteere ho mẽ hpar o pa. Tĩrtũm ra mẽ kamã gryk tỳx o mẽ

kamã gryk tỳx jakamã nhũm ã mẽ hkôt mẽ hipêx anhỹr o ri pa.

²⁰ Jakamã nhũm mẽ hkamrô hpikapĩr rax kumrêx o uwa kagô jakre. Te ho pyhti hprôt o nôr pyræk. Jao upỳm o 2 met nẽ hkôt ho mễj met. Nom hprôt xà hkôt ry rax o ry rax. Ho 300 kirôm. Nhũm ã mẽ kamrô hprôt rax anẽ.

15

Tĩrtũm mex ã mẽ grer

¹ Tã pa axte kaxkwa kamã mẽmoj pumu. Hãmri nẽ amnhĩ jaêr pê omu nẽ tee ri hkukamã ija-maxpêr. Aa mẽ pahte mẽmoj ã kot anhỹr pumunh kêt xwỳnh pa pre omu. Nhũm Tĩrtũm kapêr o mẽ wrỳk xwỳnh pê 7jaja ahpỳnhã pika hkôt mẽ kot amnhĩ tomnuj xwỳnhjê homnuj kaxyw akuprô nẽ kuhê. ãm jajê pixjaja koja Tĩrtũm nhỹ hã axte tanhmã mẽ homnuj to nẽ ho anhỹr pa hãmri nhũm ra ja hapêx o hapêx.

² Jakamã pa axte Tĩrtũm kapem gô rax pumu. Te kot kàx karỳr jaxênh mẽ kuwy hpôk o pihkàr pyræk xwỳnhja hprôt o nỏ. Nhũm Tĩrtũm kra hkwỳjaja gô mỳ ri ohtô rax kumrêx nẽ kuhê. Na pre ra mrymnutija tee ri amnhĩ kôt mẽ rênh mã nẽ tee ri mẽ hã amnhĩ nhĩxi hã kagà hprãm kaprỳ nom nhũm mẽ hkaga nẽ Jejus kôt amnhĩ nhĩpêx rãhã ho pa. Nẽ mrymnuti karỏ ho sãnti mã mex ã harênh kêt rãhã ty nẽ kaxkwa hwỳr api. Jakamã nhũm Tĩrtũm amnhĩ tã mẽ omu nẽ mẽ kãm wiorãwti hkwy gô nhũm mẽ piitã hamỳ nẽ gô rax mỳ ri ho kuhê.

³ Hãmri nẽ Tĩrtũm mã tanhmã amnhĩ to ho pa xwỳnh pê Mojes mẽ mẽ pahte amnhĩ tomnuj

pānhã amnhĩrer xwỳnhta wa kot Tĩrtũm mã grerta
nhũm mẽ Tĩrtũm mã ho grer o kuhê nẽ grer o:

E Pahi Maati Tĩrtũm. Na pa mẽ ra inhmex pẽ awỳr
ixàpir pa.

Ãm hãmri na ka hte tanhmã amnhĩ nhĩpêx to ho ri
apa.

Aa tanhmã axêx to hkêt.

Nẽ mẽ ixrom axihtỳx o axihtỳx.

Nẽ mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj
pumunh kêt kwỳ ho anhỳr o apa.

Pika piitã hkôt ahpỳnhã mẽ ho amnhĩptàr xwỳnhjê
nhõ Pahi Maati na ka.

Nẽ ate tãm amnhĩ nhĩpêx xwỳnh na ka.

⁴ Jakamã na htem piitã atã hpijaàm o pa.

Nẽ amã mẽ kapêr xàptàr pix o amã kapêr.

Nẽ amã amex o amex ã ajarênh rãhã nẽ. Ãm hãmri
mẽ ixrom kapxipix amex o amex.

Jakamã koja ahpỳnhã pika piitã hkôt akrajê pi-
itã ate tãm amnhĩ nhĩpêx nẽ tãm mẽ piitã
tanhmã mẽ harênh to hã ajarênh ma nẽ
awỳr mra nẽ akutã hkõn krã ho rôrôk nẽ
hkrĩ nẽ amã amex o amex ã ajarê. Anẽ.

Mẽ homnu xà hã xijere jamỳnh xwỳnh jarênh

⁵ Tã na pa axte mẽmoj pumu. Kaxkwa kamã
Tĩrtũm nhõrkwỳ hã hitom xà piitã amnhĩ kahê xà
rẽ nẽ kuhê pa omu. Nẽ ixkre kamã õ hitom mex
maati haxwỳja amnhĩ kahê xà mẽ nẽ xa.

⁶ Hãmri nhũm ixkreja rũm Tĩrtũm kapêr o mẽ
wrỳk xwỳnh pẽ 7jaja hapôj nẽ kuhê. Mẽ ê hakajre
nẽ hirã htỳx kumrêx. Nẽ mẽ hinô pre xàja ôr pix o.

Ně piitã Tĩrtũm mã tanhmã kot mẽ homnuj to xà hã xijere pê 7ta jamỳnh kaxyw kuhê.

⁷ Hãmri nhũm mẽmoj tĩr pê kwatjê ôja mẽ kãm xijere hkwỳ jamỳ mẽ hwỳr o tẽ. Xijere kêp 7 mẽ piitã ôr o. Nhũm hamỳ mẽ Tĩrtũm kapêr o mẽ wrỳk xwỳnhhtajê hwỳr o tẽ mẽ ho mẽ hipêx nhũm mẽ ahpỳnhã hamỳ. Xijere kamã Tĩrtũm gryk xà jamỳ mẽ o kuhê.

⁸ Pu nhũm Tĩrtũm rũm kuwy hkũm hapôj. Tĩrtũm mex mẽ hihtỳx xwỳnhhta rũm hapôx rax o ixkreta kunor pa nhũm mẽ tee ri hwỳr gjêx prãm kaprỳ.

16

Xijere kamã mẽ homnu xà pê 7 jarênh

¹ Tã pa arĩ mẽmoj pumu nhũm Tĩrtũm nhõrkwỳ kamã mẽhõja kapêr o wrỳk xwỳnhh pê 7jê mã kàx pê kapêr mẽ mẽ kãm:

—E na pa ra mẽ kot ixkapêr kwỳm ri amnhĩ nhĩpêx xwỳnhjê pumu nhũm ixpê ja omnuj tỳx o ixpê omnuj tỳx. Jakamã e mẽ anhõ xijereta jamỳ mẽ ma pika hwỳr mẽ hwỳr wrỳ mẽ axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwỳr wrỳ. Anê.

² Hãmri nhũm mẽ kuma mẽ axpên pãnhã mẽ hwỳr wrỳ. Nhũm wamta kumrêx pika piitã hkôt mẽ homnu xàta kapĩ. Pu nhũm mẽ kot mrymnuti mẽ ô sãnti wa kãm mex ã harênh mẽ amnhĩ tã wa hixi jaxwỳr xwỳnhh piitã hkànhy hpa mẽ à htỳx kumrêx mẽ ri pa.

³ Hãmri nhũm wamta kôt hõja ô xijere py mẽ gô xujanãr kãm hkapĩr pa nhũm gô te mẽ htykjê kamrô pyrã mẽ kamã mẽmo mry htyyxà rênh xwỳnhh piitã pikaprãr pa.

⁴ Tã ra xijere kapĩr xwỳnh o axkrut nẽ õ xijere kapĩ hãmri nhũm hkõt hõta õ xijere py nẽ hpãnhã gô hkryre piitã hkõt hkapĩr pa. Pyhti nẽ ri hino piitã hkõt hkapĩr pa nhũm piitã gô xujanãr pyrã nẽ mẽ hkamrô hã amnhĩ jahkre hpa.

⁵ Hãmri nhũm axtem Tĩrtũm kapẽr o mẽ wrỳk xwỳnhjẽ hõ kot kãm gô piitã hamãr xwỳnhhta ja hã omu nẽ Tĩrtũm mã kãm:

Pa amex rãhã apa ho apa xwỳnh. Nẽ arãhã apa ho apa xwỳnh.

Nà ãm hãmri na ka ã mẽ kêp gõta nhĩpêx anẽ.

⁶ Na prem mẽ kot akõt amnhĩ nhĩpêx xwỳnhjẽ mẽ mẽ kãm ri akapẽr jarẽnh xwỳnhjẽ hpar o pa nhũm mẽ hkamrô hpikapĩr rax nẽ.

Tã ka ra mẽ hã mẽ kêp mẽ hkõm xà homnu hpa nhũm mẽ kêp mẽ hkamrô ã amnhĩ jahkre nhũm mẽ tee ri ho hkõm mã. Nà ãm hãmri na ka ã mẽ kêp gõ nhĩpêx anẽ Tĩrtũm. Anẽ.

⁷ Hãmri nhũm mẽ kot Tĩrtũm mã mẽmoj nhõr xà hã mẽsti hpar pê hkrĩ xwỳnhjẽ hõja kuma nẽ kãm:

Nà ãm hãmri na ã ajarẽnh anẽ Tĩrtũm.

Ãm hãmri na ka ã akrajẽ hã mẽ hipêx anẽ.

Ra ate mẽ hã amnhĩ jarẽnh xà hkõt na ka hte tanhmã mẽ hipêx to.

Nà apê mẽ inhõ Tĩrtũm Maati na ka. Mẽ ixrom axihtỳx o axihtỳx nẽ axàhpumunh o axàhpumunh. Anẽ.

⁸ Tã ra axkrunẽpxi nẽ õ xijere kapĩ. Jakamã nhũm mẽ hpãnhã hõja õ xijere o tẽ nẽ myyti hã hkapĩr pa nhũm hkagro htỳx nẽ pika hkõt mẽ pa xwỳnhjẽ hkà ho hxêt o pa.

⁹ Kagro htỳx o hkagro htỳx jakamã mẽ hkà ho hxêth nhũm mẽ kamã hkà kajê hpa. Hãmri nê tee ri amnhĩ pumu nê hamaxpêr o:

—Nà Tĩrtũmtija na ã mẽ pahomnuj tỳx anê. Anê.

Hãmri nê kamã gryk tỳx nê haprỳ nê tanhmã ho kapêr punuj to ho pa. Nom mẽ kot amnhĩ tomnuj kaga nê kãm mex o mex ã harênh kêt nê arĩ tanhmã amnhĩ tomnuj to ho pa.

¹⁰ Nhũm ra kêp kwat nê õ xijere kamã mẽmojja kapĩ. Jakamã nhũm ra hpãnhã hõja õ xijere o tẽ nê gôj rũm mrymnuti kot mẽ ho amnhĩptâr xà hã hkrĩ xà hã hkapĩr pa. Jakamã nhũm ra kot mẽ ho amnhĩptâr xà hã pikaja kamã kamàt kô htyk par kumrêx. Hãmri nhũm mrymnuti mẽ hkôt mẽ kot amnhĩ nhĩpêx xwỳnhjê hã kamàt kô hpa nhũm mẽ amnhĩ xà htỳx ã maj amnhĩ nham o axpêh kamnhar tỳx kumrêx. ¹¹ Nê ã Tĩrtũm kot mẽ hipêx anhỹr ã amnhĩ tã omu nê kamã gryk tỳx nê tanhmã ho kapêr punuj to ho pa. No ãm kot amnhĩ tomnuj xwỳnh ã amnhĩ pumunh nê kot amnhĩ tomnuj kaga hkêt nê.

¹² Nhũm prem ra kêp sĩk nê õ xijere kamã mẽmoj kapĩ. Jakamã nhũm hpãnhã hõja õ xijere kamã mẽmojta o tẽ nê pyhti pê Erax kamã hkapĩr pa nhũm gôja grà pa nê te kêp pry pyrà nê nõ. Jakamã nhũm myt japôx xà rũm mẽ ho amnhĩptâr xwỳnhjaja nê pôristijaja hãmri pijapu kaxyw Jeru-jarê hwỳr nojarêth nê hã hwỳr pa.

¹³ Tã nhũm kagãmnuti mẽ ỹ hã mẽ kãm hêx o pa xwỳnh mẽ mrymnutita wa mẽ hakwa rũm mẽmoj te priti pyrà nê hapôx o pa. No ãm priti hkêt mẽ kêp Satanasti mã mẽ àpênh xwỳnh kwỳy.

14 Jakamã na prem pika piitã hkôt mẽ kot aa mẽmoj pumunh kêt kwỳ ho anhỹr o hêx rom mẽ no kupyw o mẽ hkôt pa. Tã pika piitã hkôt mẽ ho amnhĩptàr xwỳnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtỳx o hihtỳx kurê kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwỳjê mã kapêr ã harênh

15 Tã nhũm Jejus pika hkôt hkrajaja arĩ mẽ htĩr nê pa xwỳnhjê mã kapêr nê mẽ kãm:

E mẽ inhma ixkwỳjaja. Akupỹm ixte mẽ awỳr ixwrỳk xà hã arĩgroja ã kot paj te mẽ àhkĩnh xwỳnh kot amnhĩ nhĩpêx pyrà nê mẽ ajaêr pê mẽ awỳr wrỳ. Jakamã kêr ka mẽ amnhĩ wỳr ijamãr rãhã ho apa. Kêr pa akupỹn wrỳ ka mẽ amnhĩ wỳr ixpumu nê akĩnh nê amnhĩ kamã amã ixpuma hkêt nê. Anê.

Mẽ kot axpên kurê kaxàr kaxyw mẽ pikuprõnh ã mẽ harênh

16 Tã nhũm Satanasti hkwỳjaja pika piitã hkôt mẽ ho amnhĩptàr xwỳnhjê ho pikuprõnh pa nê mẽ hkurê kaxàr kaxyw ma Ijaew kot kãm “Amaketõ” jarênhja wỳr mra.

17 Hãmri nhũm Tĩrtũm kapêr o mẽ wrỳk xwỳnh pê 7 kot hitepta õ xijere py nê kàx mã kamã mẽmoj kapĩr pa. Jakamã nhũm Tĩrtũm nhõrkwỹ kamã mẽ ho amnhĩptàr ã hkrĩ xà rũm Tĩrtũm kàx pê kapêr o:

—E hãmri. Na pa ra mẽ kot amnhĩ tomnuj mỳrapê tanhmã mẽ ho jatur xàm mẽnh kaxyw. Anê.

18 Pu nhũm na hkatõtök nê hkrakrak nê haxênh nhũm pika htertet tỳx nê. Aa mẽ kot pika htertet tỳx kot anhỹr ã omunh kêt kumrêx.

19 Jakamã nhũm Papirõnja kajê axkrunêpxi. Papirõn nhõ xwỳnhjaja kot amnhĩ tomnuj tỳx o paja mỳrapê nhũm Tĩrtũm ã mẽ hipêx anê. Nê pika htertet o pika piitã hkôt krĩ grành pa. 20 Nhũm gô hipôk piitã gôja hã axkamur nhũm hapêx pa. Nê kên prêk nê hkrã hixêt rôrôk nê hpigrành pa. Pika htertet tỳx kumrêx jakamã ã mẽmoj amnhĩ nhĩpêx anê. 21 Nê na mẽ pê jêr krã jakootija mẽ piitã mẽ hipy rôrôk. No ãm hkrã hkryre hkêt hkrã rũnh kumrêx. ãm hpỹnh nê kamã kêp 40 kir nê mẽ hã rôrôk nhũm mẽ tee ri amnhĩ tã ã omu nê Tĩrtũm kamã gryk tỳx nê haprỳ nê ho kapêr punuj nê.

17

Tĩrtũm kra hkêt xwỳnhjê jarênh

1 Tã pa pre kê axte mẽmoj pumu. Nhũm kot xijere jamỳnh xwỳnhjê hõja ixwỳr tẽ nê inhmã:

—E ma ixkôt tẽ nê mẽmoj pumu. Anê.

Hãmri pa kuma nê ma hkôt tẽ nhũm inhmã:

—Nà ahpỹnhã gô rax mỳri krĩ nhõ xwỳnhjaja te ho ni hkuprỳ gô mỳ ri ỹr nê kãm mẽmyjê piitã hkĩnh o ỹr xwỳnhhta pyràk. Na htem uràk nê Tĩrtũm kapêr kôt ri amnhĩ nhĩpêx kêt nê. ãm htỳx ri tanhmã amnhĩ tomnuj to ho pa. Jakamã koja Tĩrtũm tanhmã mẽ homnuj tỳx to nê mẽ ho hapêx. 2 Krĩ piitã hkôt mẽ ho amnhĩptàr xwỳnhjaja na hte ma mẽ õ krĩ hwỳr mra nê te mẽ kot mẽ hkuprỳjê ho amnhĩkati pyràk o amnhĩ nhĩpêx. Nê te pipãnh nê htỳx ri amnhĩ nhĩpêx pyràk o amnhĩ nhĩpêx o

pa. Nhũm krĩ nhõ xwỳnhjaja mẽ uràk nẽ amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nẽ ja hã mẽ omu. Anẽ.

³⁻⁴ Hãmri nhũm Tĩrtũm Karõ tanhmã ixto nhũm kapêr o wrỳk xwỳnhja ma kapôt wỳr ixto mỗ pa kapôt ã mrymnuti hkrã kêp 7 nẽ kamã hpàr kêp 10 xwỳnhta pumu nhũm hkamrêêti nẽ xa. Nẽ ĩ piitã hã tanhmã Tĩrtũm o kapêr punuj to hã kagà. Nhũm katut ã mēhõ ni kuprỳta nhỹ. Mẽ ho amnhĩptàr xwỳnh ã mẽ ê kakrã htyk nẽ hkamrêk o hkukàr jaxà nẽ hã nhỹ. Nẽ ôr o ôkrexê. Nẽ ôr o hinwỳyê nẽ ĩhkra kamã kàx. ãm ôr pix o hikukrêx. Nẽ kẽn mex karỳr pix o amnhĩ jamrêx. Nẽ ôr o kopti hõ py nẽ hã nhỹ. Kopti kamã ni kuprỳ kot amnhĩ tomnuj xà. ãm kot mẽ kêp mẽ mjên o amnhĩkati ho pa xà pix nhũm kupy nẽ o nhỹ.

⁵ Nẽ ôkrã hã amnhĩ nhĩxi hã kagà kot:

Inhĩxi pimxur pê PAPIRÕN RAXTI.

Nẽ ixpê mẽ kêp mẽ mjênjê ho amnhĩkati ho mẽ pa xwỳnhjê nã na pa.

Nẽ ixpê mẽ kot axpẽn prõ ho amnhĩkati o mẽ pa xwỳnhjê nã na pa.

Nẽ ixpê mẽ kot Tĩrtũm nê mẽ kãm hêx o ri mẽ pa xwỳnhjê nã na pa.

Nẽ ixpê mẽ kot Tĩrtũm kapêr kôt amnhĩ nhĩpêx o pa hkêt xwỳnhjê nã na pa.

Anhỹr o ôkrã hã amnhĩ nhĩxi hã kagà kot anhỹr.

⁶ Nhũm axpã nẽ nhỹ pa omu. No ãm kagôxỳhti ho hpipãnh kêt. Mẽ kot Jesus kôt amnhĩ xunhwỳr nẽ ri mẽ kãm Jesus kêp mẽ õ pahĩti hã harênh xwỳnhjê kamnhwỳr o mẽ hpar nhũm mẽ hkamrô pikapĩr

xwỳnhjê kamrô ho na pre axpã nê nhỹ. Pa ã kot amnhĩ nhĩpêx anhỹr ã omu nê tee ri ijamaxpêr.

7 Hãmri nhũm Tĩrtũm kapêr o wryk xwỳnhja inhmã:

—Kwa mon ka ri ja pumu nê tee ri ajamaxpêr? E kot paj ixprĩ hã amã harê ka inhma. Niti mẽ hã ỹr xwỳnh pê mrymnutita. Krã pê 7 nê kamã hpàr pê 10 xwỳnhhta kot paj ixprĩ hã amã hamẽ wa harê ka wa harênh ma.

8 —Nà mrymnutija na pre htĩr nê ri pa tã ty nê ahkre xupỹmti kamã hikwỹ. Nom koja akupỹm htĩr nê kurũm kato nhũm mẽ piitã omu nê ahpỹnhã tanhmã hamaxpêr to. Amnepê m kormã amrakati ri Tĩrtũm kot õ kagà kamã mẽ htĩr tũm nê mẽ pa mã xwỳnhjê nhĩxi jaxwỳr xwỳnhjaja koja kator ã omu nê ãm omu nê tanhmã hamaxpêr to hkêt nê. No mẽ kot Jejus kôt amnhĩ xunhwỳr kêt xwỳnhjaja koja mẽ amnhĩ jaêr pê akupỹm kator ã omu nê tee ri hkukamã hamaxpêr. Hãmri nê axpên mã: “Kwa amnepê m htyk tã ra tanhmã amnhĩ to nê akupỹm htĩr nê api nê mỗ.” Anhỹr o axpên mã harê. Hãmri nhũm kato nê ma tẽ nhũm Tĩrtũm tã ho hapêx kumrêx nhũm hapêx o hapêx.

9 —Kwa inhma nê jam ajamaxpêr tỳx nê. Mrymnuti krã pê 7ta te kêp hixêt prêk pê 7 pyrà nê hã ỹr xwỳnh ni kupryta te hixêt prêk pê 7ta ã ỹr pyràk.

10 —Nê mrymnuti hkrã pê 7ja te kêp mẽ ho amnhĩptàr xwỳnh pê 7 pyràk. Nhũm mẽ ho amnhĩptàr xwỳnhjaja te mẽ kêp 5 nê ra htyk pyràk nhũm hkôt hõja arĩ mẽ ho amnhĩptàr o pa. No kot hitepta kormã. Nom koja mẽ ho amnhĩptàr ry hkêt nê.

11 —Mrymnuti htĩr nẽ pa htã htyk nẽ ra akupÿm htĩr nẽ àpir xwÿnhhta koja hkrã hitepta pãnhã mẽ ho amnhĩptàr o pa. Jakamã te mẽ ho amnhĩptàr xwÿnh pê 7jẽ hõ pyrãk. Kojã hkrã pê 7ja mẽ ho amnhĩptã nẽ gaa nẽ htyk mẽ nhũm hpãnhã mrymnutita hpãnhã mẽ ho amnhĩptã. Hãmri nhũm rĩ kormã Tĩrtũm tã mẽ ho hapêx par kumrêx.

12 —Nẽ ate mrymnuti hkrã kamã pàr pê 10 pumunh xwÿnhhta te mẽ kêp mẽ ho amnhĩptàr xwÿnh pê 10 pyrãk. No ãm jaja na kormã mẽ ho amnhĩptàr kêt nẽ. Kojã mẽ nhÿrmã anhĩpê mrymnuti nhÿ hã ahpÿnhã ri mẽ ho amnhĩptàr o pa nom mẽ ho amnhĩptàr japjê hkêt nẽ. ¹³ Kojã mẽ tanhmã ja hã axpẽn mar to hãmri nẽ mrymnuti mã anẽ nhũm mẽ hpãnhã mẽ piitã mẽ ho amnhĩptã.

14 —Nẽ mẽ ho amnhĩptàr xwÿnh pê 10jaja koja mẽ pahte amnhĩ tomnuj pãnhã amnhĩrer xwÿnh kurê kaxãr kaxyw hwÿr mra nẽ kutã pijapu ho kuhê. No ãm tee ri kãm tanhmã ho hprãm hkaprÿ nhũm mẽ ho axtem nẽ amnhĩ tã mẽ himex pa. Hihtÿx o hihtÿx o kot mẽ ho hpimràatã mẽ hakrenh par. Nẽ kêp pika piitã hkôt mẽ ho amnhĩptàr xwÿnhjê nhõ Pahihti. Tãm na pre amnhĩ wÿr mẽ kot hkôt amnhĩ nhĩpêx o mẽ pa xwÿnhjê wÿ nhũm htem amnhĩ kaxyw hkôt hamaxpêr mex rãhã ho pa. ¹⁵—Nẽ krĩ pê Papirõn kapem gô xohtô mÿ ri ni kuprÿ hkrĩ xwÿnhhta. Gô xohtôja te kêp ahpÿnhã ri pika piitã hkôt mẽ uro hkwÿ pyrãk. Nẽ te ahpÿnhã ri mẽ kapêr xwÿnh kwÿ pyrãk.

16 —Nẽ mrymnuti hpàr pê 10ta kêp mẽ ho amnhĩptàr xwÿnh pê 10 pyrãk. Jakamã koja mẽ kãm ni kuprÿta prãm nõkati nẽ kamã gryk tÿx

kumrêx. Hāmri nê hwÿr mra nê kêp hikukrêx piitã utà nê kêp ê hkwrÿnh pa nhũm hkênh mex nê xa. Hāmri nhũm mẽ kupĩ nê ĩ hkrêr pa nê kuwy kamã hi rê nhũm kaxàr pa nê hapêx.

¹⁷—Na pre pahi pê 10jaja mrymnuti hkôt amnhĩ xunhwÿ nhũm Tĩrtũm ãm ja hã mẽ omu nê tanhmã nê mẽ kãm nê hkêt nê. Jakamã koja mẽ ãm hkôt pix mã amnhĩ nhĩpêx o pa rãhã nhũm Tĩrtũm mẽ ho hapêx. Nê mẽ õ krĩ mẽ mẽ ho hpimràatã mẽ ho hapêx pa. Hāmri nê mẽ ho hapêx o mẽ ho hapêx.

¹⁸—Nê ate mēhõ ni kuprÿ pumunh xwÿnhhta te kêp krĩ rax pê Papirõn nhõ xwÿnhjê pyrãk. Nê mẽ ho amnhĩptàr xwÿnhja pika piitã hkôt mẽ ho amnhĩptàr xwÿnhjê hkrãhtũm na. Anê.

Ã Tĩrtũm kapêr o mẽ wrÿk xwÿnhja inhmã mẽ harênh anê. Pa kuma nê ô ri mẽ amã hã kagã. Mẽ ate kamã harênh nê aprĩ hã mar tÿx kaxyw.

18

Tĩrtũm kot Papirõn grãnh par ã harênh

¹ Tã pa kê axte mẽmoj pumu. Nhũm axte Tĩrtũm kapêr o mẽ wrÿk xwÿnhjê hõja kaxkwa rũm ahpar mã wrÿk o tẽ. Tĩrtũm nhÿ hã hihtÿx nê kamã hirã rax kumrêx o pika piitã hkôt mẽ kãm hirã pa. ² Nê ahpar mã tẽn wrÿ nê kàx pê kapêr o:

E koja Papirõnja pigrãnh pa nê hpãnhã kêp Satanasti mã mẽ àpênh xwÿnhjê papxã nê kêp nhõnhti papxã. Hāmri nê aa kamã mẽmoj mex kêt kumrêx.

³ Krĩ nhõ xwÿnhjaja na htem Tĩrtũm kapêr kôt amnhĩ nhĩpêx kêt nê amnhĩ krã hkôt kãm prãm xà hkôt pix mã tanhmã amnhĩ tomnuj

to ho pa. Te mēhō pipānh nē htỳx ri amnhĩ
nhĩpêx o pa pyrāk.

Nhũm krĩ piitā hkôt mē ho amnhĩptār xwỳnhjaja
mē hwỳr mra nē mēnijê ho amnhĩkati ho pa.

Nē krĩ nhō xwỳnhjaja mēmoj pumu nē kām hkĩnh
nē haprôr kurê kumrêx o pa nē aa ujaoprôr o
hapêx kêt nē.

Jakamā na hte krĩ hkwỳ nhō xwỳnhjaja mē hwỳr
mēmoj to pa nē xatā mē kām ho wēnê nē mē
kukwak ri mē hikàxpore rũnh nē pa.

Anhỳr o kapêr. ⁴Hāmri nhũm Tĩrtũm Papirõn kamā
hkrajê mā kapêr nē mē kām:

E mē tokyx mē kot ri htỳx amnhĩ nhĩpêx xwỳnhjê
nhō krĩta rũm ajapôj ixkrajaja.

Kot kaj mē anhỳr kêt nē ra mē hkôt amnhĩ nhĩpêx
pa mē ato apimràatā mē ate amnhĩ tomnuj
ã mē atomnuj tỳx nē.

⁵Krĩ nhō xwỳnhjaja na htem amnhĩ tomnuj rũnh o
pa.

Mē kot amnhĩ tomnuj xà te mē kot kēn katutxô
nhũm hprêk rax o kot kaxkwa kanhwỳr
kaxyw pyrāk.

Na pa hte ã mē kot amnhĩ nhĩpêx anhỳr ã mē
omunh rāhã ho ri ixpa. Jakamā kwa ixkra-
jaja mē tokyx mē kurũm ajapôj.

Anhỳr o hkrajê mā kapêr. Hāmri nē kapêr o mē
wrỳk xwỳnhjê mā kām:

⁶E kwa mē ma mē hwỳr wrỳ nē tanhmã ixkrajê hã
mē ho.

No ãm kêr ka mē tanhmã mē ho htỳx o mē kot ra
tanhmã ixpê ixkrajê nhĩpêx tota jakre.

Kê mẽ tanhmã ixpê mẽ ho grire htã ka mẽ hã
tanhmã mẽ ho htỳx kumrêx o mẽ kot mẽ
hipêxta jakre.

⁷ Krĩ nhõ xwỳnhjaja na prem mex nê pa.

Nê mẽ hikukrêx rũnh nê hkĩnh nê pa.

Nê tanhmã amnhĩ to jarkrar to ho ri pa nê amnhĩ
jarênh o:

“Ot pa mẽ te pahi ni kot amnhĩ nhĩpêxta pyrã nê
ixkrĩ xà mex pix kãm ixkrĩ pyrãk.

Nê te Tĩrtũm kot amnhĩ nhĩpêx pyrãk o na pa htem
amnhĩ nhĩpêx o ri ixpa.

Nê mẽ ixkĩnh nê mẽ inhmex rãhã ri ixpa.

Ã mẽ ixte amnhĩ nhĩpêx anhỹr xwỳnh na pa mẽ.”

Anhỹr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta
pãnhã omnuj tỳx nê pa.

Nê kê mẽ hkaprĩ nê amnhĩ xà htỳx kãm hamak
rãhã nê pa ho pa.

⁸ E kê mẽ ã amnhĩ nhĩpêx anhỹr o pa.

Jakamã koja mẽ arĩgro hpỹnh kãm mẽ hkwỳjaja
hpikaprãr rũnh nê nhũm arĩ mẽ htĩr
xwỳnhjaja omnuj nê pa.

Nê tee ri amnhĩ pumu nê hkaprĩ xàj mỳr o pa.

Nê amnhĩ xà htỳx kãm hamak o pa.

Nê tee ri amnhĩ nhĩpêx o pa.

Nê kãm prãm nê pa rãhã ty nhũm kuwy mẽ ho
hkaxàr pa.

Ixpê Pahi Maati Tĩrtũm kot paj ixihtỳx kãm ã mẽ
hipêx anê. Anê.

⁹ Hãmri nhũm krĩ piitã kurũm mẽ ho amnhĩptàr
xwỳnhjaja. Mẽ kot mẽ hwỳr mrrar nê mẽ hkuprỳjê
ho amnhĩkati nê mẽ uràk nê mẽmoj pumunh nê

haprôr rãhã ho pa xwÿnhjaja tee ri krĩ kaxàr nẽ kàx mã kuwy hkũm àpir o paja pumu nẽ hkaprĩ nẽ mÿr o kuhê.

¹⁰ Nẽ Tĩrtũm kot mẽ ho hapêx par ã mẽ omu nẽ kãm ma htÿx kumrêx. Amÿm mẽ omunh o kuhê nẽ tee ri amnhĩ kukamã hamaxpêr nẽ htertet tÿx nẽ. Nẽ mÿr kãm kapêr o:

Hêxta waa nẽ Papirõn nhõ xwÿnhjaja.

Mẽ amex nẽ axihtÿx mex nẽ apa htã nhũm Tĩrtũm mẽ anhĩmex pa. Hêxta waa nẽ. Anẽ.

¹¹ Nẽ mẽ hwÿr mrrar nẽ mẽ kãm mẽmoj to wênê ho mẽ pa xwÿnhjaja haxwÿja krĩ pumu nẽ tee ri amnhĩ kukamã hamaxpêr nẽ hkaprĩ nẽ mÿr o kuhê. Nhÿri koja mẽ tokÿx axte mẽmoj to wênê? Mẽ kêp mẽmoj japrôr rũnh xwÿnhjaja hkaxàr par kumrêx kênã.

¹² Na prem mẽmoj piitã ho pa nẽ mẽ kãm ho wênê. Mẽmoj mex piitã. ôr o mẽ hkukrêx nẽ prat o mẽ hkukrêx nẽ kên jaxênh ã kàxpore xohtôô. Nẽ kupêxê mex. Kakrã htyk nẽ hkamrêk nẽ hkroore nẽ hã hapjê. Nẽ mẽmo pĩ kuxware nẽ pĩ htÿx nẽ kên jakàr nẽ kàx o ri mẽmo nhĩpêxja nhũm prem mẽ kãm ho wênê ho pa. ¹³ Nẽ mẽmo htwÿm nẽ mẽ hkuxwa xà. Nẽ mẽ õ ho ành xà nẽ mẽ õ kuxwa xà nẽ xwÿgrà nẽ harôj. Nẽ môx nẽ ôwêhti nẽ kawar nẽ kaxyw kawarti hkjênh xà hã karrotre. Nẽ nhÿhÿnh krĩ hõ kamã panhĩ hkwy pynê nẽ mẽ hwÿr mẽ o pa nẽ mẽ kãm mẽ ho wênê nhũm mẽ amarĩ mẽ hkôt ri àpênh rũnh o pa. Na prem ã mẽ kãm mẽmoj to wênê anhÿr o pa. Tã ra mẽ kot mẽ haprôr xwÿnh mẽ mẽ pimràatã hapêx pa.

¹⁴ Jakamã nhũm mẽ tee ri mẽ hkukamã hamaxpêr nẽ te kot mẽ kãm kapêr pyrã nẽ mẽ

kām:

Hêxta waa nê. Mě amã mẽmoj prãm nê amnhĩm haprôr xwýnhta na mẽ apê hapêx par kumrêx.

Nê mẽ akàxpore rũnh nê mẽ akukrêx rũnhta mẽ mẽ apimràatã ajapêx pa. Kot kaj mẽ axte tanhmã amnhĩ nhĩpêx to ho apa hkêt nê. Anê.

¹⁵ Hãmri nê amým ri Tĩrtũm kot tanhmã mẽ hipêx to hã mẽ omu nê kãm ma xàj mur nê htertet o kuhê.

¹⁶ Nê mỳr kãm kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mẽ hikukrêx mex o amnhĩ jamrêx nê ri hã mra. Nê ôr nê kên mex ã ohtô xwýnh o amnhĩ jamrêx nê ri hã mra.

¹⁷ Tã ra hapêx par kumrêx. Anê.

Hãmri nhũm gô xujanãr kãm pàr nhõ dõn nê mẽ kot mẽ kãm pàr o ri mrrar xwýnhjaja nê mẽ kot kamã tep pynênh xà ho tep pynênh o ri mẽ pa xwýnhjaja nê pàr kãm amarĩ mẽ pa xwýnhjaja hãmri mẽ hwỳr mra nê wamtajê pyrã nê tee ri amým ri mẽ õ krĩ pumu nê mỳr o kuhê. ¹⁸ Nê kurũm kuwy hkũm xàpir o pa hã omu nê tee ri mẽ hkukamã hamaxpêr nê axpên mã:

Hêxta waa nê. Krĩ mũj na pre mex o mex. Mex o krĩ piitã hakrenh par htã hapêx pa. Anê.

¹⁹ Hãmri nê mur nê hkaprĩ xàj pika hkwy jamỳ nê ho amnhĩ kamĩ nê mỳr kãm kapêr o:

Hêxta waa nê. Krĩ mũj na pre rax o rax.

Nhũm pre nhỹhỹnh pàr kãm mẽmoj to wênê ho pa xwýnhjaja mẽ hwỳr mẽmoj to pa nê mẽ kãm

ho wēnê nē mē hkukwak ri hikàxpore rŭnh
nē ri pa.

Tā hāmri mē hapêx pa. Anē.

²⁰ Hāmri nhŭm Tirtŭmja krajê piitā mē kām kapēr
nē mē kām:

E ixpê Tirtŭm na pa ā mē hipêx anē.

Mē kot mē apê ixkrajaja tanhmā mē atomnuj to ho
paja mŷrapê na pa mē atā ā mē hipêx anē.

Jakamā e kaxkwa kamā mē apê ixri mē apa
xwŷnhjaja.

Nē mē ate inhŷ hā ri mē kām ixkapēr jarēnh o mē
apa xwŷnhjaja.

Nē Jejus nhŷ hā mē akapēr o ri mē apa xwŷnhjaja.
Mē apiitā mē apê ixkra na ka mē.

E mē amnhī tā ja pumu nē akīnh nē axpēn mā
apikunhar o akuhê. Pa na pa mē atā ā mē
ho ijapêx anē. Anē.

²¹ Tā nhŭm kapēr o mē wrŷk xwŷnhjê hōja hihtŷx o
kēn rax kumrēxja mŷ nē o tē nē gō xujanār kamā
kām gēt nē kumē nhŭm mrō nē akunok. Hāmri
nhŭm kapēr o:

E krīta koja Tirtŭm te ho ixte gōx kām kēn mēnh
nhŭm mrōr nē hpikunor pyrāk o hipêx
nhŭm hapêx par kumrēx.

²²⁻²⁴ Na pre hte krīja kamā mē kot ri mē kām mēmoj
tō wēnê xwŷnhjaja amnhī to rŭnh o krī piitā
hkôt mē hakrenh pa.

Nē krī nhō xwŷnhjaja na prem pika piitā hkôt
hêx rom tanhmā mē no kupyrr to ho ri pa.
Jakamā ra mēmoj to wēnê xwŷnhjê pyrā nē
mē hikukrêx rŭnh gryk ā Tirtŭm kaga.

No ām ja pix kêt. Tirtŭm krajê mē Tirtŭm nhŷ hā
kapēr o mē pa xwŷnhjaja na prem mē himex

rax nẽ. Hãmri nhũm krĩ piitã kamã mẽ pa
xwýnhjaja mẽ kot mẽ hipêx ã mẽ omu nẽ mẽ
urak nẽ ã mẽ hipêx anhÿr o pa.

Tã Papirõn nhõ xwýnhjaja kot mẽ hipêx anhÿrja
mÿrapê koja Tĩrtũm mẽ himex par kumrẽx.

Jakamã koja mẽ axte hkĩnh nẽ hkĩnh xaj ri grer kêt
nẽ.

Nẽ axte hkĩnh nẽ grer kãm hakwa kôr o ri pa kêt nẽ.

Nẽ axte ri wiorãw kakrênh hkêt nẽ.

Nẽ axte ri amnhĩm kawà hyr o hkrĩ hkêt nẽ.

Nẽ axte harôj kahuk o kuhê hkêt nẽ.

Nẽ axte mẽ ôrkwÿ kamã kanê hpôk kêt nẽ.

Nẽ axte axpẽn mã ri hkrajê rer o ri pa hkêt nẽ. Koja
ã mẽmoj kot anhÿr piitã hapêx pa. Anẽ.

19

Mẽ kot Tĩrtũm mex ã mẽ harênh

¹ Tã pa kê axte mẽmoj pumu. Nẽ kaxkwa
kamã mẽ kapêr ma nhũm mẽ ohtô rax kumrẽx
nẽ tanhmã axpẽn mã kapêr to. Nẽ anhĩpê kàx pê
kapêr tÿx nẽ kapêr o:

E pu mẽ pahpiitã Tĩrtũm mã mex o mex ã harê.

Tapxipix na hihtÿx o hihtÿx.

Nẽ tapxipix na àhpumunh o àhpumunh.

Nẽ tapxipix na mex o mex.

Tapxipix na mex o kot mẽmoj piitã hakrenh par.

Ra kot mẽmoj punuj pê mẽ papytâr par jakamã kêp
mẽ papytâr xwýnh ã pixi mex na.

² Na hte amnhĩ jarênh xà hkôt tanhmã mẽmoj to ho
pa.

Nẽ amnhĩ to hêx kêt nẽ.

Tã ãm hãmri na ã Papirõn nhõ xwýnhjê nhĩpêx anẽ.

Na prem mẽ kãm Tĩrtũm kapẽr jarẽnh o mẽ pa
xwỳnhjê nhĩmex rax kumrẽx.

Nẽ krĩ piitã hkõt ri pa nẽ amnhĩ kõt mẽ kurẽ nhũm
mẽ kuma nẽ mẽ hkõt amnhĩ tomnuj o pa.

Nhũm Tĩrtũm tee ri hã mẽ omu nẽ ã hkrajê hã mẽ
hipêx kati anẽ. ãm hãmri na ã mẽ hipêx anẽ.

Anhỹr o axpẽn mã harẽ. ³ Hãmri nẽ xatã axpẽn mã:
Nã ãm hãmri na ã mẽ panhõ Tĩrtũmja mẽ hipêx anẽ
nhũm mẽ kurũm kuwy hkũm kàx mã àpir o
pa.

Koja krĩ nhõ xwỳnhjaja amnhĩ xà htỳx kamã
hamak rãhã ho pa nẽ aa à htỳx hapêx kêt.

E pu mẽ hã Tĩrtũm mã mex o mex ã harẽ. Anẽ.

⁴ Hãmri nhũm mẽ àptàr tũm pẽ 24 mẽ mẽmoj tĩr pẽ
kwatjaja hãmri Tĩrtũm kot mẽ ho amnhĩptàr ã hkrĩ
xà maati kutã rôròk nẽ kãm hipô hpa. Hãmri nẽ ã
mẽ kapẽr anhỹr xwỳnhjê mã kapẽr nẽ kãm:

Nã ãm hãmri na ka mẽ ã Tĩrtũm mex ã harẽnh anẽ.
E pu mẽ pahpiitã kãm mex o mex ã harẽ.
Anẽ.

⁵ Hãmri nhũm mẽhõja Tĩrtũm krĩ xà maati kamã
kapẽr o:

E mẽ axte Tĩrtũm mã mex o mex ã harẽ.

Mẽ ate Mẽpahpãm kõt amnhĩ nhĩpêx o mẽ apa
xwỳnhjaja.

Nẽ mẽ apê mẽ ho amnhĩptàr xwỳnhjaja nẽ amarĩ
ri mẽ apa xwỳnhjaja nẽ mẽ apiitã mẽ ate
Tĩrtũm ã apijaãm o mẽ apa xwỳnhjaja kãm
mex o mex ã harẽ. Anẽ.

*Kot mẽ pahpãnhã amnhĩrer xwỳnh mẽ hkwỳjê
jarẽnh*

⁶ Tã pa tanhmã mẽ kapẽr to hã mẽ kuma nhũm
mẽ kàx pẽ kapẽr tỳx nẽ. Te mẽ ohtô rax kumrẽx

kapēr pyrāk. Nē te gô koko htỳx rỳ na katõtök tỳx pyrāk. Hāmri nē mẽ kapēr o:

E na ra Tirtũm kệp mẽmoj piitã ho amnhĩptàr xwỳnh.

Nē kệp mẽ panhõ Pahi Maati.

Nē hihtỳx o hihtỳx nē àhpumunh o àhpumunh.

E pu mẽ kãm mex o mex ã mãn harẽ.

⁷⁻⁸Nē hã pahkĩnh nẽ.

Nē kãm hihtỳx o hihtỳx ã harẽ.

Te mẽ kot axpẽn mã mẽ rer xwỳnh kot amnhĩ nhĩpêx pyrāk.

Jao mẽ pahte amnhĩ tomnuj pãnhã amnhĩrer xwỳnhhta te kệp myja pyrāk.

Nē mẽ kot hkõt amnhĩ nhĩpêx xwỳnh piitã te mẽ kệp nija pyrāk.

Nē te mẽ kot axpẽn mã wa rer nhũm wa kot axpẽn kõt pa ho pa pyrāk o koja mẽ amnhĩ nhĩpêx.

Nē te mẽ kot mjên mã xwỳnh mã ê mex jakare nhõr nhũm kot hagjênh pyrāk. Nē ê mexja te mẽ kot tãm amnhĩ nhĩpêx xà pyrāk. Anẽ.

⁹Hāmri nhũm Tirtũm kapēr o wrỳk xwỳnhja inhmã:

—E Juãw. Pa amã mẽmoj jarẽ ka mar tỳx nẽ akwỳjê mã hã kagà. Tirtũm kapēr kwỳ kot paj amã harẽ. Kệp Tirtũm kapēr jakamã ãm hāmri na. Na hte mẽmoj jarênh o hêx kêt nẽ. E kapēr ã kagà ho: Na htem axpẽn mã mẽ rer kaxyw nẽ amnhĩ wỳr hkwỳjê wỳ nhũm mẽ hwỳr mra nẽ wa hã hkĩnh nẽ apkur mex nẽ.

Ja pyrà nẽ Tirtũm kot amnhĩ wỳr mẽ hwỳr xwỳnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwỳnhhta wỳr api nẽ ã amnhĩ nhĩpêx anẽ nẽ hkĩnh nẽ apkur mex nẽ.

Hāmri nhũm Tĩrtũm mẽ ho mex rax kumrẽx. Anẽ.
—E kêr ka ã akwỳjê mã ja hã kagà anẽ Juãw. Anẽ.

Hāmri pa kuma nẽ kagà ja kamã mẽ amã hã kagà. ¹⁰ Hāmri nẽ hã kagà hpa nẽ ra ixte kãm mex o mex ã harẽnh kaxyw kutã ixkõn krã ho tẽm nẽ nhỹ nhũm tee ri amnhĩ tã ixpumu nẽ inhmã:

—Kwa ã ri inhĩpêx anhỹr kêt nẽ. Apyrà nẽ ixte Jejus mã tanhmã amnhĩ nhĩpêx to xwỳnh kẽnã. Jejusja apyrà nẽ kêp inhõ pahшти na. Jejus kapêr na prem hkukamã mẽ kot Tĩrtũm nhỹ hã kapêr o mẽ pa xwỳnhjaja hã kagà nẽ mẽ kãm harẽnh o pa. Jakamã kwa pu mẽ Tĩrtũm pix kutã mãn pahkõn krã ho parôrôk nẽ pahkrĩ nẽ kãm mex o mex ã harẽ. Anẽ.

Kawar jaka hã ỹr xwỳnh jarẽnh

¹¹⁻¹⁶ Tã pa kê axte mẽmoj pumu. Nhũm kaxkwa axkjê nhũm kamã kawar jakajre xa nhũm mẽhõja hã nhỹ. Hixi na pre kêp “Aa kot Tĩrtũm kaga hkêt xwỳnh.” Anẽ nẽ hixi hõ na pre kêp: “Tĩrtũm kôt pix mã amnhĩ nhĩpêx o pa xwỳnh.” Anẽ. ã hixi kot anhỹr jakamã na hte katàt kôt ahpỹnhã mẽ kot amnhĩ nhĩpêx ã mẽ omunh xà hkôt tanhmã mẽ harẽnh to. Mẽ kot amnhĩ to mex ã mẽ omunh xà hkôt tanhmã mẽ hkwỳjê jarẽnh to nẽ mẽ kot amnhĩ tomnuj ã mẽ omunh xà hkôt ahpỹnhã tanhmã hkwỳjê jarẽnh to. Na pre mẽ kot tanhmã hkwỳjê nhĩpêx to ho pa xwỳnhjê kutã amnhĩ xunhwỳ nẽ mẽ hã tanhmã mẽ ho. ã na pre kawar ã ỹr xwỳnhja amnhĩ nhĩpêx anhỹr o pa.

Nẽ no te kot kuwy hpôk pyràk jakamã hprĩ hã mẽmoj piitã omu nhũm mẽmoj kêp hpimxur kêt nẽ. Nẽ kêp pahi hã mẽ ahkà ho ohtô nẽ kutu. Nẽ

nhỹhỹnh ã hã hixi hõ hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrô ho ê xy hpa nẽ xa. Nẽ hixi hõ pê:

TĪRTŪM KAPĒR O AMNHĪRĪT XWŸNH

Nẽ ê ryti hã hixi hõ hã kagà. Nẽ ihkjê hã ãm tãm. Hã kagà jarẽnh kot:

Ixpê mẽ ho amnhĩptàr xwŸnh piitã mẽ õ Pahi
Maati na pa.

Nẽ hakwa rŭm wapo xwa gixre põm katon ajêt. Kot ho tanhmã mẽ kot TĪrtŭm mẽ wa kutã amnhĩ xunhwŷr xwŸnhjê nhĩpêx to kaxyw. Jakamã ra mẽ piitã mẽ ho pikuprõnh pa nẽ mẽ hipêx o te mẽ kot prês kãm uwa xô kagô janênh pyræk nhũm mẽ hkamrô hpikapĩr rax kumrêx. TĪrtŭm xihtỳx xwŸnh kot mẽ kamã gryk tỳx jakamã nhũm ã kãm mẽ hipêx anẽ. Mẽ kot amnhĩ tomnuj o paja mỳrapê.

Nhũm õ pôristi piitã uræk nẽ kawar jakare hã hkrĩ nẽ hkôt ri pa. Mẽ ê jaka muxre jagjê nẽ hã ma hkôt ri pa.

¹⁷⁻¹⁸ Tã pa axte TĪrtŭm kapêr o mẽ wrỳk xwŸnh òja pumu nhũm myyti kutã xa nẽ kàx pê nhônhti mã kapêr nẽ mẽ kãm:

—E mẽ amnẽ mẽ ixwŷr wrỳ nẽ TĪrtŭm ã akĩnh nẽ mẽ htyk nẽ mẽ hikwỹ xwŸnhjê hã atu nẽ aku. Mẽ ho amnhĩptàr xwŸnhjaja nẽ pôristijaja nẽ mẽ hkrãhtŭm nẽ kawar nẽ kawar ã mẽ hkrĩ nẽ ri mrar xwŸnhjaja nẽ mẽ kot amnhĩ to rŭnh xwŸnhjaja nẽ mẽ kot amnhĩ to hkryre xwŸnhjaja. Nẽ mẽ kãm mẽ àpênh xwŸnhjaja nẽ amnhĩ mã ri mẽ àpênh xwŸnhjaja. ãm mẽ htyk nẽ mẽ hikwỹ xwŸnh mŭj piitã mãmrĩ mẽ hwŷr wrỳ nẽ mẽ hã atu nẽ mẽ aku. E mẽ tokyx nhônhti. Anẽ.

19 Tã nhũm mrymnuti nẽ krĩ piitã hkôt mẽ õ pahi nẽ mẽ õ pôristijaja piitã axpẽn wỳr akuprõ. Wam kawar jakare hã ỳr nẽ htẽm xwỳnh mẽ õ pôristijê hwỳr hprõt nẽ mẽ hkurê kaxàr kaxyw axpẽn mar kaxyw akuprõ.

20-21 Hãmri nẽ mẽ hwỳr mra nẽ mẽ hkurê kapa. No ãm tee ri amnhĩ nhĩpêx nẽ tee ri kãm tanhmã mẽ ho hprãm hkaprỳ nhũm wam kawar jakare hã ỳr nẽ htẽm xwỳnhhta hakwa rũm wapo xwagixre kator o mẽ himex pa. Hãmri nhũm mẽ hkwỳjê pyràn htyk pa nẽ hikwỹ. Nhũm nhônhti mẽ omu nẽ mẽ hwỳr wrỳk o mra nẽ mẽ kuku hãmri nẽ kãm mẽ hkur kaga nẽ mẽ hkaga. No nhũm mrymnuti nẽ ỹ hã mẽ kãm hêx o pa xwỳnhhta wa nhũm mẽ axtem nẽ htĩr rãhã wa unê nẽ ma wa o tẽ nẽ ẽsôf o kuwy maati kamã wa kumẽ. Hãmri nhũm wa kamã htĩr tũm nẽ hxêt rãhã nẽ pa ho pa nẽ aa htyk kêt nẽ.

20

Mẽ kot Satanasti hpa hpre hã mẽ harẽnh

Wam Korĩt 15.20-28

1 Tã pa kê axte mẽmoj pumu. Nhũm Tĩrtũm kapêr o mẽ wrỳk xwỳnhjê hõja kaxkwa rũm wrỳ nẽ ahkre xupỳmti hpro xà ho htỳx xà hã safja py nẽ kàx pytĩhti ho mẽ hpre xàja õ py. 2-3 Hãmri nẽ kagãmnuti pê hêx xwỳnh maati Satanastija pynê. Amnepêm Atãw mẽ Ewa wa kãm hêx xwỳnhhta pynê nẽ kàx pytĩ o hpa hpre nẽ hte hpre hãmri nẽ ahkre xupỳmti nhĩtom xà mẽ nẽ kamã kumẽ. Hãmri nẽ akupỳm hpro xà ho hpro nẽ saf o hã ho htỳx. Kot pika piitã hkôt mẽ kãm hêx o pa pymaj ã hipêx anẽ. Kojã tokyx kator kêt ry rax kumrẽx. Kojã kamã arĩ hkrĩ hã amgrà xohtô nẽ. Hã amgrà pê 1.000 nhũm

rĩ kormã Tĩrtũm akupỹm kator nhũm kato nẽ ri pa. Nom pa hkrãre.

⁴ Tã pa mẽ htyk nẽ akupỹm mẽ htĩr xwýnh kwýjê pumu. Kormã mẽ htĩr ri na prem Tĩrtũm kapêr kôt pix mã amnhĩ nhĩpêx o pa. Nẽ Jejus kêp mẽ õ pahĩhti hã harênh rãhã ho pa. Aa mẽ kot mrymnuti kutã hkõnkrã ho rôrôk nẽ kãm mex ã harênh kêt. Nhũm prem tee mẽ ôkrã hã nẽ mẽ ãhkra katut ã mrymnuti nhĩxi nhĩpêx kaxyw nom nhũm prem hkaga kamã hihtýx nhũm prem kãm mẽ hkurê xwýnhjaja tee ri ja hã mẽ omu nẽ mẽ mut jakàr o mẽ kupa. Hãmri nhũm Tĩrtũm akupỹm mẽ ho mẽ htĩr nẽ mẽ kot mẽ ho amnhĩptàr ã hkrĩ xà kamã mẽ hkrĩ. Jejus nhĩhkô hã mẽ hkrĩ hã amgrà pê 1.000 kaxyw. ⁵ Mẽ kumrêx na pre Tĩrtũm akupỹm mẽ ho mẽ htĩr nhũm mẽ hkwyjaja mẽ hkĩnh ã arĩ ty nẽ hikwý hã amgrà pê 1.000 jakre nhũm rĩ kormã akupỹm mẽ ho mẽ htĩr.

⁶ Wam akupỹm mẽ htĩr xwýnhjaja kêp Tĩrtũm kra jakamã koja mẽ Tĩrtũm kra hkêt xwýnhjê kurom hkĩnh nẽ pa ho pa. Nẽ mẽ kurom mẽ kot amnhĩ xà htýx kamã hamak o pa htũm xà wýr pa hkêt nẽ. Nẽ mẽ kurom Tĩrtũm mẽ Kra Jejus Kris wa kuri mex kumrêx nẽ wa kãm tanhmã ri amnhĩ nhĩpêx to ho pa. Nẽ Jejus nhĩhkô hã mẽ ho amnhĩptàr o pa hã amgrà pê 1.000.

Tĩrtũm kot kuwy hwýr Satanasti mẽn̄h ã harênh

⁷ Tã koja amgrà pê 1.000 hapêx nhũm rĩ kormã Tĩrtũm kapêr o wryk xwýnhja akupỹm ahkre xupỹm wýr tẽ nẽ Satanasti mã kahê xà mẽ nhũm kato. ⁸ Hãmri nẽ kê axte pika piitã hkôt tanhmã mẽ kãm hêx to ho ri pa. Gorti nhõ xwýnhjê mã nẽ

Makok nhõ xwỳnhjê mã nê krĩ piitã hkôt Tĩrtũm nê tanhmã mẽ kãm hêx to ho mẽ hkôt pa. Hãmri nê mẽ kot Tĩrtũm krajê kutã amnhĩ xunhwỳr nê mẽ hkurê kaxàr kaxyw amnhĩ kwỳjê ho akuprõ nhũm mẽ ohtô rax kumrêx nê axpẽn wỳr akuprõ. Te pikahti grà xohtô pyràk.

⁹ Hãmri nê ma Tĩrtũm krajê nhĩmex par kaxyw mẽ hwỳr mra nê mẽ õ krĩ mã hipòk pa nê kuhê. Mẽ õ krĩa Tĩrtũm mã mex tã nhũm mẽ kot kêp grành par kaxyw ma hwỳr mra. Hãmri nhũm kaxkwa rũm kuwy hpòkja mẽ haêr pê mẽ hã rôròk nê mẽ ho hxêr pa.

¹⁰ No mẽ kãm hêx xwỳnh maati Satanastita nhũm Tĩrtũm kapêr o wrỳk xwỳnhja axte unê nê ma êsôf o kuwy maatita wỳr o tẽ nê kamã kumê. Ra mẽ kot kamã mrymnuti wa kot Tĩrtũm nê mẽ nokupyr o pa xwỳnh wa mẽnh tã wa hkôt Satanasti mã ho anê nê kamã kumê nhũm kamã pa ho pa. Koja mẽ aa kator kêt kumrêx. Nê arĩ kamã amnhĩ xà htỳx kamã hamak rãhã nê pa ho pa.

Tĩrtũm kot ahpỳnhã tanhmã mẽ piitã mẽ harênh to kaxyw

Matêwre 25.31-46; Juãw 5.25-29

¹¹ Tã pa axte mẽmoj pumu nhũm kaxkwa mẽ pikaja wa ra hapêx pa. Pa Tĩrtũm kot tanhmã mẽ piitã mẽ harênh to hã hkrĩ xà raxja pumu. Nhũm hakajre nhũm Tĩrtũm kamã nhỹ.

¹²⁻¹³ Hãmri nhũm ra mẽ htyk nê mẽ hikwỹ xwỳnh piitã akupỳm hapòx pa nê Tĩrtũm kot tanhmã mẽ harênh to hã hkrĩ xàta kutã hkrĩ pa. Mẽ piitã. Mẽ kot amnhĩ to rũnh xwỳnhjaja nê mẽ kot amnhĩ to hkryre xwỳnhjaja nê mẽ ho amnhĩptàr xwỳnhjaja

nē gô xujanâr kãm mē mrôr nē mē htyk xwÿnhjaja. Ra mē htyk nhũm mē kot mē hagjênh xwÿnhjaja piitã mē htykjê papxà rũm hapôx pa nē Tĩrtũm kutã ohtô ho ohtô nē hkrĩ. Hãmri nhũm Tĩrtũm ô kagà py nē kamã mē piitã mē hixi japêr. Kagà kamã ra mē hkukamã mē htĩr tũm nē mē pa ho mē pa mã xwÿnhjê nhĩxi japêr. Nē kagà hõ kamã mē htĩr ri tanhmã mē kot amnhĩ nhĩpêx to ho pa hã mē piitã mē hã kagàja. Nhũm kupy nē kamã tanhmã mē harênh to nē hkôt hprĩ hã mē piitã mē omunh pa nē rĩ kormã ahpÿnhã tanhmã mē harênh to.

¹⁴⁻¹⁵ Hãmri nē mē htĩr tũm nē mē pa mã xwÿnhjê nhĩxi hã kagàja kamã tee ri mē hkwyjê nhĩxi japêr nhũm kamã amrakati. Jakamã nhũm mē ma kuwy maatita wÿr mē o mra nē kamã mē rênh pa. Te axte mē htyk nhũm mē kot kuwy kamã mē hagjênh pyrãk nhũm mē kamã rôrôk nē tee ri amnhĩ xà htÿx kamã hamak rãhã nē pa ho pa nē aa kator kêt kumrêx.

21

Pika mē kaxkwa wa nyw jarênh

Sikũn Pêtre 3.8-13

¹ Tã pa axte mēmoj pumu. Nhũm Tĩrtũm ra pika mē kaxkwa nyw wa ho kato. Ra pika nē kaxkwa nē gô xujanâr tũmja hapêx pa nhũm kaxkwa mē pika nyw wa ho kato. Nom axte gô xujanâr o kator kêt nē.

² Hãmri nhũm Tĩrtũm nhõ krĩ mex pê Jerujarê nywja tanhmã amnhĩ to nē pika nyw wÿr wÿk o mō. Krĩja mex kumrêx. Mex o mex. Te mjên mã xwÿnh ê mex jaxàr nē amnhĩ to muxre nē mjên

wỳr htēm pyrà nē pika nyw wỳr mex kumrēx nē wrỳk o mō.

³Hāmri nhūm Tĩrtūm kot mē ho amnhĩptàr ã hkrĩ xà maatija kamã mēhōja kapēr o:

—Nà ãm hāmri. Na ra Tĩrtūm hkrajê hkôt pa ho pa. Pika nyw kamã mē hkôt pa ho pa nhūm mē tã no ho omu nē hkôt pa ho pa rãhã nē. Nà ãm hāmri. Ja mex o mex.

⁴—Koja hkrajaja hkôt pa ho pa nē axte htyk kêt kumrēx. Nhūm Tĩrtūm mē nē mē no kagô nhĩnhĩnh pa nhūm mē axte hkaprĩ nē mỳr kêt nē. Nē ri axte amnhĩ xà kamã hamak kêt nē. Nē axte ri tanhmã omnu hto hkêt nē. Ra mē hkaprĩ nē à nē mỳr o pata hapêx par kumrēx nhūm hpãnhã mēmoj nyw pix. Anē.

⁵Hāmri nhūm Tĩrtūm tãm tanhmã inhmã kapēr to. Krĩ xà maati kamã ỳr xwỳnhhta tãm inhmã kapēr o:

—E na pa ra akupỹm mēmoj piitã ho nyw pa. Jakamã e Juãw. ãm hāmri na pa ã amnhĩ kukamã amã mēmoj jarēnh anē. Ixêx kêt. Jakamã kêr ka akwỳjê mã piitã hã kagà hpa. Kê mē kamã harē nē tokyx kuma nē hkôt hamaxpēr rãhã ho pa.

⁶—Ra ixte amnhĩ kukamã mēmoj mã ijamaxpēr xwỳnhja na pa ra ho anhỹr pa. Ixpê mēmoj piitã ho anhỹr o hkrax xwỳnh nē mããnēn ixpê mēmoj piitã ho ijapêx par xwỳnh. Nē ixrãhã ixpa xwỳnh. Amnepêm kormã mēmoj kator kêt ri na pa pre ixrãhã ixpa. Nē ot pa arĩ ixrãhã ixpa. Tã mē kãm kôr nē kãm gô hkwỹ ho hkôm hprãm xwỳnhjê pyrà nē mē kãm ixpix prãm xwỳnhjaja kot paj te mē kãm inhõ hino rũm gô hkwỹ nhõr nhūm mē kot ho hkôm pyræk o mē hipêx. Hāmri nhūm mē htĩr tũm nē ixri

pa ho pa nê axte htyk kêt nê. Kot paj ã mẽ hipêx mex anê.

⁷—Mê ate tanhmã amnhĩ tomnuj to nê amnhĩ to htỳx nê ixkôt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhĩpêx mex anê. Ka mẽ apê ixkra hã amex nê ixkôt ri apa rãhã ho apa. Pa ixpê mẽ anhõ Tĩrtũm ã tanhmã mẽ ato mex to rãhã ho ixpa.

⁸—No mẽ kot amnhĩ kaxyw ixkôt hamaxpêr kêt xwỳnhjaja. Nê mẽ kot amnhĩ tomnuj xwỳnhjaja nê mẽ kot ri mẽ hpar prãm xwỳnhjaja. Nê mẽ kot nhãm ri mênijê ho amnhĩkati xwỳnhjaja. Nê wajagajaja. Nê mẽ kot amnhĩ to sãnti hwỳr o pa xwỳnhjaja. Nê ri mẽ hêx nhi xwỳnhjaja. ã mẽ kot amnhĩ nhĩpêx anhỹr xwỳnh piitã koja mẽ apê ixkrajê hkĩnhã ma kuwy maati wỳr hapêx par kumrêx. Te axte mẽ htyk pyrãk nom koja mẽ axte htyk kêt nê. Anê.

Jerujarê nyw jarênh

Sikũn Korĩt 6.16; Karatas 4.26; Eprêw 12.22-24

⁹ Tã nhũm mẽ kot xijere pê 7 kamã Tĩrtũm gryk xà jamỳnh xwỳnhjê hõja hãmri ixwỳr tẽ nê inhmã:

—E ma ixkôt tẽ nê mẽmoj pumu. Na ra krĩ nywja pika nyw wỳr wrỳk o mỗ. Te mjên mã xwỳnh ê mex jaxàr nê amnhĩ to muxre nê mjên wỳr htêm pyrã nê mex kumrêx nê kaxkwa rũm pika nyw wỳr wrỳk o mỗ. Nê kot ho mjên mã xwỳnhta te mẽ pahte amnhĩ tomnuj pãnhã amnhĩrer xwỳnhta pyrãk. E tokyx tẽ nê omu. Anê.

¹⁰ Hãmri nhũm Tĩrtũm Karõ tanhmã ixto pa ma kot inhmã kapêr xwỳnhta kôt tẽ nhũm ma ixto mỗ nê kên krã hprêeti hwỳr ixto api nê himõk ã ixãm.

Pa Tirtũm nhõ krĩ mex pê Jerujarẽ nywja pumunh o xa. Nhũm mex o mex. ãm hãmri te mjên mã xwýnh kot ê mex jaxâr nẽ amnhĩ to muxre nẽ mjên wýr htẽm pyrà nẽ ahpar mã wrýk o mõi pa ixprĩ hã omu.

¹¹ Na pre rax o rax nẽ mex o mex. Tirtũm kamã pa ho pa jakamã nhũm kamã hirã htýx kumrẽx. Te kẽn mex ã kàxpore xohtõ jaxênh mex týx pyræk.

¹²⁻¹³ Nẽ krĩ puhã kahêja hprêk rax nẽ. Nẽ hwýr mẽ gjêx xà kêp 12. Na pre myt japôx xà rũm axkrunêpxi. Nẽ myt gjêx xà rũm haxwýja axkrunêpxi. Nẽ akutã kahpa hkõt haxwýja axkrunêpxi. Nẽ ahpýnhã hakwakre hã Tirtũm kapêr o wrýk xwýnhjaja hamãr o kuhê. Nẽ hakwa kre piitã hã Ijaew pê ahpýnhã mẽ pikjêr kãm mẽ kêp 12jaja mẽ hixi hã kagà.

¹⁴ Nẽ kahê xunhwýr xà hkukamã kẽn pytyrja ahpýnhã kêp 12. Kẽn pytyrta ã na mẽ kot Jejus nhỹ hã mẽ ahkre o mẽ pa xwýnh maati pê 12jê nhĩxi hikwỹ.

¹⁵ Tã nhũm kot ixto mõi nẽ inhmã mẽmoj jahkre xwýnhta ôr o mẽmo pĩ py nẽ kot ho krĩ ho mĩdi kaxyw xa. Nẽ ho kahê piitã ho mĩdi kaxyw. Nẽ mẽ gjêx xàja ho mĩdi kaxyw.

¹⁶⁻¹⁷ Hãmri nẽ ho mĩdi hpa. Krĩja ry nẽ kahpa piitã axpên pyræk. Nẽ hprêk piitã mãânên axpên pyræk. Kamã mẽmoj piitã ahpýnhã kêp 2.200 kirõm. No puhã kahêja hprêk o 64 met pix nẽ.

¹⁸ Nẽ kahêja kẽn jaxênh pix o kot amnhĩ nhĩpêx jakamã mex o mex. Nẽ hkarýr týx kumrẽx. Nẽ kahê hkre kamã krĩ kamã ahpýnhã ri ixkreja ôr pix o kot amnhĩ nhĩpêx. Nẽ piitã hkarýr týx.

19-20 Nē kahê xunhwÿr xà hkukamã kēn pytyrta ahpÿnhã ri kēn mex pix o kot amnhĩ nhĩpêx. Piitã mex kumrêx nē hkarÿrti.

Wamta kawax pê grãgrãre.

Nē hkôt ja kawax pê grãgrã kakrã htyk.

Nē hkôt ja kakrã htyk.

Nē hkôt hõja grãgrã karÿr.

Nē hkôt ja hkamrêk pihkãrti.

Nē hkôt ja grãgrã kakrã htyk.

Nē hkôt ja hkamrêk tÿx kumrêx.

Nē hkôt ja ràrààre.

Nē hkôt ja grãgrã mẽ pihkàr.

Nē hkôt ja ràràr mẽ pihkàr.

Nē hkôt ja grãgrã karÿÿre.

Nē hkôt ja kakrã htyk pihkàr.

Ã kēn pytyr mex kot anhÿr.

21 Nē mẽ gjêx xà hã hakwakre kahê xà pê 12ja mẽmo kēn jakooti rũnh kumrêx pix o. Nē krĩ kahti hkôt pry nhĩkwÿ xwÿnhja ãm ôr pix o. Nē hkarÿÿre.

22 Pa pre tee ri krĩ kamã Tĩrtũm mã amnhĩ jarēnh xà hã ixkre japêr nhũm amrakati. Mo kaxyw koja mẽ axte ixkreja hwÿr mra? Ra Pahi Maati Tĩrtũm xihtÿx xwÿnh mẽ mẽ pahte amnhĩ tomnuj pãnhã amnhĩrer xwÿnhhta ra hkrajê kamã pa ho pa kēnã kot kêt mẽ axte ri ixkreta o presija. Koja mẽ kãm wa mex ã wa kãm harēnh prãm nē nhÿri tãm wa hwÿr mra nē ã wa kãm kapêr anē. Te mẽ pahte pahĩ hwÿr pamrar nē kãm pakapêrta pyrã nē wa hwÿr mra nē wa kãm kapêr.

23 Nē koja krĩja kamã myyti nē mytwrÿre hkêt. Mo kaxyw kot kêt myyti nē mytwrÿreja arĩ ri hirã ho pa? Krĩ kamã Tĩrtũm pa ho pa jakamã kamã

hirã mex kumrêx. Nê mẽ pahte amnhĩ tomnuj pãnhã amnhĩrer xwÿnhhta haxwÿja kamã pa ho pa. Te kêp kanê hpôk rax kumrêx pyrã nê hirã mex o pa. Kot hirã mex o kot myyti jakrenh. ã Tĩrtũm mẽ Kra wa krĩja kamã pa ho pa jakamã nhũm mẽ axte myyti ho presija hkê nê.

²⁴ Koja krĩ nhõ xwÿnhjaja hirã mex pix kãm ri pa ho pa nê tãm ri amnhĩ nhĩpêx o ri pa. Tã koja mẽ ho amnhĩptàr xwÿnhjaja Tĩrtũm wÿr mra nê amnhĩ rom kãm mex o mex ã harê nê kãm:

—Na pre mẽ ixkwÿjaja mẽ ixpê mẽ ho amnhĩptàr xwÿnh ã axpên mã mẽ inhmex nê mẽ ixàhpumunh ã ri axpên mã mẽ ijarê. Nom mẽ ixrom amex o amex nê axàhpumunh o axàhpumunh. Jakamã ãm hãmri na htem amã amex o amex ã ajarê Tĩrtũm. Anê.

²⁵ Nê krĩ hwÿr hakwakre koja amnhĩ kahê xà rênh rãhã kuhê nê aa amnhĩ kahê hkê nê. Jar mẽ panhõ pika kamã na hte kamàt kaxyw nhũm htem amnhĩ tã hakwakre kahê hpa. No mo kaxyw koja mẽ axte pika nywja kamã ã amnhĩ nhĩpêx anê? Koja kamàt kêt nê hirã rãhã ho rãhã jakamã nhũm mẽ amnhĩ tã kahê hkê rãhã nê pa ho pa.

²⁶ Nê koja mẽ piitã Tĩrtũm wÿr mra nê kãm mex o mex ã harê nê kãm:

—Pa Tĩrtũm. Hêxta waa nê. Anhõ krĩja mex kumrêx. Mex o mex. Nê mẽ ixrom amex o amex nê axihtÿx o axihtÿx. Nê mẽ ixrom axàhpumunh o axàhpumunh. ãm hãmri na ka ra mẽ ixpê akrajê kamã apa ho apa Tĩrtũm. Anê.

²⁷ Nê koja mẽmoj punuj krĩja wÿr gjêx kêt kumrêx. Mẽ hpijaàm kêt xwÿnhjaja nê ri mẽ hêx xwÿnhjaja hwÿr gjêx kêt nê. ãm mẽ pahte amnhĩ tomnuj pãnhã amnhĩrer xwÿnhhta nhõ kagà kamã

Tĩrtũm ri mẽ htĩr tũm nẽ mẽ pa mã xwỳnhjê nhĩxi nhĩpêx xwỳnh pixjaja koja mẽ hwỳr agjê nẽ kamã pa ho pa.

22

¹⁻² Tã pa pre axte mẽmoj pumu. Nhũm Tĩrtũm kapêr o wryk xwỳnhja axte inhmã mẽmoj jahkre. Nhũm Tĩrtũm mẽ kot mẽ pahpãnhã amnhĩrer xwỳnhja wa kot mẽ ho amnhĩptàr ã hkrĩ xà maati rũm pyhti hprõt. Krĩ kahti hkõt pry pohti nør xwỳnhhta kahti hkõt hprõt o nõ. Pyhti kamã gôja na htem ho ixkõ nẽ htĩr tũm nẽ pa ho pa. Gô karỳỳre. Nhũm mẽmo pĩ hpàr muxre xwỳnhja akutã hijê nẽ xa. Pĩ xôja na htem kuwô nẽ htĩr tũm nẽ pa ho pa. Na hte apkati mẽ ô rãhã nẽ kuhê. Nẽ axtem hõja mẽ piitã mẽ mex nẽ à hkêt kaxyw na hõja.

³ Amnepêm na pre Tĩrtũm Atãw mã kapêr nẽ kãm:

—Ate amnhĩ tomnuj mỳrapê kot paj tanhmã pika homnu hto nhũm apê mex kêt nẽ. Ka kamã apur nẽ kamã axàpênh rũnh o apa rãhã nẽ rĩ kormã kamã axàpkur o ri apa. Apê jamnuj tã kot kaj mẽ ã amnhĩ nhĩpêx anhỹr o apa rãhã ty. Anẽ.

Tã ra Tĩrtũm nhõ krĩ nyw kamã mẽ omnuj xàja amrakati kumrêx. Nẽ Tĩrtũm mẽ kot mẽ pahpãnhã amnhĩrer xwỳnhhta wa õ krĩ kamã pa ho pa jakamã mẽ pahte kamã mẽ papa xwỳnhjaja kot puj mẽ wa kãm tanhmã amnhĩ nhĩpêx to ho ri papa.

⁴ Kot puj mẽ tã pano ho Tĩrtũm pumunh o papa. Hãmri nhũm te mẽ pahpiitã mẽ panhõkrã hã amnhĩ nhĩxi nhĩpêx pyrak o mẽ panhĩpêx.

⁵ Nẽ kot puj mẽ Pahi Maati Tĩrtũm nhĩrã kamã ri papa nẽ axte myyti nhĩrã ho presija hkêt nẽ.

Koja kamàt hapêx pa pu mē axte kanê ho presija hkêt nê. Nê Jejus nhîhkô hã hirã kamã mēmoj to amnhîptâr rãhã ho papa.

*Jejus tokyx akupÿn wrÿk ã harênh
Apokarip 1.1-3*

⁶ Tã nhÿm Tîrtÿm kapêr o mē wrÿk xwÿnh kot ixto môr xwÿnhhta axte inhmã kapêr nê inhmã:

—E nà ãm hãmri na ixte amã mēmoj piitã harênh xwÿnhja. ãm hãmri na. Jakamã kwa kêr ka arî hã ano htÿx rãhã ho apa. Amnepê m Tîrtÿmja ÿ hã mē kapêr o pa xwÿnhjê mã tanhmã kapêr o amnhîrît to. Kot tanhmã amnhî nhîpêx to hkukamã mē kãm ho amnhîrît nhÿm prem kuma nê ô ri ma hkwyjê mã harênh o ri mē hkôt pa. Tã ra mē hpãnhã pa mē awÿr inhmê. Mē ate Tîrtÿm mã tanhmã amnhî to ho apa xwÿnhjê mã ixte ja jarênh kaxyw Pahihti Tîrtÿmja mē awÿr inhmê pa wrÿ. Nà koja mēmoj tokyx ã amnhî nhîpêx anê. ⁷ Na pre Jejus mē amã amnhî jarênh o: “Kot paj tokyx akupÿm mē awÿr wrÿ. Tã mē ate ijarênh ã kagà kamã harênh nê mar nê amnhî kaxyw hkôt ajamaxpêr nê hkôt amnhî nhîpêx xwÿnhjaja kot kaj mē akînh nê ri apa.” Anhÿr o amnhî jarê. Anê.

⁸ Nà ixpê Juãw na pa pre ã inhno ho mēmoj pumunh anê. Hãmri nê omunh pa nê Tîrtÿm kapêr o wrÿk xwÿnh kot inhmã harênh xwÿnhhta kutã ixkôn krã ho ixtêm nê inhÿr kaxyw. Nom nhÿm amnhî nê inhmã kapêr kãm hihtÿx nê inhmã:

⁹ —Kwa nà ri ã inhîpêx anhÿr kêt nê. ãm Tîrtÿm pix kutã na pu htem ã amnhî nhîpêx anê. Apyrà nê ixpê Jejus kwÿ kênã. Na pa hte apyrà nê ÿ hã tanhmã amnhî nhîpêx to ho ixpa. Nê mē apyrà nê

kapēr ã kagà hkôt pix mã amnhĩ nhĩpêx. Na pu htem axpên kutã pahkôn krã ho parôrôk kêt nê. ãm Tĩrtũm pix kutã na pu htem ã amnhĩ nhĩpêx anê.

10 —E ã ate mẽmoj pumunh nê mar anhỹr xwỳnhja koja tokyx ã amnhĩ nhĩpêx anê. Jakamã kwa kêr ka akwỳjê pê ho apimxur kêt nê. Piitã hã kagà hpa kê mẽ kamã harê nê kuma nê mẽmoj kot ã amnhĩ nhĩpêx anhỹr mã xwỳnhhta piitã hkukamã harênh ma. Kojã tokyx mẽmoj ã amnhĩ nhĩpêx anê.

11 —Jakamã kwār mẽ māmri piitã tanhmã kãm amnhĩ nhĩpêx to ho pa hprãm xà hkôt amnhĩ nhĩpêx o pa. Kwār mẽ mẽ kot amnhĩ tomnuj xwỳnhjaja ã amnhĩ anhĩpêx anhỹr o pa. Nê kwār mẽ kot tanhmã kapēr punuj to xwỳnhjaja māmri ã amnhĩ nhĩpêx anhỹr o pa. Nê kwār mẽ kot tãm amnhĩ nhĩpêx o ri mẽ pa xwỳnhjaja māmri Tĩrtũm kôt pix mã ri tãm amnhĩ nhĩpêx o pa. Anê.

Nhũm pre ã kaxkwa hwỳr ixto àpir xwỳnhhta inhmã kapēr anê.

12 Hãmri nhũm hpãnhã Jejus tãm inhmã kapēr nê inhmã:

—E kot paj tokyx akupỹm mẽ awỳr wrỳ. Nê akupỹm pøj hãmri nê mẽ kot amnhĩ tomnuj o mẽ pa xwỳnhjaja pa ja mỳrapê ma mẽ kot amnhĩ xà htỳx kamã hamak tũm xàta wỳr mẽ rênh pa. No mẽ kot ixkôt amnhĩ nhĩpêx xwỳnhjaja kot paj akupỹn inhõ krĩ hwỳr amnhĩ kôt mẽ ho api.

13 —Nê ixrãhãã xwỳnh na pa. Amnepê mã ko-rmã mẽmoj kêt ri na pa pre ra ixrãhãã. Nê koja nhỹrmã mẽmoj piitã akupỹm hapêx pa arĩ ixrãhã nê ixpa ho ixpa.

14 —Nê Tĩrtũm kot mẽ anê mẽ ate amnhĩ tomnuj kuhõnh par xwỳnhjaja kot kaj mẽ amex kumrẽx nẽ apa ho apa. Nê akĩnh nẽ ajamakêtkati nẽ ri atỳx apa ho apa. Te ho mẽ kot amnhĩ xê kahõnh nẽ mex jagjênh nẽ ri hã pata pyræk. Kojã Tĩrtũm mẽ amã anê ka mẽ ajamakêtkati nẽ õ krĩ hwỳr agjê nẽ kamã ri amex kumrẽx nẽ ri apa ho apa. Nẽ kamã mẽmo pĩ xõ mẽ kot kur nẽ htĩr tũm nẽ pa mã xwỳnhhta wỳr mra nẽ amnhĩm ô rê nẽ hkur o ri apa. Ra mẽ ate Jejus kôt amnhĩ xunhwỳr jakamã kot kaj mẽ axamnhĩx hwỳr mra nẽ amnhĩm hkwỳ rê nẽ hkur o ri apa. Kot kaj mẽ ã amnhĩ nhĩpêx anê.

15 —Nom mẽ kot amnhĩ tomnuj o mẽ pa xwỳnhjaja kojã mẽ akĩnhã inhõ krĩ hwỳr gjêx kêt nẽ. Mẽ kot ri mẽ y ho mẽ pa xwỳnhjaja. Nẽ mẽ kot nhãm ri mênijê ho amnhĩkati ho mẽ pa xwỳnhjaja. Nẽ mẽ kot ri mẽ hpar o mẽ pa xwỳnhjaja. Nẽ mẽ kot ri sãnti nhĩpêx o te Tĩrtũm nhĩpêx pyræk o mẽ pa xwỳnhjaja. Nẽ mẽ kãm ri hêx prãm o ri mẽ pa xwỳnhjaja. Kojã mẽ akĩnhã inhõ krĩ hwỳr pa hkêt nẽ.

16 —E Juãw. Nà ixpê Jejus na pa awỳr ixkapêr o mẽ wryk xwỳnhhta mẽ. Kot ixkwỳjê kaxyw amã ixkapêr jarênh kaxyw. Ixpê Tawi pàr krax na pa. Te ixpê arĩgro hkôt kanhêti hpòk rax kot arĩgro ho mõi ã ho amnhĩrĩt xwỳnhhta pyræk. Anê.

Nhũm pre ã Jejus inhmã kapêr anê. 17 Tĩrtũm Karõ mẽ Jejus kwỳjaja na htem ã Jejus kot amnhĩ jarênh anhỳrja ma nẽ hkĩnh nẽ. Nẽ kãm kapêr o:

—Hêxta waa nẽ. Kwa amnhĩm anojarêt nẽ tokyx akupỳn mẽ ixwỳr wrỳ Pahihti. Pa mẽ tokyx ã amnhĩ nhĩpêx anhỳr o ri war akôt ixpa. Anê.

Ně mẽ ate ja mar xwỳnhjaja kêr ka mẽ uràk nẽ ã kãm akapêr anẽ.

Ně te mẽ amã kôr nẽ ri mẽ apa pyràk xwỳnhjaja kêr ka mẽ te Jejus wỳr amrar nẽ ò gô ho akôm pyrà nẽ hkôt amnhĩ xunhwỳ. Te Jejus amarĩ mẽ pamã ò gô nhõr pyràk o mẽ panhĩpêx pu mẽ hkôt amnhĩ xunhwỳ nẽ ra pahpê pahĩr tũm nẽ papa mã xwỳnh. Hãmri nẽ amnhĩ pãnhã tanhmã kãm amnhĩrer to hkêt nẽ.

Nhỹrmã mẽmoj nyw par ã harẽnh jatur xà

¹⁸ E ixpê Juãw na pa Jejus nhỹ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anẽ. Tã kwa mẽ o kora. Kêr ka mẽ atõ amnhĩ krã hkôt ri ajamaxpêr o te ho ja pyrà nẽ hijuk ri axte mẽmoj nhĩpêx kêt nẽ. ãm kwarĩ ho kwarĩ. Kot ka mẽ atõ anẽ nhũm Tĩrtũm ja hã apumu nẽ kagàja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

¹⁹ Rỳ ka mẽ atõ kagà kamã harẽ nẽ ama nẽ tanhmã ajamaxpêr to nẽ ajamaxpêr o:

—Nà ja kot anhỹr kêt. Na mẽ ãm harẽnh o hêx. Kot paj kuma nẽ ãm kuma.

Anhỹr o ajamaxpêr japêr. Hãmri nhũm Tĩrtũm amnhĩ tã ama nẽ kagà mexta kamã kot tanhmã mẽ ho mex toja o ato mex kêt nẽ. Ka ò krĩ hwỳr axàpir nẽ mẽmo pĩ xô mẽ kot hkur nẽ hĩr tũm nẽ pa kaxyw mã xwỳnhta ka amnhĩm hõ hyr nẽ hkrêr kêt nẽ. Jakamã e kwa mẽ o kora. Kêr ka mẽ kagàta kamã ã mẽmoj kot amnhĩ nhĩpêx anhỹr mã xwỳnhta jarẽnh ma nẽ aprĩ hã piitã hkôt ajamaxpêr tỳx rãhã ho ri apa.

²⁰ E Jejus kot inhmã mẽmoj kukamã tanhmã ujarẽnh to xwỳnhta na pre inhmã amnhĩ jarẽnh o: “Kot paj tokyx akupỹn mẽ awỳr wrỳ.” Anẽ. ãm hãmri na pre ã amnhĩ jarẽnh anẽ. Koj tokyx akupỹn mẽ pahwỳr wrỳ hãmri nhũm mẽmoj piitã mex o mex.

Jakamã kwa kêr ka amnhĩm anojarêt nẽ tokyx akupỹn mẽ ixwỳr wrỳ Pahihti Jejus.

²¹ Nẽ ixpyrà nẽ mẽ apê Tĩrtũm krajaja na pa hte mẽ ato Pahihti Jejus wỳr rãhã ho ri ixpa nẽ kãm:

—Kwa akwỳjê pumu nẽ mẽ kutã anojarêt rãhã ho ri apa Pahihti. Anẽ.

E mẽ ujarẽnhja na hapêx. Ixpê Juãw na pa Jejus kot inhmã tanhmã ujarẽnh toja pa amnhĩ xô ri mẽ amã hã kagà hpa. E na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f